

Luka Deuxu Rybe Wihiký Tỹmyra, Luka Tyyritidỹỹdu

¹⁻³ Wyla, Teòfilo. Adee heka watyyriti ariwahinykre timybo Kristu rotỹỹnyre. Tuu lobixidu mahãdu tuu relyymyhỹre-ribi, jiarỹ ire ariòbitinytyhykre. Kia heka jiarỹ adee reritinymyhỹre, waiòlò, iwese ibutumy reeryrenyre juhu bededỹỹna-ribi. Aõma inatyhymy kia rotỹỹnymy rare wahe.

⁴ Kia wese wahe. Iwese iny adee relyyre wese, jiarỹ adee arelyyre inatyhymy aõbo rotỹỹnyre.

⁵ Zacaria heka Deuxu xiwe wahidỹỹdu rare, Abia ijoiõ wahe. Iriòrese Isabeli tahe tule xiwe wahidỹỹdu riokore mahãduõ rare. Kiau heka Herodi judeu bedesỹ iòlòmý raremyhỹ, Araõ riokore mahãduõ wahe.

⁶ Wiwanale heka awirenyre Deuxuru-ò. Òbitihyy heka ratximyhỹrenyre ibutumy Deuxu bededỹỹnanako-ò.

⁷ Tiiboho iriòreõhyyre. Ihãwyy Isabeli heka rase-nadunyre, uladu herina dori awiõre. Ihãbu tule ramatuarinyre.

⁸ Aõutxumy tahe Zacaria raaõmysỹdỹỹnymyhỹre aõma templo-wo-ki. Kiatxu heka iròtenatxumy bede rỹimyhỹre templo-wo-ò. Tahe iwo-ki ratximyhỹre.

⁹ Hewydysi lỹnywi ritoonymyhỹ Deuxu kia deàlànamy, iwese riwinymyhỹrewesehyyle.

¹⁰ Iu ahana-ki tahe sõwemy iny rexitòenymyhỹ.

11 Iu Zacaria xiwena ruruwe-ribi loosòna-ò rỹireu, hewydysi lỹnywi ritoonymyhỹre. Tahe aõwesele ýjuõ rexitỹnynyre Zacariako-ò.

12 Tii tuu robireu heka rexiraòmý ruberumy reare.

13 Ýju rarybere: —Brebũmykre, Zacaria. Deuxu roholare aixitòedỹna-ò. Tai heka adee ijyymy rareri. Ahãwyy Isabeli rariòrenykre. Kai heka Joaõmy bininikre.

14 Tai kaiboho heka iura heka beysabenyke sõwemy; ijõ iny tule reysakre iòraru-ki.

15 Tii heka hãbutyhyhykỹmy rarekre Deuxu dee tiu heka vỹ riõõtyhy mona hàrihikỹ riõõtyhy. Deuxu Tyytybytyhy. Juaõtykymy ralokre tii reareu.

16 Sõwemy heka aõma Israeli mahãdu Deuxu rityhynykre iòraru-ki wahe.

17 Tii heka hãbutyhyhykỹmy rarekre Deuxu rybedumy Elia wesemy. Tii heka aõma Deuxu deòdỹna juhoo rehemynymy reakre ikòlemy iny ywisidỹnakre rehemynykre juhoo, aõma Deuxu Tyytybytyhy dehemynyna riijemy tuu rehemynymy rakre. Tii bede ywina riòbitinykre inyy-ki. Tyby tariòre-wana wii riwoxinykremy. Tii heka iny ribedeerynykre aõma òbitimy rỹirakremy. Deuxu lumy rỹirakre aõma ilahireny rỹira wesemy juhoo.

18 Zacaria rarybere ýju-ò: —Jiarỹ ramatuarinyre timykre heka? Hãwyy tule rasenadunyre ihãrele òsana tukre.

19 Ýju rarybere: —Jiarỹ Gabrieli watzireri, Deuxu deòdutyhy wahe. Tii heka diwateònyde kaò adee rybemy wahe.

20 Kai tetyhynyõhyyteri tai kai marybeõkre uladu reakre xiery tahe marybekre. Kaa adee rarybereri dori õbitimy rarybereri warybemynamy ibutumy rÿikre.

21 Iny riraõmy rÿimyhÿ Zacaria òlõna, tahe ra-roorehenymyhÿ. Iroorehena rieryõhyymyhÿreny. Dòhõnydeu ta, rybe-ki rexisiranomy rarybeõhyyre.

22 Tii rehemynyreu tamy rybeõhykyre rahõra. Idi tebò-di raramynyre urile rybe riwisÿnyny rarybeõhykymyhÿre aõma timybo aõhebo rotÿÿnyrá heka riõbitinykemy heka rarybeõhyymyhe timyrabo.

23 Tahe taaõmysÿdÿÿna rihudi, taheto-ò ròõsere ixyby.

24 Idi tahe Isabeli rabõtõnyre iruwyre ahådumy bede riijere rexiwòmny.

25 Isabeli rarybere: —Deuxu awi heka rare, riwatare waixÿruna-ribi. Kuladu wadeke ri-wahinyreri.

26 Ijõ ahãdu tahe Deuxu Gabrieli riteõnyre Nazare hãwã-ò Kalileia bede-ò.

27 ÿjuõ heka rybe-di ijadõma-ò. Kia ijadõma heka wii ritobinomy rÿireri tybyboho iseboho Jyje-wana roikremy. Jyje heka iòlò Davi kia mahãduõ rare. Ijadõma tahe Marie inire.

28 ÿju heka kiamy rarybere: —Beysakre Marie! Inynyryÿ heka awana ratxireri. Bedeõbyhykÿ adee kidiwahinykre. Tii arãwowydynyneri.

29 Kia rybe-di tahe Marie rexiraykynyre. Tii rieryõmy aõmybo rare.

30 Tahe ÿju tamy rarybere: —Marie, Brebuõmy! Deuxu teteysanyte. Kai awi heka rare. Tii

aõwihikỹbo adee kidiwahinykre.

³¹ Kai heka mariòrekre, uladu heka Jesusimy raninikre.

³² Tii heka hãbu nihikỹ rarekre. Tii Deuxu riòremy raninikre. Deuxu heka tii iòlòm̃y risỹnykre, iwese Davi alabiehekỹreny ronyre wese, tii ronykre.

³³ Tii heka ibutu Ijaò mahãdu iòlòm̃y rarekre. Iòlòna heka tiu itueõtyhy.

³⁴ Tai tahe Marie ŷju-ò rarybere: –Jikarỹ heka ijadòkòm̃atyhy watzireri. Timykibohe krabòtòm̃ykre.

³⁵ Tahe ŷju rirawyòm̃y: –Tyytybytyhy adee kanalokre. Deuxu ruru heka adee kanakre. Tai heka kia uladu Deuxu òbiti riòremy raninikre.

³⁶ Nohõti lusaòm̃y anymy-ribi Isabeli riki bòtòkòm̃y rareke-ribi tahe bòtòm̃y ratzireri. Debò sohoji reurò ahãdumy iahãdu.

³⁷ Deuxu dee heka tiu aõ isiraõre.

³⁸ Marie rarybera: –Jikarỹ Wahĩ dekòdu rare. Anomybo tarybeteri ka ibutumy rekyrubunyreri. Wadeke awire. Anowaxina tuukre irybemynamy karotỹkỹnykre. Idi ŷju rikòm̃y reare.

³⁹ Idi ta tii heka Isabeli roramy rare. Zacaria sỹmy Judeia bedede hãwãlò hãwã bedede-ki.

⁴⁰ Iu Marie rehemynyreu tahe wii rirybenyreny:

⁴¹ Tiu kia aõbo uladu Isabeli kia-ki iule rexi-watxinymyhỹ Marie-ò. Isabeli heka tỹxiykỹle Deuxu Tyytybytyhy-di ratximyhỹ.

⁴² Riajuamy rare deysana-di sõwere: –Kai hãwyy ibutu-ribi deysana rarekre. Auladu tule deysana rarekre.

43 Anoherekibo Wahĩse waroramy naderi. Jikarỹ ano anokõ rare.

44 Adeke rahokujareku, kuladu wawoku-ki rex-ilòrelòrenymyhỹ tabedesa-di. Tai tahe Isabeli rỹraxyimy ratximyhỹre Deuxu Tyytybytyhy-di.

45 Kai bekysabenyke kia tetyhynyteki. Deuxu rybe dokuri adeke nade. Iwese tiki raryberewe-sele ibutumy rãikre.

46 Marie rarybere: –Jikarỹ wawoku-ribi Wahĩ rewokuwydynyre.

47 Wawokuribityhy wadekysareri Wahĩ watarasadu dokuri rare.

48 Ihyky tahe tiki tekòdu-ribi walanokon-akona-ribi tōhōti rosakre. Tahe iny ibutumy hãwyky dekysanamy riwaninikre.

49 Deuxu dokuri anomydỹkỹnana wiwihikỹ wadeke riwahinyre. Tii tahe ityhy rare.

50 Tikiemy inydeke ruxetòena riwahinymyhỹre iny tamy wowydyna riwahinyrekí.

51 Ixityhy nohōtidu mahãdu tiki rehure.

52 Bede ikòlò sōwemy tiki rehure. Tule iny ianokõ mahãdu Deuxu riwikòhenanymyhỹre.

53 Rama risamahãdu deke rỹsỹna tiki riwahinyre.

54 Irybe tahe tiki rityhynyre anobo tiki inyty-byreny deke tiki raryberemy. Tikibohe tahe Deuxu riwikòhenanyre.

55 Ruxetòena tahe Abraõ deke riwahinyre tule tikiemy iriokore deke riwahinymyhỹre.

56 Marie tahe inataõ ahãdu Isabeli-wana riwyrá. Idi tahe tasỹ-ò ròðsera.

57 Bededỹỹnana Isabeli-ò rehemynyre. Iriðre reakremy ratxireriu, Iriðre reare.

⁵⁸ Isỹ mahãdu heka teysana-ò roholarenyre, iery mahãdu tule rabedesarenyre tamy Inynyrỹ raruxetòenyredi, Inynyrỹreny ruxetòena tamy riwahinyreki.

⁵⁹ Tahe debò inataõ txu-di, uladu notyky resynamy bede rỹire. Zacaria raninykemyre.

⁶⁰ Tai tahe ise rarybere: –Anokõre, Joaõmy rarekre.

⁶¹ Isỹ mahãdu rarybere: –Joaõmy ninadu taheka ijõkõhykyre inysỹreny-ki. Anoherekibo tuukre? tai tuu raninike wahe.

⁶² Tuu Zacaria-ò rỹỹraxireny: –Momybo raninykre?

⁶³ Tahe Zacaria tababese riòreõ rimyre. Riritinyra kia: –Joaõ heka inikre. Tahe ijõ mahãdu ibutumy ribedeòtiidỹnyre.

⁶⁴ Iu tahe Zacaria rarybere Deuxu riwowydynyre. Tahe ibutumy isỹ mahãdu heka ruberure.

⁶⁵ Ibutumy heka tii relyymy raremyhỹ Judeia mahãdu hãwãlò nihikỹmy.

⁶⁶ Ibutumy tamy roholaré heka raryberenyre: –Timybo uladu rarekre? Inynyrỹ idi tarukimy iweribikre.

⁶⁷ Tahe Deuxu Tyytybytyhy heka Zacariatykymy ralore. Tahe Deuxu aõmydỹỹnanamyhe relyyre timybo rabededỹỹnananykremy. Tii rarybere:

⁶⁸ –Judeu mahãdu Deuxu awi rare. Tii dori taijoi roramy nade.

⁶⁹ Iwiòhedỹỹmy tulemy tarasadu tyhy Tii heka Iòlò Davi mahãduy rare.

⁷⁰ Deuxu Rybedỹỹdu mahãdu kia wesemy tuu raryberenyre.

71 Inydireny òludu mahãdureny-ribi riki iny ritarenykre. Iny-di heka raruxetòerenyra.

72 Tahe iny-ribi tōhõtireny rosaõhykyra. Tahe rarybekre timybo raryberemy inytybyrenemy.

73-75 Tii heka iny ritarenykemy inydireny ratxireri inyòludureny-ribi. Kia-ò heka rarybere inylabiereny Abraõ-ò. Tai heka rikiwiòhenanyrenyke brebuõlemy. Òbitimy iko-ò rakatxirenyhyykre.

76 Kai wariòre Deuxu rybedumy mabekre. Kai heka mabekre Deuxuhukỹ rybemy rybedumy. Kai heka bōhōnykre

Inynyrỹ-kò iry biywinykremy.

77 Asỹ mahãdu-ò marybekre biu-ò hena kanakremy ihỹre. Deuxu heka tōhōti rosakre iòrarunareny-ribi.

78 Iny Deuxureny dori inydeereny ruxetòedu rare. Tii heka biu-ò hena ibutu-ò kidiõkre, tarasana wahe.

79 Kia bede lurumy rỹira mahãdu biuloosònamy robikre.

Zacaria rybe tahe rikonananyre. Loosòna ywinary-ò tahe ritỹnynykre.

80 Ihewo-ribi tahe uladu ratybienyire taumy-di Deuxu tyhydỹỹna-ki tule. Tii heka bederahy-ki raremyhỹ. Tiutxumy rexitỹnynykremy judeu mahãdu-ò.

2

1 Kia mahãdu iòlò Augusto inire. Kia heka ibutumy bede-ki inyni rityyritinykemy bede riywinyre.

2 Kurina heka Siria bede dinodu rare.

3-4 Jyje heka Nazare hãwã-ki rasÿnyny raremyhÿ. Tai tahe Kalileia bede-ribi tiiboho roirenykemy Judeia bede-ò. Iòlò Davi dori tai reare, Belẽ hãwã-ki.

5 Jyje tahe rare, tii dori Davi ijoimy rareki. Marie bòtòmÿ tii ridyre tai ihãwyy.

6 Tahe Belẽ hãwã-ò rehemynyre. Tahe herina roxina heto ihoõre herina tamyreny. Taihe awaru roxina heto-ò roire.

7 Tai hãwyy ratohouãsenyre. Idi rihetynyre awaru roxina hynaro-ò ritidikemy.

8 Iu tahe budoeni-di itxeredu mahãdu bedero-ki ratximyhÿreny.

9 Idi tahe ÿjuõ tamy nade Deuxu-ribi. Deuxu loosòna tamy ritynyre. Ruberurenyre.

10 ÿju tamy rarybere: —Brebuõmyrenyke. Rybe wihikÿ-di adee rehemynyre. Ibutumy iny reysakre ka rybe-di.

11 Atarasadu heka ratohouãnyra Davi hãwã-ki, abiu-ò hedu wahe. Tii heka Kristu rare, Inynyryÿreny wahe.

12 Kaiboho heka awaru roxinaõ-ò inihe bòike itxeremy. Tai heka tohouã roireri tyy-di rarahananymy.

13 Iule tahe sõwemy ÿju widotyde Deuxu dee rawiunykremy, kiawese rawiunyrenyre riwowydynyrenymy:

14 —Biu-ki Deuxu loosòna ratxihyymyhÿre.

15 Tahe ÿju ròserenyre biu-ò. Budoeni-di itxeredu mahãdu widee raryberenyre. Wylemy Belẽ-ò ròkòirenykre itxeremy kia aõmydÿÿnanamy Deuxu inydee riteòsinyrerìò.

16 Tahe roirenyre idi tahe Marie, Jyje-txi rekoarenyre. Tuu robirenyre. Tahe broreni dòròtòhòhyna-ki uladu roire.

17 Tai tahe budoeni-di itxeredu mahādu timybo ŷju tamy raryberamy, rarybere.

18 Tai tahe ibutumy kia tamy roholaré ribedeòtiinymy rỹire.

19 Marie heka tōhōti itxi reare. Tahe sōwemy raraykywydynanymy ronyre.

20 Budoeni-di itxeredu mahādu ròðserenyre rawiunyrenymy Deuxu-ò Deuxumy reàlàre ibutu òraru-ki. Iwese ŷju raryberewesetyhyle heka ibutumy rỹire.

21 Iribi tahe txu rỹireu tahe rare Jesuisi notyky orokré. Debò inataõ reurotxu rỹireu Jesuisi notyky raorokremy raywire. Tahe rininirenyre Jesuisimy iwese ŷju rarybere myna.

22 Xiwena rỹikemy bede rỹire Moisesi bede ywidỹnamyna. Aõutxumy tahe dehemynyde Marie Jyje-wana kia idi riwinyrenykemy. Tahe Jyje ridykemy Jerusalē-ò idi ratxireri. Tai uladu-di roirenyre Deuxu-ò riteòsinykemy.

23 Kiamy heka Inynyrỹ Ritidỹna-ki roire.

Weryrykeki, Deuxu dee rawahidỹkre. Tii uladudelaa weryrykreki.

24 Iwese tule bòtòe inatximy rawahidỹkre ada bòtòerurà inatxi heka xiwenamy reakre Moisesi bede ywidỹna myna.

25 Hābuõ tai ratximyhỹre Simeaõ inire. Jerusalē hāwādu wahe. Deuxu rityhynymyhỹre hābuwi rare. Tii Kristu riraòmyhỹre Deuxu deòdỹna

wahe. Ijoi aõbina bina-ribi tarasadumy Deuxu Tyytybytyhy heka tai ratximyhÿre.

²⁶ Deuxu Tyytyby ihetxiu tamy rarybere: –Kai buruõtyhy Deuxu deõdÿÿnamy bobiõdi.

²⁷ Iu Jesusise tyby-wana rehemynyreu Deuxu Tyytybytyhy heka Simeaõ riteõnyre kowa-ò.

²⁸ Simeaõ uladu taãxiò-ki rimyreu. Tahe Deuxu riwowydynyre:

²⁹⁻³¹ –Kiamy heka Wanyrÿ Iòlò arybe retyhynyre timybo tarybete wahe. Ibutumy dorihe tewinyta. Tahe aõwaxinyhe arurukre. Abiuõhenamy heka rabira. Tii ibutu iny tarasadumy rarekre biu-ò hena wahidÿÿdu wahe.

³² Kia heka ibutumy iny-ò loosõna tewahinyta judeukõdu mahãdu-ò. Tai judeu mahãdu tahe wowodynamy tii rarekre.

³³ Tai tahe Jyje Marie-wana bede riõtiniyre aõmybo rarybereki.

³⁴ Simeaõ tahe Deuxu deysanamy tamyreny rarybere: –Deuxu biu-ò henamy heka kia uladu rare. Sõwemy judeu mahãdu tarasadumy rarekre, tule sõwemy tasÿ ituekre. Kia heka Deuxu deõsina rare. Sõwemy heka Jesusimy rakyararybenynykre.

³⁵ Ibutumy iny rayky-ribi heka ibutumy ritÿnynykre. Bederyry sõwemy bieryke tai aõhõkÿmy botÿÿnykre.

³⁶ Tule Deuxu rybe erydÿÿnaõ rehemynyre. Ana inire. Hãwyy rare. Tii heka Fanueli riõre rare. Asere mahãdusÿõ rare. Tii heka rasenadunymy raremyhÿ. Ijadõmamy raremyhÿu heka roire hãbu-wana. Debò inatxi reurò beõralemy heka tii-wana raremyhÿ tahe tii rawytesenyre.

³⁷ Tii 84 beòramy heka bede idi rÿire wytesemy. Tii Deuxu dohodÿÿna heto-ribi ròhònyòhyymyhÿre. Tii heka rexitòenymyhÿre rummy txumy tabyreõ-di.

³⁸ Tahe tii rehemynyre Deuxu dohodÿÿna heto-ò. Deuxumy reàlàre. Idi Jesusimy imahãdu-ò rarybere tii tarasadumy rarekremy.

³⁹ Iu Marie, Jyje-wana ibutumy bede ywidÿÿnamy ituereu, riòòserenyre tahãwã-ò Nazare-ò.

⁴⁰ Jesusi raumynymyhÿre beòra beòramy. Iruru, ibede eryna sòwemy ijòdire Deuxu dori idi tarukimyhÿre.

⁴¹ Pascoa worana bedehesi riòlòdÿÿnyre Jerusalẽ hãwã-ki. Jesusi tyby heka iseboho roihyymyhÿrenyre tamy.

⁴² Tule Jesusi waòinatxi reurò beòra-di ridyrenyre tamy.

⁴³ Worana bedehesi rexihureu kidiòkesedenykremy doide. Tahe Jesusi naride Jerusalẽkihikÿle. Tiiboho rieryrenyòhyyre naridemy.

⁴⁴⁻⁴⁶ Taijoirenywanale ratxirerilemy idi ròhòtynyrenyra. Txusohojimy heka bede idi rÿidi, rierenyre. Tai rahaòhyyrenyra iijesemy diòkesedenyde Jerusalẽ-ò ixyby. Inataõ txu-di tahe tai nahadenyde, Deuxu dohodÿÿna hetowo-ki wahe. Tii heka bede erydÿÿdu mahãdu-wana ronyre. Roholamyhÿrenyre irybe-ò ronymyhÿreny. Tule rÿÿraximyhÿrenyre.

⁴⁷ Tii heka ibutumy rirawyònymyhÿre. Tii dori bede ery nihikÿ rare.

⁴⁸ Iseboho tahe bede riòtiinyrenyre tai ronyreki wahe. Ise tamy rarybere: –Waritxòre, anoherek-

ibo kai ikykyreny-ki tanyte. Anoherekibo tuu wadekereny tewinyteri aijesereny-di watzireri.

⁴⁹ Tahe Jesuisi rirawyònyre: — Waijesereny-kõmyke. Waha heto-ki watzireri, Waha aõmysÿdÿÿnamy reywinyhyy watzireri. Kia aõbo teeryõhyytenyte.

⁵⁰ Tiiboho rierenyõhyyre aõmybo Jesuisi rarybereri.

⁵¹ Idi tahe dòòsedenyde Nazare-ò. Tahe Jesuisi tyby rybe rityhynyhyymy raremyhÿ. Tahe Jesusise kia ibutumy riyrubunyhyymy raremyhÿ tarayky-ki.

⁵² Jesuisi tahe raumynyre. Bede erytyhymy relere. Ibutumy he iny iluure. Deuxu wowydyna-di ihÿre.

3

¹ Tiberiò heka waiyre beòramy iòlòmny raremyhÿ. Poncio Pilato heka Judeia bede dinodu. Ijõ heka Herodi inire. Inataõ inymy heka bede dinodumy raremy. Herodi heka Kalileia bede dinodu. Iseriòre, Filipi tahe Itureia bede, Traconite bede-wana dinodu rare. Ijõ iny tahe Lisÿnia inire. Tii Abileni bede dinodu rare.

² Anasi, Kaifa-wana heka inatxi hãbu roire. Tiiboho wiwana xiwena wahidÿÿdu wedu raremyhÿ. Kia bedeu heka Joaõ rehemynyre bedero-txi. Tii iny-ò Deuxu rybe tÿnydÿÿdu rare. Zacaria riòre rare.

³ Tii kia bede ibutumy rybe ritÿnynyre, Jordaõ beroweramy ibutumy wahe. Kia wesemy rarybere: —Aòraru-ribi bòhònyke. Maratisebenyke. Tahe Deuxu aòraru riixãwididÿÿnykre.

⁴ Iwese Isaia ròritidÿÿre wesemy heka wiji rÿire.

Inyõ heka ryrymyhỹ bedero-ki.

Kia:

—Inynyrỹry bexiywinybenyke. Ryòbitihikỹ biwinybenyke. Hãloo bitỹxinybenyke wimyny biijaranybenyke. Iry iõweõwena ramyhỹre heka, biòbitinybenyke.

⁵ Iratòratòkeki, wimyna biijaranybenyke.

⁶ Ibutumy iny heka Deuxu biu-ò henamy robirenykre.

⁷ Sõwemy iny nade riratisebenykremy Joaõ-ò. Tahe tii tamyreny rarybere:

—Kaiboho hemylalaweselemy toite. Deuxu ykarana-ribi bexitabenyke, aõwiihikỹ.

⁸ Uritere kawese ryberenyõmykre: —Abraõ dori iny labiereny rare. Tai tahe ibutumy awityhy rare inydeereny.

Jiarỹ dori adeereny ararybekre: —Deuxudeewikeki, Tii kia manadile iny riwinyke. Abraõ dee ijõ riõreõmy kia manadile riwinyke.

⁹ Woma heka òwòruraruti riòròmỹhỹre. Kia raratynyõkeki heka, raòròkre. Heòty-di wòmỹ ririradỹỹnymyhỹke.

¹⁰ Tai tahe iny rỹỹraxire Joaõ-ò: —Timybohe rakatxirenykre.

¹¹ Tai tahe rarybere: —Inyõ tõre inatximy ijõdikeki, sohoji iny ijõ-ò riwahinyke. Irỹsỹnadikeki, tule ritxuatxuaque ijõkõ mahãdu-ò.

¹² Iny wixiraõ Joaõ-ò rehemynyre. Tiiboho nieru tarasadu mahãdu rare bedede dinodu-ò. Tai rỹỹraxirenyre: —Timybo aõhebo rokotỹỹnyrenykre.

¹³ Joaõ rirawyònyre: —Uritere aõnihikỹmy itarasarenyõmykre. Bede ywidỹỹna tyyriti myna ta tuukre.

14 Tai tahe soldado tamy rÿÿraxire: –Inyboho tahe aõhebo rokotÿÿnyrenykre. Joaõ rirawyõnyre: –Inyõ biteranyõtyhy adee nieru kanakemy. Inieru dori ahõrõ aõkõ rare. Beysake, adinodu-ribi tiwesebo nieru tetamahãte-di.

15 Tahe kia iny mahãdu raraykynyre Joaõ-di. Kowa aõbo hãbu Kristu ihÿre.

16 Tai heka Joaõ rarybere: –Jiarÿ heka bedi araratisebenyreri. Ijõ wahewo-ribi kanakre tahe woratyre inihikÿ rarekre. Tii heka awityhy rare. Jiarÿ heka raixÿruwãhãre iwataana aritake lau. Tii heka akanaratisebenykre Deuxu Tyytybytyhy-di. Heòty-di tule wahe.

17 Iti tebò-ki ratxireri. Maixõmo ruxity hitxina-di wahe. Tii heka ritakre. Maixõmo riyrubunykre ihyna-ò. Iruixityy tahe ritoonykre. Kia heòty heka tiu ruriõtyhy.

18 Aõ heka Joaõ rarybere. Sõwemy aõna aõnamy iwesele rarekemy. Dohodÿÿna wihikÿ-di tamyreny rarybera.

19 Bede dinodu Herodi heka taseriòre riòrese-wana roire. Aõbina binahakÿle riwinyre kia. Tai tahe Joaõ tamy rarybere: –Kia awi aõkõ rare. Ibina heka rare. Sõwemy aõna aõna bina tule tii riwinyre.

20 Tai Herodi heka Joaõ mynymy riteranyre ròtenawo-ki roikemy.

21 Joaõ ixiwesehyyle rexitÿmyranymy iny rira-tisebenyre. Tahe tule iny witxirahe-ki Jesuisi riratisebenyre, Jesuisi rexitòenyreu, biuwetyhy rarayre.

22 Biuwetyky-ribi tahe Deuxu Tyytybytyhytle dobehemy nade bõtòerurà wesemy. Biu-ribi rybeõ-ò iny roholare: –Kai heka Wariòre tate.

Aluure heka jiarỹ wadeysatyhyre.

²³ Jesuisi 30 beòramy raremy taaõmysỹdỹỹna tyhy ritelenyreu, iny heka Jyje riòrelemy rōhōtinymyhỹre.

²⁴ Jyje heka Eli riòre rare. Matate, Levi, Maki, Janai, Jyje, ibutumy labiehekỹ Jyje rare.

²⁵ Ijõ tahe Matatias, Amos, Naum, Esli, Nagai,

²⁶ Maate, Matatias, Semei, Jyje, Joda,

²⁷ Joana, Resa, Zorobabe, Salatieli, Neri,

²⁸ Meki, Adi, Cosã, Elmadaõ, Er,

²⁹ Josue, Eliézer, Jorim, Matate, Levi,

³⁰ Simeaõ, Juda, Jyje, Jona, Eliaki,

³¹ Melea, Mena, Matata, Natã, Davi,

³² Ijese, Obede, Boasi, Sala, Nasaõ.

³³ Aminadabe, Adimim, Arini, Esraõ, Peresi, Juda.

³⁴ Ijaò, Ijai, Abraõ, Tera, Nakò,

³⁵ Serui, Raau, Faleki, Eber, Sala,

³⁶ Aina, Arfaxade, Sem, Noe, Lamei,

³⁷ Metusalẽ, Enoi, Jarete, Maleleel, Aina,

³⁸ Enosi, Sete, Adaõ. Tii tahe Deuxu juhUU ri-winyre iriòre wese.

4

¹ Bero Jordaõ-ribi Deuxu Tyytybytyhy heka Jesuisi diòõsedỹỹnyde Tai heka tule bederò-ò rexiykynyra.

² Tahe Satanasi Jesuisi riurihire, 40 txu-di wahe. Aõ heka rirỹsỹõhyyre Jesuisi kia itxumy txu rỹireu wahe. Idi tahe sōwemy rama risare.

³ Satanasi tamy rarybere: –Kai Deuxu Riòretyhy tate-wana heka, mana bitxienykre hinamy.

⁴ Tai Jesuisi dirawyònyde: –Deuxu Rybe tule kiamy rarybere.

—Hābu hewa byre sohojiribile aōkō irumy rỹimyhỹre.

⁵ Tai Satanasi heka Jesuisi ridyre heto ratyti tyre. Ibutumy hāwāhākỹ riteòsinyre bedede rỹirá.

⁶ Tahe Jesuisi-ò rarybere: —Kai biwalàhànananykeki, ibutumy aōna aōna adee ariwahinykre, ibutumy hāwāhākỹ dinodumy tule wahe.

⁷ Wahōrō heka rare. Inyō-ò aōtxile ariwahinykre.

⁸ Idi tahe Jesuisi dirawyònyde: —Deuxu-ò sohojile walàhàna biwahinykre. Kiamy Deuxu Rybe rarybere.

⁹ Idi Satanasi Jesuisi ridyre Jerusalē hāwā-ò. Biu-txi tahe rỹire, Deuxu dohodỹỹna heto tyre-ki wahe. Tii narybede, kai Deuxu Riòre tyhy tate wana heka bexiwatixinyke inihe karibi het-oratyti-ribi.

¹⁰ Ŷju riki arayrubunykre wa. Deuxu taỹjuō bedede riywinyre aramykemy.

¹¹ Tule kia rarybemyhỹre Deuxu Rybe.

Awa riki manaō riwotōmonyōtyhy.

¹² Tahe Jesuisi dirawyònyde: —Tule Deuxu Rybe rarybere: —Inyō heka Deuxu uri urihixiōtyhy.

¹³ Rexihure tahe Jesuisi urihixina. Tahe Satanasi heka Jesuisi ririre.

¹⁴ Idi tahe Jesuisi ròsere Kalileia bede-ó. Deuxu Tytybytyhy ruru tahe tii-wana ratximyhỹre. Ibutumy heka kia hāwā-ki ibededỹỹnana rierumy hỹreny.

¹⁵ Jesuisi heka dohodỹỹna heto-ki ròbedeerydỹỹmyhỹre. Ibutumy tuu rarybere. Tuu reàlāmy rarybemy rỹimyhỹ.

¹⁶ Iribi tahe Jesuisi ròsere tai raumynyréò, Nazare

hãwã-ò. Sabado txuu tahe dohodỹỹna heto-ò reamy raremy iwesehyyle. Tii tahe lamamy rỹire tyyriti-di rariakremy.

¹⁷ Tahe tamy Isaia tyyriti riwahinyreò. Tahe Jesuisi riijemyhỹre rybeõ idi rariakemy. Tai idi rariare:

¹⁸ –Wanyrỹ Tyytybytyhy waki ratxireri. Rybe Tỹmyra wihikỹ inyko arotohodỹỹkremy. Iny aõkõ mahãdu-ò rybe wihikỹ ararybekemy riwatare. Tule iny ròtena-ki rỹira mahãdu, jiarỹ ariòlòdỹỹnykemy. Kiamy heka tamyreny ararybekre. Tule ruetỹmyra ariwahinykre ruetà mahãdu-ò. Iny idi rarỹỹnymyhỹre mahãdu-ribi, aritakre idi risinymyhỹreki. (Aõna aõnamy risỹnyrenymyhỹreki wahe.)

¹⁹ Tibedeubo Inynyrỹreny taijoi ritakremy ararybekre.

²⁰ Idi tasỹ ixyby riwerasenyre. Tahe riwahinyre ixyby kia hãbu riyrubunymyhỹreò. Tii ronyre. Ibutumy kia dohodỹỹna mahãdu idi retehemy rỹimyhỹre.

²¹ Tahe Jesuisi ritelenymy rarybera: –Wiji idi rariará heka aõbo tamy ibededỹỹnanamy roire. Kia aõbo ritidỹỹna-ki roireri ihetxiu. Kaimy tahe wiji rarybereri, jiarỹ heka tii rare. Tii adeereny tyyriti rariará wahe.

²² Tai tahe bede riòtiinyreny. Kia tahe aõmybo raryberakí. Tahe widee raryberenyre. Kaa heka Jyje riòrele ratxireri.

²³ Tahe Jesuisi ixityre tamyreny rarybere: –Aõu kaiboho wamy tarybetenyteri rybeõmy, myỹ manarybeke: Kai bexideytenyke, hàri, òhotibedu. Ki-

amy aõbohe wadee manarybebenykemy atxitenyteri:

Iwese Kafanaõ bedeki tewinyte wese ariwinyrenykemy wadi atxitenyteri, ahãwã-ki.

²⁴ Adeereny inihe tuu ararybekre. Rybe tỹnydỹỹdu heka õmo rityhynyõtyhy ihãwãreny-ki.

²⁵⁻²⁶ Tahe iwixiramy ararybekre. Ibedeu kia raremyhỹu, sõwemy heka rama reamy raremyhỹ judeu sỹ mahãdu. Sõwemy wytese mahãdu heka ramamy rurumyhỹre. Biu heka roaõhykyre tai inataõ beõra weeremyhỹ wahe Sareta hãwã heka Sidõ bedeki tii rasỹnymyhỹre. Tahe Deuxu bedeki riywinyre Eliasi rakemy iny sohoji wytese-ò, rỹsỹna riwahinykelemy wahe.

²⁷ Eliseu bedeu heka sõwemy tyybinadu rỹimyhỹ. Sohoji inyle riteytenyrene. Naamy heka inire. Tii heka Siria bedeki luduõ rare.

²⁸ Kia dohodỹỹna mahãdu heka ibutumy iu tamy rakyarananyrene.

²⁹ Rimyrenyrene heka Jesuisi. Idi retỹhirenyrene hãwãlò ratya-ò ridyrenyrene. Idi rehurenkyemy riwisyrenyrene.

³⁰ Tahe Jesuisi inysõwehekỹy-txi ralore. Idi rahenyrene.

³¹ Iribi tahe Jesuisi rare Kafanaõ-ò, Kalileia bedeki-ò. Sabado txuõ txuõlemy heka Jesuisi iny ribedeerynymyhỹre.

³² Sõwemy heka iny ribedeerynymyhỹre mahãdu tamy awimy rỹira, irybe dori awireki wahe.

³³ Hãbuõ raremyhỹ dohodỹỹna hetowo-ki tyytybybinahakỹ-di tahe taumywo-ki ratximyhỹ. Tai tahe tii ryryrene:

34 —Jesuisi, Nazareludu, aõhebohe ijoi bisỹnykremy atxiteri? Biwahubenykre aõbo? Jiarỹ heka araeryre mobo taté. Kai heka Deuxu deòdu atxiteri.

35 Tai tahe Jesuisi tamy rarybere tyytybybina iumywo-ki riyrykemy. Iribi riòlòdỹnyre. Tahe idi rehure iutyde-ò idi iribi ròhònyre. Hãbu aõhe risỹnyõhyyre.

36 Ibutumy heka iny ribedeòtiidỹnyre. Iny sohoji sohoji widee rarybere: —Aõrybemy aõwe tii rarybereri? Timybo iny-ribi tyytybybina riteònyke.

37 Ibutumy timybo Jesuisi riwinyre, ijyynamy reare.

38 Tahe Jesuisi ròhònyre Simaõ heto-ò idi rare. Simaõ riòrelahi webinadumy roire rubuna-di. Tai Jesuisi-ko tuu relyyrenyre.

39 Tai Jesuisi ibireweribi-ò rare. Tahe irubuna iribi riòlòdỹnyre. Tahe tii ritamadỹnyre. Rỹsỹnaõ tamy riwahinyre.

40 Ibutumy iny tawebinadu mahãdu didydenyde. Ibutumy Jesuisi riteytenyre tibò iratityre rilidimyhỹre. Sõwemy iny tyytybybina-di rỹireri mahãdu riòlòdỹnyre.

41 Iu tahe ryrymy reamy rỹimyhỹ: —Kai Deuxu Riòretyhy Tate. Tii Jesuisi rierymyhỹ tii Deuxu deòdu raremy, tyytybybina wahe. Tai Jesuisi tamy rarybere rybeõkemy.

42 Txu ijiramy Jesuisi rare bedero-txi ixisohojile. Iny sõwemy riijemyhỹ. Itxi rearenyreu, iatysy deramy rekoamyhỹreny.

43 Tai Jesuisi rarybere tamyreny: —Jiarỹ heka Rybewihikỹ Tỹmyra arelyykre iwitxira hãwã Deuxu Òlòna Tỹmyramy arelyykre. Tuu Deuxu diwa-

teònyde.

⁴⁴ Jesuisi ibutumy Judeia mahādu bede bedemy dohodỹna rỹiraki rotohodỹmyhỹre.

5

¹ Jesuisi tahe aho ijà-ki rỹire Kenesare aho ijà-ki. Iny heka sōwemy Deuxu rybe-ò roholakemy iu rỹimyhỹ.

² Tii robire hāwòõ inatximy roinyimyhỹre. Waxidumy mahādu heka rirahure rià-di risuhòreri.

³ Idi tahe rimyre hāwòõ. Simaõ hāwò heka rare. Tii tahe ixi-di ritaranyre beroro-ò. Tai tahe tii rexidelenymy relyyre. Kia iny rỹimyhỹ mahādu heka ribedeerynymy relyymyhỹre.

⁴ Rexihure rybe-ribi. Idi tahe Simaõ-ò rarybere: —Make wa bera-txi. Rià bitidike. Bimykemy utura.

⁵ Tahe Simaõ rirawyònyre: —Wanyrỹ, ruu wa wadireny aõkõhykylemy bedewadireny rareri, uturamy ho aõkõ. Tarybete urenana anakre. Aritidikre heka rià.

⁶ Tahe ritidireu tahe, rià utura sōwemy rimyre, kia rautxienyre. Tule riykamyhỹ rià.

⁷ Talawò biòwa mahādu-ò rryyre: — Bòdòibedenyke bidiwawiòhenanybenykemy. Inatxi hāwò heka rỹxire. Ritỹxinyre utura-di. Ihy berahatxi-ò ijiramy riwisỹnymyhỹ ilawòreny.

⁸ Simaõ tuu robire. Tii Jesuisi ratximyhỹre tahe tatiowomy resere Jesusiko-txi. Simaõ Pedro rarybere: —Wanyrỹ, aribi kỹny iòhòmý arỹiòtyhy. Jiarỹ heka waòrarudimy rare.

⁹ Simaõboho bede riòtiinymy rabedewore aõma utura sõwemy tamyreny riwahinyraki wahe. Tii tuu iximy rarybere.

¹⁰ Ibutumy tiiboho mahãdu ribedeòtiidỹnyreny Zebedeu riòre kia Txiau, Joaõ-wana. Jesuisi rarybere Simaõ-ò: — Brebuõmyke heka ikonana-ò heka utura bimyoõkre. Wadee dori maaõmysỹdỹnykre hãbu wadee bimykremy. Tamyreny biwatỹnynykre. Iwese utura temymyhỹte wese, wadee hãbu wiji bimykre waerydỹna mahãdumy rarekremy.

¹¹ Tahe waxidumy mahãdu ibutumy kaa tawaxi tarià iu ririra Jesuisi riheludunykremy.

¹² Rõirenyre rirõnyrenyre ibutumy hãwã-ò. Idi tahe hãbuõ rare ityyjyhykyle. Hãbu Jesuisi ro-bireu tahe resere iko-txi, rexitõenyre: —Wanyrỹ, adeewikeki biwatetynykre.

¹³ Jesuisi tamy tebò ritetemy rarybere: —Kohe, arateytenykre. Tii reytemy reare.

¹⁴ Tai Jesuisi rarybere tamy: —Inyõ-ò tahe ijyyõmykre. Xiwena wahidỹdu mahãdu-ò make. Tai maxiwekre tuu Moisesi bede riywinyre myna. Xiwenaõ heka biwinymy biwahinykre. Moisesi rarybere wese wahe. Iny mahãdu-ò heka biteòsinykre. Kia riteòsinykre teytetamy.

¹⁵ Tahe ihãrele Jesuisi ibutumy rieryre. Sõwemy iny heka wirotyre raholakremy. Ijõ nade aõma iwebinaduna ibina-ribi riteyteuykemy.

¹⁶ Tahe Jesuisi iribireny aõma rexitõenykremy rexitare.

¹⁷ Ijõ txuu ròbedeerydỹmyhỹu, fariseu mahãdu, bede ywina rybe bede erydỹduõ-wana ronymyhỹreny. Ibutu hãwã hãwã-ribi dotydenyde

wese tahe sōwenyire, Kalileia bede-ribi Judeia bede-ribi, Jerusalē hāwā-ribi. Deuxu deytena Jesuisi-ki ratximyhỹ. Jesuisi hāwālò-ribi dobehede tii-wana, taerydỹỹna mahādu-wana wahe. Tahe sōwemy iny iube-ki ributunymy ronymyhỹre.

¹⁸ Iny mahāduō heka hābu iumymy manadu kididydenykemy ratxireri Jesusiko-ò ritidirenykemy. Idi tahe hābu webinadu wahe Jesuisi-ò rakemy bede riywinyre. Inatyhyle riatyhynyre.

¹⁹ Inysōwereki tahe tamy rehemynyrenyōtyhy. Tai tahe hetoratyti-ò raòwònyre hābu webinadu-dì. Iribi tahe diberesedỹỹnyde reroti-dì.

²⁰ Jesuisi robire, rieryre aōma rityhynymy ratxirenryeri. Hābu-ò Jesuisi rarybere: —Wy, aòraru heka raixāwidỹỹnyra.

²¹ Tahe fariseu mahādu he widee raryberenyre: —Mobo kia hābu ratxireri, timyhe tu kia irybeōna rybe-di. Deuxu-ò kia rybe ibinatyhy rare. Deuxu sohojile òraru-ribi iny riixāwididỹỹnymyhỹre.

²² Tahe Jesuisi rierymyhỹ timybo rexi-nohōtinymyhỹreny. Tai rarybere: —Aōherekibo kia wesemy texiraykynytenyteri.

²³ Tibohe irutaōre webinadu-ò rybe: —Aòraruna reixāwididỹỹnyra ada myimy mariake aōbo.

²⁴ Deuxu Riòre Hābutyhyhykỹ jiarỹ rare. Tai waruruna wadee Deuxu Riòre òraruna ixāwididỹỹnamy. Katahe bierybenykre inatyhymy aōbo rarybereri: —Myike, abyre biwymy asỹ-ò ta mahe.

²⁵ Hābu tabyre rimymy tahe aōwesele tasỹ-ò rare. Deuxu riwowydynymy rare.

²⁶ Sõwemy iny ribedeòtiidỹnyrenyre. Riwowydynymy rỹimyhỹ. Tiiboho raryberenyre: — Aõwitxiramy wiji inyboho robirenyra. Tiu juhuu tukõre-ribi wahe robirenyra.

²⁷ Iribi tahe nieru bede dinodu nieru mynydumy robire, Levi heka inire. Tii heka raaõmysỹdỹnymyhỹ titxibo nieru tarasana-ki. Jesuisi tamy rarybere: —Manakehe wawana.

²⁸ Tahe taaõna ibutumy ririre, idi ihemy rare.

²⁹ Levi tahe taheto-ki roxinaõ riòlòdỹnyre Jesuisi dee. Tamy rehemynyre nieru arisidu mahãdu, tule fariseu mahãdu. Ibutumy iny iarixina mahãdu.

³⁰ Kia fariseu mahãdu kia bederydỹdumy mahãdu tyritirybedỹdu mahãdu kie heka aõbina binahylemy rarybereri Jesuisimy. Jesuisi terydỹna mahãdu-wana kiamy rarybereny: —Aõherekibo kaiboho teroxitenyteri, nieru arixidu-wana, iòrarudu sõwe mahãdu-wana.

³¹ Jesuisi rirawyõnyre: —Iny awimy ratxireri-wana, òhotibedumy reaõmyhỹre. Webinadu mahãdule ta tuu reamyhỹre.

³² Òbiti mahãdu-ò aõkõ heka jiarỹ anade rybemy. Tiibohole heka ixi-txi tõhõti reakemy idi watzireri.

³³ Tahe tiiboho Jesuisi-ò rarybere: —Joaõ heludu mahãdu roxiõmy txumy rỹire. Tule tiiboho rexitòenyrenyre. Sõwemy rexitòenymyhỹre fariseu mahãdu erydỹna tule. Tahe aijoi tahe riroximyhỹrenyre riõmyhỹrenyre.

³⁴⁻³⁵ Tahe Jesuisi tamy rarybere: —Hãwyymy heridu tỹmyra ijoi ratxikeki heka tiu itobidỹnana mahãdu wahe. Kia heka riroximyhỹke. Kia tahe

tỹmyra iribireny ratakreu, iijoi mahãdu renarehekre.

³⁶ Tyky tỹmyraõ tiu tykytyby dòbònamy iny ritidiõtyhy. Timyki dori wii wiòbydỹõna.

³⁷ Vĩ tỹmyra heka tiu aõiròdu tyky watxiwe yla tyby-ò rarareõmyhỹre, tukeki ta kia raykakre idi vĩ urile rejujukre.

³⁸ Vĩ tỹmyra heka hyna tỹmyra-ò rararemyhỹke.

³⁹ Inyõ vĩ tybyhykỹ riõkeki, itỹmyra rexitòenyõtyhy. Kiamyki rybe. Vĩ tyby dori itỹmyra-ribi awi rare.

6

¹ Judeu elehydỹỹnymyhỹreny txu kia idi rekoarenyre maixõmoho-di. Ierydỹỹna mahãdu rimyra maixõmo, maixõmo, debò-di riroxitytxiwimyhỹ riymy idi rare.

² Fariseu mahãdu tuu robire. Tamy rỹỹraxire: —Aõherekibo kia wese tewinyteri. Kiamy heka iwidỹỹõmyke bede ywina rybe rarybemyhỹre judeu elehydỹỹnymyhỹrenytxumy.

³⁻⁴ Jesuisi tamyreny rarybere: —Ihetxiu Davi tamahãdu-wany rama risareu, Deuxu dohodỹỹna hetowo-ò rirònyre. Tai Davi xiwena rỹsỹnale taijoi-wana rirỹsỹre. Xiwena wahidỹỹdule heka irỹsỹdure, inywitxira ta aõkõ.

⁵ Jesuisi ritỹnynyre tamy: —Hãbutyhyhykỹ jiarỹ rare, Deuxu Riòre wahe. Kiata sabado wedu jiarỹ rare, elehydỹỹnymyhỹrenytxu wedu wahe.

⁶ Ixityre ralore dohodỹỹna mahãdu heto-ò ròbedeerydỹỹkemy. Hãbuõ tai rare tebò rabinamy.

⁷ Tahe fariseu mahãdu Jesuisi-ò retehere. Riteyteynykemy kia hãbu webinadu judeu

elehydÿÿnymyhÿrenytxu. Rexiwodohonanyre. Kiatxuu tii riwinyrekeki tahe ribinanyke judeu elehydÿÿnymyhÿrenytxu, riwinykeki wahe.

⁸ Jesuisi rierymyhÿre aõmybo tiiboho raraykynyrenyleri. Jesuisi tamy ryryre, –Aõma hãbu debòbina-ò: –Mynyike ini, ityareny-txi.

⁹ Tahe fariseu mahãdu-ò Jesuisi rarybere: – Arÿÿraxikre inihe adeereny, awire adee ka hãbu debò ariteytenyke sabado txuu. Aõbo adeereny awire sabadotxu widÿÿ. Aõwihikÿwidÿÿmy aõbo ada aõbina widÿÿmy. Rubu-ò wahidÿÿ aõbo ada rubu-ribi itarasa aõbo.

¹⁰ Retehere! Ibutu-ò idi hãbu-ò rarybere: –Ebò inihe biditeòsinyke. Tiu hãbu tebò riteòsinyreu tahe, reytere.

¹¹ Reburerenyre heka. Timybo Jesuisi risÿnyrenykemy rexinohõtinyreny.

¹² Idi tahe Jesuisi heka hãwãlòratyy-ò rare ix-itòedÿÿmy Deuxu-ò. Rureherehemy heka tamy rexitòenymy bedede idi rÿire.

¹³ Txuijaramy tahe ludu mahãdu-ribi waðinatxi reurò taheludutyhy mahãdu ritare. Tarybemy rybedumy rininirenyre.

¹⁴ Sohoji ijõ heka, Simaõ inire, Pedromy idi ranire, ijõ tahe Andre rare, iseriòre. Idi Txiau, Joaõ, Filipi, Bartolomeu.

¹⁵ Mateu, Tome, Tadeu Txiau, (Kia Txiau heka Afeu riòre rare.) Ijõ Simaõ Kana bedeluduõ rare, tasubedeluudure.

¹⁶ Juda Txiau riòre, ijõ Juda Isariò tahe Jesuisi tyhedÿÿdu rare.

¹⁷⁻¹⁸ Jesuisi dobehede bedero-ò hãwãlò-ribi. Tahe sõwemy iny iheludu mahãdu tii-wana

rỹimyhỹ. Judeia bede mahãdu Jerusalẽ hãwã mahãdu. Tule Kalileia bede, Tiro hãwã, Sidõ hãwã mahãdu. Tiiboho wii ributunymy hãwã mahãdu Jesuisi-ò roholakemy idi reytekemy. Kia tai rôteytedỹmyhỹ.

¹⁹ Ibutumy Jesuisi tyky-ò tamy adereximy risỹnymyhỹre adeytena iribi ròhònymyhỹ.

²⁰ Tamyreny retehere tai ibutumy rierynanyrenyre: –Kaiboho aõkõrenyre-ki, beysebenyke. Deuxu Òlõna dori ahõrõreny rare.

²¹ Rama arasareri-wana beysabenyke. Bi-hydymy dori mabekre. Tule tahinyteri wana beysakre ihewo-ribi.

²²⁻²³ Beysamy butxuenykre, inyõ umy radònykeki tule. Kaiboho dori Deuxu Riõre tetyhynytenyete jiarỹ tiire, Hãbutyhyhykỹ Riõre wahe. Kia mahãdu eramy ijira Riõre rỹikeki beysake. Beysa tyhyki tai. Biu-ki dori aõwiwihikỹ bitakre. Deuxu rybemy rybedu mahãdu tule rotỹnyrenyre iõraru-ki.

²⁴ Kobe làhàxe kaiboho ityhy mahãdu abedesanareny dorihe rexihura.

²⁵ Kobe làhàxe ahàdyreny mahãdu, aramasanareny dori rehemynyre. Kobe làhàxe abedesareny, ahinanareny dori abrunareny rehemynyre.

²⁶ Kobe làhàxe atyhydỹỹ sõwereny tule dori. Ilabiereny rybemy rybedutyhy aõkõ rityhynyrenyre.

²⁷ Warybe-ò taholatenyteriki inihe ararybekre. Aòludu luumy atxibenyke amykyaradureny-di, awimy idi mabeke.

28 Ibinamy aõma umy rarybekeki aõbinahakỹ riwinykeki, tamy bexitòenykre Deuxu-ò.

29 Aòsỹny-ribi anahatenykeki iyre-ribi iwyòdỹmy tamy bexirahòreke. Inyõ atyky riwykeki tule tamy arahana biwahinyke.

30 Iwese aõtxiu aõna inyõ adee rexitòenykeki, tamy biwahinyke ixyby iribi iwydykõkemy.

31 Aõbina inyõ adee riwinykõkemy atximahãte. Iwese tiu kia aõhõkỹmy inyõ isỹdỹỹõmykre.

32 Kai aluu mahãdu sohojile iluuõmyke; òrarudu mahãdu dori tuu rỹimyhỹre.

33 Kai aery mahãduòle tawotòemahãte, timyki Deuxu-ribi aõ atarasaõna. Iny itxỹte iehehe mahãdu dori widee rawotòemyhỹre.

34-35 Òrarudu mahãdu heka widee rihuòtemyhỹre. Iribi tahe iwesele ixiby kidiwykemy idi riwisỹnymyhỹ. Kai ta buhuòtemyhỹke idi tehuòtete ixyby iraròsòkõmyke. Tukõkeki ta Deuxu-ribi aõ atarasaõna. Aòludu luummy atximahãbenyke. Tai Deuxu-ribi aõwiihikỹ bitakre. Tai Deuxu wihikỹ riòremy mabekre. Tii dori inywi-ò inybina-ò awire.

36 Awimy kaiboho boibeke, iwese boreny awimy biu-ki ratximyhỹre wese.

37 Inyõdee kyarakõmyke tai Deuxu adee rakyarananyheny. Inyõ taòraruna biixãwididỹnyõkeki, Deuxu tahe aòraruna riixãwididỹnyõkre.

38 Ainytyhyke inyõdee imyna Deuxu adee rainytyhynanyhykrey. Deuxu ibutumy aõwi adee riwahinykre. Tiwesebo tòwahite wesemyna idi Deuxu adee ròwahikre.

39 Aõmybo ribedeerynyre ijyyõmy relyyre: — Inyõ ruetà heka riwiòhenanyõtyhy iwitxira iny ruetà. Tukeki heka hãloo-txi wiwana resekre.

40 Ierysýdýÿ iòrysydýÿdu, kia ratyre aõkõ ratx-imyhÿ. Kia uladu ratyryritinyre nihikÿmy tahe erysydu tiu taerysydýÿdu ratyre ratxiõmyhÿre.

41-42 Òwòrukre nihikÿ aruety-ki roire. Aõherekibo aseriòre ruety-ribi òwòru rÿnysiõ tarasamy tewisÿnyteri. Kia heka itxenadýÿdu tate. Juhuu òwòrukre aruewo-ribi bitakre. Idi tahe betehemy iruewo-ribi aõsõmo bitakre.

43-44 Òwòru wihikÿ tiu bederaty binaõ riwahinyõhyymyhÿre. Tule òwòru binahakÿ bederatywiny raratynyõmyhÿre. Òwòru raerymyhÿre iraty-ò itxere rÿimyhÿreu, beraty-ò retehemy awire ada ibinare aõbo beraty-ò retehemy awire ada ibinare aõbo. Figoraty uvaraty tiu iwitxira òwòru-ribi raheõmyhÿre.

45 Hãbuwi heka aõwimy rotÿÿnymyhÿre iwo-ki tuu rÿimyhÿremyna. Tule hãbu bina aõbinamy rotÿÿnymyhÿ iwomy tuu rÿimyhÿremyna aõbina bina. Inyõ dori aõmy raraykymyhÿremyna rarybe-myhÿre.

46 Kai rarybere boholaõkeki aõbo bi-winykeki. Uritere wanidýÿõmy. Wanyrÿmy tiwaninimyhÿtenyte tahe warybemynamy atxõhyylemyhÿtenyte.

47 Tiwese hãbu warybe riywinyre wese adee ararybekre. Tiu heka ariteòsinykre.

48-49 Hãbuõmy akoreny arelyykre. Tii warybe-ò roholare idi imynany rotÿÿnyre. Tii kiata taheto riwinyre manadelemy ria-di. Beòra iheto re-

seõhyyre manatyre-ki relereki wahe. Ikõmyta warybe-ò roholakõre, kawese rotỹnyre. Taheto uritere sukile riwinyre. Beðrau ta, urile resere. Ikyhynakõreki wahe. Kiamyta rotỹnyre warybe tyhydỹdu-ò idi ityhydỹdukõ-ò.

7

¹ Jesuisi tarybe rahu-di tahe Kafanaõ hãwã-ò rare.

² Tai Roma soldado dinoduõ tai ihỹmyhỹ. Teòduõ tahe binamy irubu iòhòmý roimyhỹ.

³ Soldado dinodu Jesuisini-ò roholareu tahe, iòrysomy rarybere. Taita judeu mahãdu kia matuariõ rexitòenyre aõma kididykremy riteytenykremy kia webinadumy roireri.

⁴ Tahe Jesuisi nade juhu be kiamy Jesuisi rarybere: —Ka hãbu heka awi biwiòhenanykre heka.

⁵ Ka hãbu heka waijoi luu nihikỹ rare ihyymy ta dohodỹna hetoõ riwinyre waijoi-ò.

⁶⁻⁷ Tai tahe Jesuisi rare tiiboho-wana. Tehemyny sỹ iòhòmý rare. Idi tahe ryrowetyakile Jesuisi-wana wii riòbinyre. Aõma soldado dinodu kia biòwa-ò wahe. Rarybere he aõma soldado dinodu kiamy rarybereri: —Noõmy heka. Ihãrele teka awimy rareòle heka bedehe mynyke. Awi tate timy heka anaixiranyõtýhy dori raixỹruwỹhỹre alau adee ixitòedỹ-ò aõma dori adee rybe rỹikekile aõweseleke wadeòdu kia reytemy reake.

⁸ Jiarỹ dori inydee radỹdu jiarỹ rare. Aõbo riwinykemy. Kia riwinyre warybemynale kia heka jiarỹ rare. Wadeòdu-ò rarybewãhãraki heka: —Kia biwinybenyke. Riwinymyhỹrenyre. Kai tule

marybeke, beyteke. Tahe aõwese reytemy reake. Robedeòtiidỹnyre, kia tuu rarybereki wahe.

⁹ Jesuisi ròkesereri kia rarybemyhỹò wahe: — Jiarỹ ka tiu judeu mahãduy-ki. Hãbuõmy rabiõ watyhydỹnyamy. Rabireri riwatyhynyreri rabireri.

¹⁰ Soldado dinodu deòdu ròòkesereri. Ixyby reytereri idi ronyre.

¹¹ Jesuisi rare terydỹna mahãdu-di ijõ hãwã-ò. Naĩ hãwã-ò heka rare. Kiemy rahyymy heka rahyrye. Sõwemy iny iheki rare.

¹² Hãwã ijõ-ki rehemynyreu tahe kia ibutumyle rehemynyre. Sõwemy iny rubudu rareò wabede-ò. Weryrybõò rurure. Ise, wytese, heka iriõre sohojihyylere. Iny sõwemy heka riheludunyre tahi-di taibru-di.

¹³ Tai Jesuisi tuu robireu, idi rexiwòtenymy kamy rarybere: —Ibrukõmyke!

¹⁴ Jesuisi debò ritidire caixaõ-ò. Iu idi itxyydu ruhurenre. Idi tahe rarybere: —Weryrybõ, bexixake wahe.

¹⁵ Weryrybõ rexixamy reamy ronyre. Idi rarybere. Tai tahe Jesuisi ise-ò riwahinyre.

¹⁶ Ibutumy tasỹ mahãdu ribedeòtiidỹnydunyre. Tai tahe Deuxu riwowydynymyhỹreny: —Ebe, aõherewe, Rybedu nihikỹ kỹnyhe witxijumy inydeereny rehemynyre.

¹⁷ Kia taheka bedede hãwãmy Jesusini reare.

¹⁸ Joaõ heludu mahãdu ibutumy tuu relyyre iko.

¹⁹ Inatxinareny Joaõ riteònyre Jesuisi dỹỹraximy kamy wahe: —Kaiwe nodu aõbo tate, ada txiò aõbo ini nodutyhy ariraòrenykre?

20 Idi Jesuisi-ò ròirenyre tuu itỹĩraxidỹĩmy; – Kai we nodutyhy tate? Ta txio aõbo ini ijõ ari-raðrenykre?

21 (Iu ta Jesuisi yla aõkõ webinadu, binanamy binana mahãdu riteytenyra, tyytybybinamy ykydu mahãdu, iruetà mahãdu sõwemy tule.)

22 Irahu-di ta Jesuisi rarybere Joaõ ijoi-ò: –Bòðsebenyke. Ibutumy kamy tabitenyta taholatenyta Joaõko-ò tuu belyybenyke: –Iny ruetà bina mahãdu retehererimy, Iny rutiàre mahãdu rariarerimy, tyybinamy binana mahãdu reytererimy, iny nohõtity mahãdu roholarerimy. Iny rubu mahãdu heka rubu-ribi rexixarerimy, urimynodu mahãdu heka Rybewihikỹ Tỹmyra-ò roholarerimy.

23 Iny bedesa heka rare, warybe tyhydỹỹdu mahãdu.

24 Joaõ heludu mahãdu iribi ròhònyreu tahe Jesuisi rarybere Joaõ bededỹỹnanamy: –Aõmybo wahe Joaõ-di tõhõtinytenyete aõmy tubedi nohõtinyrenyrene tamy itxerena bederahy tõitenyteki wahe. Otxirarade wese yhy-ki idi tahõtinytenyete.

25 Aõma hãbu urimynodutyhy aõbo tahõtinytenyteri. Hãbu tyywihikỹdiremy tahe tahõtinytenyete. Iwese iòlò taheto wihikỹ-ki ratximyhỹre wesemy aõbo tahõtinytenyteri.

26 Wadee manarybeke aõbo betehékemy tahõtinytenyteri. Deuxu rybeduõmy aõbo tahõtinytenyete. Inatyhy tii rare. Kia ratyre heka tii rare.

27 Aõma dori tyyriti-ki rarybemyhỹre: –Tii heka wakoki kadehemynykemy ratximyhỹre, tamy relyykemy, ryõ riywinymyhỹre.

28 Inatyhy kaa rare. Tie heka ibutu hãbu ratyre ratximyhÿre. Ihãrele tahe inyõ Deuxu Iòlòna-ki ratxikeki heka iratyre ratximyhÿre.

29 Tahe nieru butudÿÿdu mahãdu kia-ò roholare. Tule sówemy iny kia-ò roholare. Tiiboho Deuxu bede ywina tyhydÿÿdu mahãdu roire. Tule Joaõ Sebedÿÿna mahãdu roire.

30 Fariseu mahãdu tahe, bede ywina erydÿÿdu mahãdu tahe Deuxudeewina dera rare. Tai Joaõ-ò ratisebemy roiõtyhy.

31 –Mowesebo heka wijinabòdu mahãdu wesemy ratxireri.

32 Uladu mahãdu wesemy tiiboho ratxireri. Tii-boho ijõ uladu mahãdu-ò ryrymyhÿre: –Inyboho rawiunyre, tahe kaiboho teseõtyhy. Wobina wiu rawiunyre tahe kaiboho tahinyõtyhy.

33 Joaõ Sebedÿÿdu renareherenyõmy rÿire, vÿi riõõre. Ihãre tahe kaiboho tarybete: –Tii tyytybybina-di ihÿre.

34 Hãbutyhyhykÿ jiarÿ rare, Deuxu Riòre wahe. Jiarÿ reroximyhÿre tule reõmyhÿre. Tai tahe tarybemahãte jiarÿ wabyre nihikÿlemy wamomohõkÿremy. Jiarÿ riki òrarudu liinatyhy heka jiarÿ rare, nieru tarasadu liina wahe.

35 Ihãre tahe aõikõkõlemy heka taraykynymyhÿtenyete ihãre taheka õbitilemy ixi-di tahõtinymahãtenyete.

36 Fariseu mahãduõ heka Jesuisi ritobinyre taheto-ò roximy. Jesuisi tahe rare idi ronyre roximy.

37 Kia hãwã-ki tahe hãwyyõ rasÿnyre, wydena wahe. Tii heka Fariseu heto-ki riroxirerimy roholareu, tii tule rare. Tahe hyna òwyhykÿ rimyre.

Alabastro aderònahynani rare.

³⁸ Hãwyy tahe Jesuisi hewomy ronyre, iòhòmy. Tahe aderòna ritxiwire iwatyre. Tule iwa-ki ruworuwòmý ratximyhỹ irube-di iwa risuhòra idi irade-di rabunyre.

³⁹ Fariseu kiamy robireu, ixideele rarybera: — Kia hãbu Deuxu rybeduõ aõkõ rare. Tuukeki tii hãwyy rieryke aõhãwyybo tii ratxireri.

⁴⁰ Jesuisi tahe fariseu-ò rarybere: —Simaõ, adee ararybekemy watzireri. Simaõ tahe rarybere: — Manarybeke Waerydỹỹdu!

⁴¹ Tahe Jesuisi rarybere: —Nieru huòteduõ heka inatxi hãbu-ò nieru riwahinyre. Ijõ 500 rihuòtera, ijõ tahe 50my rihuòtera.

⁴² Idi tahe hãbu inatxi nieruõhyymy rỹire òòsemy tanieru tamy. Tai tahe nieru huòtedu riwotòenyrenyre tahe ritusanyre, wiwana iòwy riixãwididỹỹnyre. Tibo huòtedu ilàhànadỹỹdu tyhyre.

⁴³ Simaõ dirawyònyde: —Kia òsana 500my rihuòtere. Tahe Jesuisi rarybere: —Inatyhy rare.

⁴⁴ Jesuisi tahe hãwyy, riijemy, tahe Simaõ-ò rarybere: —Kahãwyy ini bidiijeke. Jiarỹ nadehemynydeu, tii tarube-di wawa risuhòra. Kai beeõ tadiwyòte. Tii tarube-di riwawasuhòra. Iu tarade-di riwawarabunya.

⁴⁵ Kai tiwawehityhynanyõte rehemynyrau, tii tahe riwaatyõhyymy ratxireri.

⁴⁶ Kai warade-ki òlỹre tetxiwiõta tii tahe aderòna wawatyre-ki ritxiwire.

⁴⁷ Tai tahe adee ararybekre. Tii inatyhymy waluure. Taòraruna ixãwidỹỹna-ki. Inyõ iòraruna

ibutemy raixãwidỹnymyhỹreki, tii inatyhymy aõkõ taòraruna ixãwidỹdu luure. Ijõ tahe inatyhyhykỹlemy taòraruna ixãwididỹdumy reamyhỹre.

48 Tai Jesuisi hãwyy-ò rarybere: –Aòraruna reixãwididỹnyre.

49 Tai roxidu mahãdu widee raryberenyre: –Mohãbubo kia rare? Tii òraruna ri-ixãwididỹnyrerimy.

50 Tahe Jesuisi hãwyy-ò rarybere: –Atyhydỹnyamy texitarasadỹnyte aòraruna sõwe-ribi biu-ò hena tetateri. Mata hỹny.

8

1 Rexideleny raremyhỹ ralòralòmý hãwã hãwã ikõkõmy reamy rare kia aõma Deuxu Rybewi-hikỹ Tỹmyra relyymy rare. Tai ierdỹna mahãdu waòinatxi reuròmý idi ròirenyre.

2 Tule hãwyyõ tiiboho wana ròirenyre Ijõta Marie Madalena heka rare. Juhuu tahe tyytybybina-hakỹ-di raremyhỹ. Idi debò inatxi reuròmý tyytybybina iribi riòlòdỹnyre.

3 Ijõta Joana Kusa hãwyy rare. Tii iòlò Herodi heka aõmysỹdỹdu heka rare. Tule ijõ hãwyyõ Susana inire. Idi tule ihona hona Jesuisi taijoi-wana ibutemy tanierureny-di riwiòhenyrenymyhỹre.

4 Idi iny sõwemy titxiribibo dirahude kia-ò. Kia mahãdu-ò heka Jesuisi ribedeerynyre ijyyõmy.

5 Alòbòròna-di dehudu heka ròhònýre taoworu-ò. Alòbòròna-di imahãdu ijõ ryro-txi resere. Tai heka iny rariamyhỹre alòbòròna tyre-ki. Nawii tule tuu riroximyhỹ.

6 Mana rotysu-txi ijõ rejuxunyreri mana rotysu-txi suu dori ibututere tai tahe iraruxiõlemy raumynyre.

7 Ijõ tahe edey-txi resere. Raumynyreu tahe edemy riõhỹtỹnyre.

8 Ijõ resere suwi-txi. Tai ta raumynyre idi sohoji alòbòrònaty-ribi 100my raratynyre. Jesuisi tamy rarybere: —Kaiboho õhõtirenydikeki heka inatyhymy warybe-ò boholabenyke.

9 Tai tahe Jesuisi-ò rỹỹraxinyrenyre: —Aõwe kaa tekewesenanyteri?

10 Jesuisi rirawyònyre: —Kaiboho heka teerytenyte aõbohe wasımy ijyy rare Deuxu dori adeereny ritỹnynynyre. Kia tahe rare, Deuxu Iòlòna aõmydỹỹnana wahe. Ijõ iny-ò tahe rarybere ijyy-di relyyre.

Tai robikre tahe, rieryõtyhyke. Roholarenkyre tahe rieryõtyhyke, timybo juhUU Deuxu rybemy rybedu mahãdu rarybere wese.

11 Aõmybo kia aõijyybo kia rare wahe. Alòbòròna heka Deuxu Rybewihikỹ wese rare.

12 Ryro-txi resere heka ijohonadu wesemy rare. Deuxu ijyy heka resera ede sõwey-ki. Tii heka Deuxu Rybe-ò roholamyhỹre mahãdu wese rare. Idi tahe Satanasi heka ritamyhỹre iworeny-ribi. Tai rityhynyrenykõmy idi biu-ò rahenyõkremy.

13 Ijõ tahe manasuõ-txi resere heka, kia Deuxu Rybe-ò roholamyhỹre mahãdu wese rare. Rybe-ò juhUU roholamyhỹre deysana-di rityhynymyhỹre. Kia manatyre resera heka irarutiõhykre. Iny mahãdu wese heka rare. Idi ikyhynakõreki, iwodelòlòtõmoreki urile tatyhydỹỹna riatymyhỹre.

14 Ijõ tahe edesuyky-txi resere heka, kia Deuxu rybe-ò roholamyhÿre, idi iworekena sõwemy, iaõdelòlòtõmomy, idi ityhyna wahe urile riòhõtÿnymyhÿre. Tai ròwiòhenadÿÿõhyymyhÿre Deuxu tyhydÿÿna-ki. (Kia tahe alòbòrònaõ ede yky-txi resera tahe iny umy witzira wesemy heka rare. Iny umy tyhyna idi ratxireri heka kia wesemy kia ede-txi iny reseremy. Aõma kia inytyhyna ratxireri. Tiu heka ityhydÿÿna riòlòdÿÿõtÿhy. Kia alòbòròna tahe tai heka rokuõtyhy.)

15 Kia ijõ alòbòròna suu witxi-txi reserá tasÿ iwitzira inywesemy rare. Kia ijohonadu aõma rierymyhÿre. Irayky-ò ralòmÿhÿre. Kia iwotyhywo-ò òbitimy ratxirerí tahe, òbitilemy aõ riwinymyhÿre. Iwese kia alòbòròna sõwemy ratyy rawahinyre wese tahe tii rare.

16 Ijõ ijyy tahe kiamy roire. Uritere inyõ loosònaõ rideõmykre butxi rawo-txi ada herina rawoõ-txi aõbo. Loosòna bidekre bedewiõ-ò. Tai tahe ibutumy bede ritoosònanykre.

17 Aõ heka tai wasimy ratxiõhyymyhÿre. Aõutxumy dori ibutumy erynamy rarekre.

18 Tahe bexijebenykre ijohona-ò. Kia sõwemy idi rÿirerimy ihÿre heka sõwemy rimykre. Kia urihimyò iwo-ki rÿireri heka iribi ritakre. Idi ibutumy rÿireri heka iribi ritakre. Urihimyò iribi iny ritakre. Urihimyò iwo-ki rÿireri heka hulemy iribi ratakre.

19 Jesusise, tariòreboho tamy doide. Tii ròbedeerydÿÿmyhÿki isirare tamy dehemysÿ iny sõwe òraru-ki.

20 Tai inyõ Jesusi-ò rarybere: —Adihe wa

aseriòre boho hewa ahanakile ratxireri umy ro-bikemy ratxirenyreri. Adee rarybekemy.

²¹ Tai Jesuisi rarybere: –Waseriòre wa kia Deuxu rybe erydỹỹnaõ rare. Kia tamy roholamynyrele heka rityhynymyhỹrele heka nadi wesele rare. Tii-wana iwese waseriòre wesele rare.

²² Iribi tahe hãworo rorukurenyreu Jesuisi rarybere: –Ròkòireny kanawe-ribi ijà-ò. Idi tahe roirenyre.

²³ Jesuisi rõrõmy tòru-ki. Idi tahe yhynihikỹ òbònihikỹ-wana tamyreny reare. Ruberurenyre tiiboho rỹmyrenyke lau.

²⁴ Tai tahe wylemy riixixanyreny: –Erydỹỹdu, Erydỹỹdu rekekoarenykre berahatxi-ò. Idi Jesuisi donomy deademy tahe yhy dee rarybere: –Biyryke, Biyrykewa. Yhy ruhumy resere. Òbò tule ruhumy ibutumy riyryre, iny rurukre.

²⁵ –Kaiboho tiwexe ainatyhynareny? Tiiboho rabedeòtidỹỹmy ruberumy widee raryberenyre: –Aõhãbuwe kaa rare. Yhyhykỹ dori òbò dori irybemy reòbyreri.

²⁶ Kanawe-ribi ijà-ò rehemynyrenyre Kerase bede-ò kalileia aho weribi-ò.

²⁷ Hãbuõ heka tamyreny dobehede hãwãhãkỹ-ribi tamyreny dobehede. Tiiboho riòtyròny hãwãro-ribi iu ta tyytybybina-di ratximyhỹre hãbu tiu rexityynyõhyymyhỹre taty-di hyymyhỹre. Kiamy wabedekihyyle ratximyhỹre.

²⁸ Jesuisimy robireu tahe bedetxile resere tairy-di ryryre: –Aõhebo biwasỹnykre Jesuisi. Kai Deuxutyhy Riòre atxiteri. Uritere aõhõkỹmy wasỹdỹỹõmykre.

29 Tahe Jesuisi heka tyytybybina iribi riòlòdỹnyre. Sõwemy dori riuwinyre hãbu rimymyta. Riuwinyre idi rihure. Tai heka tii uritiere womati reroti-di ritaataamy riijemyhỹre. Ihãre tahe ixi-ribi riòròmỹhỹre. Tai bedero-txi reamyhỹre tyytybybinamy rawonymy.

30 Idi tahe Jesuisi rỹraxyre tamy: –Mobo anire? –Sõwemy wanire. Tyytybybina sõwemy dori tuu rexiykynyreki.

31 Tiiboho raryberenyre: –Uritere bedebina-hakỹ-ò wateòdỹnyrenyõmykre. Uritere sỹu-ò noõma rarekremy hãlootxi-ò.

32 Iu tahe ixỹni juramy riroximyhỹ hãwãlò-ki. Tai tyytybybina mahãdu Jesuisi-ò rarybere: –Biwateònyõke. Kowa ixỹnijura-ò biwateònybenyke aralorenkyremy. Tai Jesuisi riròtenyreny.

33 Iu kia hãbu-ribi tyytybybina ròhònyrenyreu tahe ixỹniwo-ò ralòreki wahe. Raòlònyra ijò-di rejuxunyre taraò wahe. Ibutumy ahoro-txi rejuxunyre. Ibutumy rururenyre berahatximy.

34 Ixỹni-di itxeredu mahãdu ibutumy rajiranyra hãwã-ò tule relyyrenyre tuu iny rasỹnymyhỹre mahãdu-ò.

35 Tai iny dirahude tamy itxeremy. Idi tahe rare Jesuisi-ò. Hãbu robimyhỹrenyre tatyky-di ronymyhỹ ibutumy rexiywiny Jesuisi-ribi iòhòmỹ ronyre. Kia iny mahãdu heka sõwemy ruberure rabeòtiidỹnymyhỹre.

36 Ibutumy relyyre. Kia tyytybybina timybo aõhebo rotỹnyremy.

37 Kia Kadara bedede ludu kia mahãdu tahe rexitòenyre Jesuisi-ò iribi ròhònykremy, ilau ruberurenyreki wahe. Idi tahe Jesuisi ròkòsere ixy-

byle reare hãworo-ò.

³⁸ Hãbu tahe rexitòenyre Jesuisi-wana rakremy, kia tyytybybina-di iwo-ki ratximyhỹ wahe. Tamy rarybere:

³⁹ —Aõkõre bøkese aheto-ò. Ibutumy belyyke aõbo adee Deuxu riwinyremy. Tai ta ibutumy hãwã hãwã-ò relyyre aõhebo Jesuisi risỹnyremy.

⁴⁰ Kia iny sõwehekỹ mahãdu heka teysa-di rimyre ridyremyhỹre riraòhyymy ratximyhỹreny.

⁴¹ Kia hãbu dohodỹỹdu hetowo erydỹỹdu tahe nade Jesuisi-ò. Tii heka dohodỹỹnana dinoduõ rare. Ijairu inire Jesuisi-ò sutxi resere: —Mynake wasỹ Jesuisi

⁴² Jiarỹ wa wariòre sohojile rare waòinatxi reuròmy iwyrã. Tii ka rurukremy roireri. Idi ta Jesuisi rare isỹ-ò. Sõwemy iny Jesuisi riheludunyre.

⁴³ Hãwyyõ raremyhỹ heka hãwyy webinadu rare iòhò Jesuisi rexisỹny waòinatxi beòramy heka idi ròhònnyre hykyky hãlubu ratxireri. Tiu heka inyõ reteytenyõhyymyhỹre luahidỹỹdu, òhotibedu mahãdu he risiranyre.

⁴⁴ Tai tahe Jesuisi tykysi-ò reare. Tai ta aõwesele reytemy reare.

⁴⁵ Jesuisi rarybere: —Mowe watxi reare? Ijõ rarybereri: —Erydỹỹ mahãdu aõkõre, jiarỹboho aõkõre. Pedro rarybere: —Aõheta sõwe iny kaki rỹireri. Timykibo tuu tỹỹrayiteri.

⁴⁶ —Jiarỹ dori reeryre. Mobo watxi rearaule reytera.

⁴⁷ Tiihe hãwyy ratxiremyhỹ ramytatamy. Tamy ramytatamy heka tamy rehemynyre. Iòràò rexibedenyre. Ibutumy iko tuu relyyre. Aõherekibo itxi reriramy.

⁴⁸ Tai tahe Jesuisi tamy rarybere: –Lerỹ, atyhydỹna myna teyteta. Ta bexiywinymytahỹny maa!

⁴⁹ Kie raryberemyhỹwanale tasỹ iny wixiraõle dehemynyde. Kia aõma dohodỹna wedu heto-ribi dehemynyde. Ijairu-ò rarybere: –Ariðre wa rurura. Uritere ta òhotibedu-ò ijiraõma ixinamy tii rakre.

⁵⁰ Jesuisi kia-ò roholareu tahe Ijairu-ò rarybere: –Urile bityhybenykre. Breburenyõma tii reytekre.

⁵¹ Tii rehemynyre heto-ò. Jesuisi ralðre iny deramy reare. Tii wana rake lau. Kia uladuse, uladutyby, Pedro, Txiau, Joaõ wana kiale ralðre tamy tiiboho wana.

⁵² Ibutumy rasỹbinamyhỹ Jesuisi rarybere: –Ibryrenyõmyke hewa rurumy aõbo roire, urile rõrõmy roireri.

⁵³ Ibutumy rieryrenyreri tiiboho urile tai idi risinyrenyre rurumy roimyhỹki.

⁵⁴ Jesuisi ihãre ta hirari deb-ki rimyre. Tai tahe idi rarybere: –Hirari, bexixamy, bodonyke.

⁵⁵ Ityytyby aõwesele ixityre tamy ralore. Dexixade, donyde. Rỹsỹna hirari-ò riwahinykemy Jesuisi rarybere.

⁵⁶ Tai tahe tybyboho sõwemy rabedeòtidỹrenyre rabedesarenyre. Jesuisi rarybereri: –Urile wamy ijyyrenykoõmykre. Aõbo adeereny rewinyramy.

9

¹ Jesuisi tahe tawaðinatxi reurò taerydỹna mahãdu ributunyre. Taruru tamy riwahinyre tyytybybina iny-ribi ritakremy. Tule iny webinadu mahãdu riteytenykremy.

² Tule rarybere tamyreny: –Kaiboho belyybenykre Deuxu kia Iòlònamy tule webinadu biteytenybenykre.

³ Aõ awanareny wydyyrenyõmykre debòna aõkõ, aõna hyna tule aõkõre. Tule rysỹnake aõkõ, nieruke aõkõ. Ainatxityyke aõkõkre.

⁴ Hãwã-ki hetoõ-txi malòkeki taile bonykre. Hãwãribihyyle bõhònykreu, kia heto-ribi bexitakre.

⁵ Ibinamy aramyrenykreki, urile bixitakre. Idi òlòna-ki, awa bitòtynykre ibinamy tai tahatenytki.

⁶ Tiiboho ròirenyre hãwã sõmo sõmo-di Rybewihikỹ Tỹmyramy relyyrenykemy ròirenyre. Tule iny webinadu ibutumy iteyteynyrenyre hãwã hãwã-di.

⁷ Idi tahe iòlò Herodi ibutumy heka aõna aõna rierymy ratximyhỹ. Tai tii bede ryy rieryõhyymy ratximyhỹ aõbo riwinykre. Roholamyhỹre heka iny rybe rybe-ò. Joaõ heka rexixamy ratxireri.

⁸ Ijõ tahe kiamy rarybereri: –Eliasile ratxireri. Ijõ rarybere Deuxu rybemy rybeduõ ratxireri.

⁹ Tai tahe Herodi kiamy rarybereri: –Jiarỹ heka Joaõra resymy rewahinyre. Mobo ratxireri iwese Joaõ raremy wese he ratxireri. Moobo ta kiamy raholamy watzireri. Tai Herodi tuu robikemy riwisỹnymyhỹ.

¹⁰ Jesuisi eryna iko relyymyhỹreny ibutumy aõbo aõhebo rotỹnyrenyremy tabededỹnana. Jesuisi riòlònyrenyre ijõ hãwã witzira-ò, Besaida hãwã-ò wahe.

¹¹ Tai iny sõwemy hekỹ rieryõlemy idi ta rieryreu tahe sõwemy ihemy rare roirehe. Jesuisi he ributumy ikole relyyre. Deuxu Iòlòmỹ relyymyhỹre. Tai ròteytedỹmyhỹ webinadu mahãdu.

¹² Aõtxu tahe katxioromy Jesuisi eryna mahãdu, waõinatxi reurò mahãdu tamy raryberenyre: —Bede biywinyke ibutumy iny rÿireri hãwãõ-ò tarÿsÿna õbradÿÿmy. Inyboho dori bedero-ki ratxirenyreri.

¹³ Tahe Jesuisi rarybere: —Kaibohole rÿsÿna biwahinybenyke. Rirasÿnyrenykemy ierydu mahãdu diwyõnydenyde: —Aõheretahaka, iruyre orotxu idi inatxi uturale heka roireri. Aroikemy aõbo wadi-reny atxiteri rÿsÿna õbradÿÿmy inysõwe-ò.

¹⁴ Txibo 5000 hãbu sõwemy heka rÿimyhÿ. Jesuisi rarybere: —Bihitxinybenyke 50 iny heka iny bisÿnybisÿnybenyke.

¹⁵ Tii myna ieryna mahãdu rotÿtÿnyrenyre.

¹⁶ Idi tahe Jesuisi utura inatxi, orotxu iruyre rimyre. Biu-txi reteheremy rexitõenyre. Deuxu reàlãre tamy rexitõenymy riyreyrenymy riwahiny taerydÿÿna mahãdu-ò. Riwyrenyre tahe riwahiri-wahinyrenymy idi roire.

¹⁷ Ibutumy riroxirenyre idi rihydyrenyre. Ihãre ta waõinatxi reuròmymy hyna ixyby rÿximy rauhenyre. Idi ierydÿÿna mahãdu ixyby ributumy.

¹⁸ Jesuisi heka ixisohojile rare ixitõedÿÿmy. Ierydÿÿna mahãdu heka irarò-ki rÿimyhÿ riijemy rÿimyhÿ. Idi tahe tamy nade tÿÿraximy: —Moboho jiarÿ raremy wamy raryberenyre?

¹⁹ Tai narybedenyde: —Ijõ Joaõ Sebedÿÿnamy adireri. Ijõ ta Eliasimy adireri. Ijõ ta juhUU Deuxu rybedu mahãduõmy adireri.

²⁰ Jesuisi tamy rarybere: —Adeereny tahe. Mobo jiarÿ watxireri. Idi Pedro rirawyõnyre: —Kai

Kristu tate, Deuxu deòdỹna wahe.

²¹ Tahe Jesuisi tamy rarybereri: —Uritere tuu iny-ò ijyykõkremy.

²² Jiarỹ Hãbutyhyhykỹ, Deuxu Riòremy, aõhõkỹmy arotỹnykre. Judeu wedu mahãdu, xiwena wahidỹdu wedu mahãdu, bede ywina erydỹdu mahãdu waderamy reakre. Jiarỹ arurukre. Inataõna txu-di arexixakre.

²³ Idi ibutu-ò rarybere: —Wahemy kanake mahãdu urile ixi dee rexiiõnykre. Txuõ txuõlemy taitxeò rimymy kidiwaheludunykre.

²⁴ Waòrary-ki rubudu heka biu-ò hedukre. Tukõkeki urile ixinany inatyhymy rurukre.

²⁵ Aõmydỹnanamy iny ritakeki, tahe taumy riõnonykeki, kia heka aõmy aõkõkre.

²⁶ Inyõ raixỹrukeki warybe lau tule jiarỹ Hãbutyhyhykỹ, Deuxu Riòre wahe, tai ilau araixỹrukre. Deuxuko-ò ýjuko-ò iu adehemynysỹu Deuxu Iòlõna-ki wahe.

²⁷ Inatyhymy heka adeereny ararybekre. Ijõ kaki rare. Deuxu Iòlõnamy robikre tarubukõtyre

²⁸ Tahe debò inataõ txuu rỹidi, Pedro, Txiau, Joaõ-wana Jesuisi ridyre. Tiiboho sohojile bederatò-ò roire Deuxu-ò rexitòenykemy.

²⁹ Jesuisi rexitòenyrieru tii tamyreny rexiwitxiranyre iu rexitòenyreu ityy heka urile rabòòranyre. Iurahakỹmy relere.

³⁰⁻³¹ Tahe tamyreny dexitỹnynyde Eliasi, Moisesi-wana tahe rarybemyhỹre Jesuisi-wana. Jesuisi rubunamy Jerusalẽ hãwã-ki widee rarybemyhỹrenyre, kia Deuxu bedeywidỹnana myna.

³² Pedroboho rõrõrenyrieri. Idi tahe rexixarenyreu, tiiboho Jesuisi loosònamy

robirenyre. Eliasi, Moisesi-wana tiiboho tuu robirenyre.

³³ Ròireriu, Pedro rarybere Jesuisi-ò: —Wawedu, awityhymy inyhe inyboho kaki ratxirenyreri tahe rikiwinyrenykre inataõ hetomy, ijõ adee, ijõ Moisesi-ò, ijõ Eliasi-ò. Pedro rieryõlemyhÿre aõmybo rarybemyhÿ.

³⁴ Tai rarybereu Nonoe dobehede iubòròna bedede ritòbònyre. Pedro, Txiau, Joaõ-wana ruberumyhÿrenyremy.

³⁵ Tahe ròhònymy reare rybeuni iuribi: —Kia heka Wariòre waluu rare. Kaiboho tamy boholabenyke.

³⁶ Tiiboho reteherenyre tahe inyõmy robiõlerenyre Jesusilemy ta robirenyre. Tahe rybeõmy rÿirenyre. Iu inyõ-ò aõmy raryberenyõre tuu.

³⁷ Tai tahe ijõ txu ratò-ribi dehemynydeu iny sõwehekÿmy Jesuisi-ò ròirenyre.

³⁸ Inyõ rarybere: —Erydÿÿdu, wariòre adee redyreri. Beteheke wariòre sohoji-ò.

³⁹ Tyytybybina rimymyhÿreu tahe riatyre bedede-ò. Idi tahe urile txuu riyiyidÿÿnymyhÿre.

⁴⁰ Aerydÿÿna-ò jiarÿ rarybera tyytybybina riteònykremy, tahe tiiboho riixãwidÿÿnyõhyrenyre.

⁴¹ Jesuisi tamyreny rarybere: —Tiwesebededÿÿnanabo wjinabòdu ityhyõlemy rÿira. Tiwesebededÿÿnanabo akyreny-ki ariijekemy. Wadee uladu bididyke.

⁴² Tahe didydenyde Jesuisi-ò. Tahe tyytybybina urile riitxÿteitxÿtenemy resere. Idi tahe urile bedeki rexiraòhòhòremy sutxi resere. Idi rarybexinymy. Rybexi irywomy ròhònymyhÿ. Je-

suisi tahe tyytybybina iribi riòlòdÿÿnyre uladu riteyteyre. Idi uladu tyby-ò riwahinyre.

⁴³ Ibutumy iny Deuxu aõwidÿÿna-di bede riòtiinyre.

Jesuisi taerydÿÿ mahãdu-ò rarybere:

⁴⁴ —Boholatyhyki warybe-ò, Deuxu Riòre Hãbutyhyhykÿ heka rawahidÿÿkre hãbu mahãdubinaõ-ò.

⁴⁵ Tii boho rierykõlere. Kiamy dori ilaureny riwore. Tahe ruberurenyre tÿÿraxidÿÿki.

⁴⁶ Ryro-ki ierydÿÿna mahãdu widee rarybemyhÿre: —Mowexe wiratyre ityhykremy.

⁴⁷ Jesusireny rexiraykynymyhÿreny rieryre. Idi tahe uladuõ rimymy rarybere. Jesuisi uladuõ wana ronyrenyra.

⁴⁸ Tahe taerydÿÿna-ò rarybere: —Moõ uladu ka wese wadee riwiòhenanykeki, riwawiòhenanyre. Moõ riwawiòhenanykeki, tule waha riwiòhenanyre. Mobo deòdumy reakre, tii ibutu ratyrekre.

⁴⁹ Joaõ tamy rarybere: —Erydÿÿdu, jiarÿboho riòlòdÿÿnyrerimy tuu rabirenyra inyõ tyytybybina-di animy rehureriò. Tahe iny mahãdureny aõkõ rare. Tahe jiarÿboho tamy reijõnyrenyre iny inyijoirenyre aõkõki.

⁵⁰ Tahe Jesuisi rarybere: —Biijõnybenyõkre. Inyõ inymyrenydòdukõkeki, inyweribireny-ki tii rare.

⁵¹ Tahe Jesuisi bededÿÿnana iixihidu iòhòmy idi biu-ò rakreu, tii Jerusalẽ hãwã-ò rakremy rexiywinyra.

⁵² Tahe takomy inybuta bede riywinyre. Tai itÿhinamy rutòmy Samaria hãwã-ò.

⁵³ Tai tahe Jesuisi deramy rekoarenyre Jerusalẽ-ò ramyhÿreki.

54 Txiau Joaõ-wana kia rierymy tahe narybedenyde: –Wanyrÿhÿkÿ, adee wikeki heòty biu-ribi ityreneny kedesekey aritxuhorenykre risõrenykremy.

55 Tahe Jesuisi irybereny-ki ibinamy rahare tahe reburemy taò riòòsere iribireny.

56 Idi ta iwitxira hãwã-ò roire.

57 Tahe Jesuisi taerydÿÿna mahãdu-wana roirenyreu, hãbuõ tamy rarybere: –Ihyymy awana arakre titxibo makreu, ahekile arakre.

58 Tahe Jesuisi tamy rarybere: –Ijòò heka ihãloo dire. Nawii tÿtÿ dire. Tahe jiarÿ, Deuxu Riòre wahetoõre, Hãbutyhyhykÿ rare hãrele.

59 Tahe ijõ hãbu-ò rarybere: –Biwaheludunyke. Tahe tii dirawyònyde: –Wanyrÿ, Waha heka rurura. Tai tahe juhuu arituunykre.

60 Jesuisi rarybere: –Txioinihe, rubu mahãdu wii rituunykre. Kai tahe makre Deuxu Iòlònamy belyykre.

61 Ijõ rarybere: –Wanyrÿ, araheludunykre. Urile juhuu wasÿ mahãdu arawehityhynanykre.

62 Tai Jesuisi dirawyònyde: –Inyõ ritelenykeki, tahe ixbyby òòsemey rexinohõtinykeki, tii waheludu mahãduõmy rareõtyhy.

10

1 Jesuisi 72 hãbu heka ritare inatxi inatximy tako-ò tihãwãhãwãtxibo rakreò bede riywinyre. Kiamy tamyreny rarybere: –Waijyymy rybemy boibenyke.

2 Kiamy heka tamyreny rarybere: – Waaõmysÿdÿÿna heka inihikÿ-di isirare. Iwese maixõmo iny riòròmyhÿre wese heka

waaõmysỹdỹỹna rare. Maixõmo oworu heka inihikỹre, idi aõmysỹdỹỹdu heka ibutere. Tai oworuwedu-ò aõmysỹdỹỹdumy bexitòenybenyke, Deuxu-ò wahe.

³ Kiaboho heka budoeni wesemy iyreny-ki boibeke. Kia-ribi nohõti losaõmykre.

⁴⁻⁵ Tai heka bexiijebenykre anierureny wydyõmy. Aõna aõna renyhynykeõ aõkõ awareny wydyõmy iny-ò ryberenyõmy iny iny-ò ryberenyõmy, rywetyatyamy abededỹỹna nodỹỹmy. Inyheto-ò malokreu Deuxu deysanamy birybenybenyke.

⁶ Tii adee awirenykre wana heka teysakre ka-hetoludu. Tai tahe ixibyle adee Deuxu deysana ròõsekre adee awiõhyykeki wahe.

⁷⁻⁹ Aõma hãwãõ-ò malò-wana uritere deuròsò deòròsòõmy matximahãke. Tai themynymy atxiterikile bexiijemahã tetxilemy. Uritere rỹsỹna òta òtaõ aubeò ritidi wana uritere rybeòlòõmy. Birỹsỹmy rybeõlemy. Awiõhedỹỹmy ruruke wana bimymyhỹ aõbo adee riwahinymyhỹre. Iny raaõmysỹdỹỹmyhỹre heka ròtamyhỹre. Kia wese heka biwinymyhỹke. Birỹsỹmahãke aõbo adee riwahinymyhỹke. Binaõ roiwana biteytenymahãbenyke. Kia wesemy tamy marybeke: –Deuxu Iòlòna heka iòhòmy ihỹre.

¹⁰⁻¹¹ Hãwãõ-ò birònykeki, inyõ aradyrenyõkeki, boibenyke hãwãky-dí. Myỹ marybebenyke tamyreny: –Aõbo wawa-ki hãwã-ki rỹireri. Wawa aritòtynykre bryby iribi ròhònykremy. Adeereny ariteòsinykre nohõti ijaranamy tamyreny. Nohõti losarenyõmy Deuxu Iòlòna adeereny iòhòmy dehemynyde. Tahe kaiboho teramy tekoatenyte.

12 Aõma ywisidỹnatxu heka tiiboho aõhõkỹmy rotỹnyrenykre. Jesuisi rarybere: —Tiro hãwã Sidõ hãwã heka awimy aribireny rõhõnykre.

13 Kobe làhàxe kai Korasĩ hãwã, tule Besaida hãwã. Òhotibe ayreny-ki rỹire, kia heka Txiru hãwã, Sidõ hãwã tule kire-wana taõ òta òtareny-ribi rexiatyreny. Tiiboho tykysausuhukỹtyre rex-isỹnyre bryby-di rexiereny.

14-15 Òhotibetxumy heka Deuxu raruxetõenykre Txiru hãwã mahãdu, Sidõ hãwã mahãdu! Kaiboho tahe aõkore. Deuxu araruxetõenyõkre. Kai Kafanaõ hãwã yludu mahãdu aõbo adeereny rotỹnykre. Biu-ò aõbo bõibenykre. Aõkõ heka heõtybina bede-txi heka boibenyke.

16 Tahe Jesuisi taerydỹna mahãdu-ò ixyby rarybere: —Inyõ aradyrenykre wana tasỹ-ò. Iwese riwadymyhỹre wesele, aradyrenykre. Moo adeereny roholamyhỹre iyubu wadee roholamyhỹre. Wana tahe waderalemy reamyhỹre. Waderamy reamyhỹre tahe tule Waha deramy reamyhỹre. Deuxu wateòdỹdu wahe.

17 Tanonanareny-ribi iribi tahe kia erydỹna mahãdu ibutumy dòòsedenyde. Tiiboho heka teysa nihikỹmy dòidenyde. Tybybinanahakỹ heka irybe-ki rõhõnyhỹre irybereny-ki. Riòlòdỹnymyhỹreny wana Jesusini-di heka rõhõnymyhỹre kiamy Jesusiko-ò tuu relyyreny.

18 Tii rarybere tamyreny: —Bexiijebenyke jiarỹ dori Satanasimy biu-ribi rabire, biudelaa wesemy reseremy tuu rabire.

19 Inatyhy rare waruruke nyderi rewahinyre. Tai hemylala tyre-ki mariabenykeki. Tiu inyõ

ruruõtyhy itytibòrò nihikỹ arawerenykeki, tiu bu-
ruõtyhy. Tule kai aòludu rururatyre arurureny-di
boibekre.

²⁰ Ihãrele tahe uritere deysarenykõmy
atxibenyke ka ruru òraru-ki tyytybybina
deòdỹna, ruru wahe. Kaiboho dori
anireny raritinomy roimyhỹre biu-ki kia ta
ateysanarenykre.

²¹ Iule tahe Jesuisi reysare heka Deuxu Tyytyby-
tyhy iwomy reareu. Kiamy rexitðenyre: –Waha,
kai wa biuwedu tate ibutu bede wedu tate. Umy
reàlãmy watzireri tamy retðenyre. Wadeysamy
watzireri ka aõma dỹnana bederaremy nihikỹ
iribi tewòmý atxiterikí wahe. Tamy hete iwese
iny uladu wesemy rityhynymyhỹre heka. Tai tahe
tamy ritỹnynymyhỹre. Kia adeewimy tuu rare.

²² Jiarỹ heka ibutummy Waha wadee riwahinyre.
Inyõ rieryõhyymyhỹre Waha wahe. Waòrarukile
tahe iny rierymyhỹre. Mobo Waha rare wahe.
Waòrarukile dori rierymyhỹre. Ijõ aritỹnynekemy
watzireri. Tai tahe tiki tule riery iruru. Taile
rierykre.

²³ Rexitðenymy rahudi tahe wasimy iwòtemy
heka rarybere taerydỹna mahãdu-ò: –Kaiboho
heka sòwemy aõwihikỹmy tabimyhỹtenyete. Tai
kaiboho beysabenyke.

²⁴ Ihetxiu heka Deuxu rybedỹdu wana kia
aõmysỹnanamy iòlò mahãdu wana. Kaireny
aõmydỹnanamy robikemy risỹnyre, tahe
aõkõhyyre. Wijile heka tuu robireri aòrarureny-ki.
Tule tabitenyteri kaiboho ratximyhỹ inatyhymy
aõbo òbitimy Jesuisi ijyy-ò roholarenykemy tahe
aõkõhyyre.

25 Moisesi bede ywina rybe-di rãire Jesuisi lÿÿraxidÿÿmy. Iwese kai ixiluure wese, iny witxira luuke! Tii tahe Jesuisi rihixidÿÿmy rarybere: — Aõhebo arotÿÿnyke biu-ò arahenykemy.

26 Jesuisi dirawyònyde: —Timybo kÿÿnyhe Moisesi bede ywina tyyriti-ki roimyhÿre? Timybo tuu manarybekre.

27 Tii tahe diwyònyde timybo tyyriti-ki roimyhÿre myna:

—Deuxu adinodureny, ibutumy awo-ribi iluuke, ibutumy arayky-ribi aruruna-ribi, ayky-ribi heka iluuke. Tule ibutumy iny ixiwesemy idi atximahãke.

28 Tai tahe Jesuisi tamy rarybere:

—Kai inatyhymy tarybeteri tai inatyhymy mahenykre biu-ò.

29 Kia hãbu heka rexiòbitinykemy idi ratxireri. Taita rarybere Jesuisi-ò: —Mobota waeryre?

30 Tahe Jesuisi ikò relyyre ijyymy. —Judeu mahãdu hãbu heka ratÿinamyhÿ Jerusalẽ hãwã-ribi, Ijeriò hãwã-ò. Iribi tahe kia wasidu mahãdu rimyrenyre. Inieru ibutumy iribi ritarenyre. Ity hÿre raòhòtere irubudÿÿle rasiranyre ririre. Tahe ruruõki rÿimyhÿ.

31 Aõma judeu xiwenawahidÿÿduõ heka idi rare. Tahe hãbumy robire. Idi hãbu-ribi irehemy rexiemy reare. Tahe tÿtxi rerikõle rare raty resere.

32 Hãbuõ rehemynyre tiie-ki dohodÿÿna wiòhedÿÿduõ rare, Levita wahe. Tule ratyresemy ririre.

33 Tahe ijõ nade Samaria bede hãwã luduõ heka rare. Judeu mahãdu heka Samaria mahãdu

luukõre. Idi tahe kia judeu mahãdu roimyhÿ. Tahe Samaria mahãdu hãbu sõwemy riruxetõenyre.

³⁴ Idi tahe tamy rexitÿmynymy tahe iwotõmona rituahinymy ritaataamy iwotõmona. Idi tahe ka hãbu relyymy idi rare. Aõma ijumenta tyre-ò ritidimy. Idi rare rirarehu tahe heto-ò ritidikremy ririkremy ridymy heka idi rare. Rummy heka ritõenyre hykyky idi bede nade awimy risÿnykemy. ³⁵⁻³⁷ Rudile heka heto õwy-di iwedu-ò heka nieru riwahinyre riõwynyrene inatxi womati nieru. Tamy rarybere: –Biwiõhenanyre idi mabekre adõõsekre rirõkre. Moma arÿnaderenykre Arÿnadebenykre heka adiõwynykre adõõsekreu wahe. Ka hãbuhe rarybere: –Hãbu bireludu ratxireri. Kia taruxetõenyre riõsinyre waha tieka idi hãbubireludu ratxireri. Wimy raõludumyhÿre hãrele taheka riwiõhenanyre. Jesuisi tamy rarybereri. –Iwesele biwinykre iweseka hãbu riwinyra weselemy biwinykre. Kai aõhebo botÿÿtyhy mahake. Iwesele wahe. Jesuisi rÿÿraxire: –Mobo hãbu aõtxino biõwa rare? Mobo ibireludu wahe? Bede ywina erydu tai rirawyõnyre: –Iwiõhedÿÿdu wahe.

³⁸ Jesuisi, ijõ mahãdu-wana rõirenyre. Hãwã-ò rirõnyrenyrene. Hãwyyõ rare Marta inire. Tahe ridyre tasÿ-ò tai ratxirenykemy.

³⁹ Tahe Marta heka iseriõre dire. Marie inire. Marie urile ibire-txi ronyra aõbo tarybeke roholakelemy.

⁴⁰ Marta heka raelelemy ratxireri. Aõna aõnale rotÿÿnymyhÿle riwinymy taile rare ratximyhÿ. Tai tahe nade Jesuisi-ò rarybere: –Jikarÿ sohojile wa watxireri waseritxõre riwawikõhenanykõhykyreri. Kai anobohe kõbitimy tai tahateri. Tamy mary-

beke riwawikòhenykemy.

⁴¹ Tai tahe Jesuisi he tamy rarybereri: —Marta, Marta, aõherekibo kai taelelemy teamy atxiteri?

⁴² Sohoji aõmydỹynale heka awire. Marie awityhy aõmydỹynana ixidee rimyre. Kia moo iribi ritaõtyhy. Riwinymyhỹ awityhyreki wahe. Tamy rarybeõtyhyõ wadee roholareri iribi ariòlòdỹnyke wahe.

11

¹ Tiutxubo Jesuisi rexitòenymyhỹre, iny rieryõlemyhỹre. Jesuisi rexihudi, ijoì rarybera: —Biwaerynanybenykre iwese textìdenyteri wese, Joaõ tahe taijoi rierynanyre.

² Tai rierynanyre. Kai bexitòenykeki, kawese marybekre: —Waha, ani ibutumy tamywimy. Wylemy mynake iny òlòdỹmy.

³ Rỹsỹna txuõ txuõlemy biwahinybenykre.

⁴ Inyòraruna biixãwidinykre, iny iwitxira-dori taòraruna ariixãwidinykre. Waatysyrenyõmy òraruna-txi.

⁵ Jesuisi heka taerydỹyna mahãdu rierynanyre ijyy-di: —Kai arỹsỹnaõmy bonykeki, abiòwa-ò make ruetya rexitòedỹmy rỹsỹnaõ huòtemy bidiwykemy: —Wy, ahina inataõ wadee bidihuòteke.

⁶ Wabiòwa rehemynyneri bedetỹi-ribi. Aõ heka wawahisidỹkõnare.

⁷ Tii òsana myỹ adee rarybekre: —Wadee ixitòedỹõmyke ruetyahakỹmy. Arỹiõtyhy wahe-rina-ribi rexiyrubunymy heka rãireri. Ibutumy iny heka rõrõmy rỹireri. Uladu, tule iumy rõrõmy rỹireri. Wadee ixitòedỹõmyke.

⁸ Rexitòenyhyhyy tai hyyhyy rỹikeki tai ihãrele rỹike. Abiòwatòenamy aõkõ kỹnyhe rỹike. Textìòenyterikile rỹike.

⁹ Tai heka adeereny rarybereri. Bexitòenykeki, biwyke. Biijeke aõbo teijeteri, tai tahe mahake. Ijòtòbòna bihetenyke tahe adee riraynomy tahe malòke. Tai tahe adeereny rarybera. Ibutumy rexitòenymahãke, tamy riwahinymahãke. Ibutumy iny riijemahãke, tai rahake. Iny rihetenymahãke riraynyke.

¹⁰ Tai adeereny rarybere: –Ixitòedỹỹki iny aõ rimymyhỹre. Aõitxe-ki aõtxi ijara rỹimyhỹ. Ijò-di ròtemy ijara-ki iny ralòmyhỹre. Ijò-di ròtemy ijara-ki, iny ralòmyhỹre.

¹¹ Uladuõ tyby-ò uturamy rexitòenykeki aõbo, he-mylalaõ tyby tamy riwahinyke irỹsỹnamy? Timyki tuukõna! Kaiboho kiamy aõbo botỹỹnybenykre? Timyki tuukõna!

¹² Uladuõ tyby-ò hãniesimy rexitòenykeki aõbo, itytibòrò tamy riõkre. Timyki tuukõna!

¹³ Kaiboho aõbina binahakỹdile tahõtìnymahãtenyté, aõwihikỹ aõbohe ariòrereny-ò biwahinyke. Boreny aratyre heka bedede rieryke, Deuxu wahe. Tamy bexitòenybenykeki, tii Deuxu Tyytybytyhy adeereny riwahinyke.

¹⁴ Ixityre tasỹ hãbuõ raremyhỹ irybeõmy. Jesu-isi taile ratximyhỹ tahe tyytybybina riòlòdỹỹnyre iribi. Iu tyytybybina iribi rohonyreu tahe, hãbu rarybere kia rybeõmy ratximyhỹré wahe. Tahe iny sõwehekỹ mahãdu sõwemy idi rabedeòtiimy rỹire.

¹⁵ Inyõ tahe, inysõwehekỹ yluduõ tahe kiamy

rarybere: –Kia diabo ruru-di, Belisibu ruru-di heka iribi riòlòdyỹnyre. Tii tyytybybina mahãdu wedu rare.

¹⁶ Ijõ tamy rarybere: –Jesuisi, araeryrenykre inihe aõ biditeòsinykre wadeereny. Inatyhy aruru biuludu ratximyhỹre. Widỹỹnaõ inihe wadeereny bitỹnynyke kialemy heka rarybemyhỹre urile ri-urihimy tamy aõ itxerenamy riwinykelemy.

¹⁷ Jesuisi tahe rierymyhỹ aõmybo raraykynymyhỹreny. Tai heka tamy tuu rarybere: –Kia iny mahãdu wiribi hitximy raraykywydnykeki, tii tahe rexihuke itueke, sỹ mahãdu tule wahe.

¹⁸ Timybo Satanasiboho bede widee ribinanymyhỹrenyeki, awityhymy roirekre. Jiarỹ araeryrenyreri timybo taraykynytenyteri. Aõma Satanasi ruru-di tyytybybina ariòlòdỹỹnykemy tarybetenyteri heka reeryreri.

¹⁹ Kia riki ariwinykeki, kaiboho tule wawesele tewinytenyete. Timybo? Mobo awiòhedỹỹdureny rare? Satanasia aõbo? Kaiboho boibenyke ix-itòedỹỹmy awiòhedỹỹdureny-ò.

²⁰ Jiarỹ Deuxu ruru-di ariòlòdỹỹnykeki, kaiboho bexiijebenyke, Deuxu Iòlòna tahe adeereny iòhòra.

²¹ Hãbu deburehekỹ tadebòna-di taheto riyrubunykeki, rexityhynymy ronyke. Iaõmydỹỹna ibutumy iyrubudỹỹnamy rỹike.

²² Tahe ijõ kedehemykyke iratyre teburetyhy, tahe iaõmydỹỹna ibutumy iribi riwyke.

²³ Iny wawana aõkõ ratxirerimy ihỹre, tii heka waribi hitximy ratixmyhỹre. Iny wawana aõkõ ratxireri, tii tahe aõtxile ramyhỹre ixideòna.

²⁴ Jesuisi ijõ ijyy relyyre: –Iny-ribi tyytybybina

ròhònymyhÿreu, tii heka rake igitawo-di rake titx-ibo. Rubumy rarunymy rake. Bedeõ-ki rahakeki tahe, røhõtinyke. Aròðsekre, tikibo rarawãhãðle.

²⁵ Ixyby kòðòðsekeu tahe, isÿ ibutumy, tytymy roike iruxeraõ.

²⁶ Idi igityre ijõ rimyke debò inatxi reurò tyyty-bybinaõ. Idi tahe tamy rasÿnyrenyke. Iratyre tyhy wahe ibina. Iu kia ixisohojimy tyytybybina-di aõmysÿdÿÿmy raremyhÿu tahe, ihewo-ribi rimyra tahe iroona-ribi tahe aõnityhymy releke. Ibinatyhymy tamy rare.

²⁷ Iribi tahe hãwyyõ ryryre ibutu ijohonamy: — Hãwyky heka aratxurananyre, aratibienyre heka iny bedekòby rare.

²⁸ Tahe Jesuisi rarybere: —Deuxu Rybe tyhy-dÿÿdumy iratyre wadee awire. Deuxu deysanamy tamy kanakemy idi watxireri.

²⁹ Idi tahe inysòwetyhymy dehemynyde Jesuisi-ò. Jesuisi kiamy rarybere: —Iny heka kia mahãdu ibinatyhymy rÿire aõwihikÿle heka riijemy rÿire. Itxerenaõmy robikre ratxireri tahe itxerena Jonasi-ribi nadelemy tahe robikre.

³⁰ Jonasi heka Ninive hãwã mahãdu-ò itxerenaõ heka tii rare. Tule jiarÿ heka Deuxu Riðre Hãbutyhyhykÿ rare wijinabòdu mahãdu dee itxerenaõ jiarÿ rare.

³¹ Ibòò mahãdu bede konana-ribi iòlò hãwyy Salomaõ bede eryhykÿ-ò ijohonamy irehe-ribi nade. Wijinabòdu mahãdu taheka naõhyamahãde wadee ijohonamy. Salomaõ ratyre heka jiarÿ watxireri. Ikonana txu tahe ibòò iòlòhãwyy rÿikre rarybekremy. Tii rarybekre: —Anoherekibo Jesuisi deramy teakamahãtenyte

wahe. Timykibohe irybe bedekeryna-kò ijohokuna r̄yikōmyh̄ȳreki wahe.

³² Ninive h̄awā mahādu tule r̄yikre rarybekremy iwesele. Jonasi rybe t̄ȳnyd̄ȳna-ki rexirāh̄irenyre. Kaki heka Jonasi ratyire h̄abuō ratximyh̄ȳre, jiar̄ȳ wahe. Wadee ijohonadu aōkō heka toite.

³³ Moheka loosōnaō rideōhyymyh̄ȳre herinarawo-txi toosō iwasihiik̄ȳmy roosōmyh̄ȳkemy. Tiiemy heka biuōhyy rademyh̄ȳre ibutumy bede rat̄ȳnymyh̄ȳkemy.

³⁴ Arue umy dori it̄ȳnymy roimyh̄ȳre. Arue awikeki heka ibutumy aumy awikre. Arue ibinakeki tas̄ȳ aumy heka bedelorokile r̄ȳimyh̄ȳkre.

³⁵ Awo toosōmy ratximyh̄ȳre wana, bexiijemahāke. Aumy biemahāke bedeloro-ki rurunyheny.

³⁶ Bedelorohok̄ȳ aumy-ki r̄ȳiōmyh̄ȳre wana, tai tahe boosokre ibutumy titxibo bede-txi mamahākre wana.

³⁷ Jesuisi kiamy rarybereu tahe, fariseu mahāduō tamy rarybere: –Manake was̄ȳ-ki rikiroxikremy. Tai tahe Jesuisi rare, ralore, ronyre roximy.

³⁸⁻³⁹ Jesuisi ronyreu, tebò risuhòōre. Tai tahe idi bede riōtiinyre. Jesuisi rarybere: –Kaiboho fariseu mahādu, ibutumy heka texisuhòsuhòmahātenyete. Ebò tesuhòmahāte, aumy ibutumy tesuhòmahātenyete. Webòròsityyludu wahe. Kaiboho heka isuhuk̄ȳlemy toimyh̄ȳte ibutu aōikōkō-di isumy roimyh̄ȳre aworeny-ki.

⁴⁰ Iu heka òbitimy taraykynytenyōhyymahātenyete. Deuxu heka iwebrò ludu riwinyre, inatyhy? Tule aworeny, araykyreny wana riwinyre.

41 Iny aõkõ mahãdu-ò maruxetòemyhỹbenyke. Tai tahe byranybenykre heka. Ibutumy awo-ki, ahana-ribi tule ryranýkre.

42 Kobe làhàxe kaiboho fariseu mahãdu. Kaiboho Deuxu dee tewahinymahãtenyke uriõno. Debòwiò aõ tetatenywa heka, sohoji tewahinymahãtenyke. Tule aõmydỹnareny aoworoludurenyõ tewyteny wana, tule tewahinymahãtenyke. Kia awire, biwahinymahãbenyke. Urile tahe teerytenyõhyymahãtenyke Deuxu luuna, Deuxu òbitina. Biwahinymahãbenyke heka Deuxu dee aõmydỹnaõ. Tii tahe awire. Tule nohõti losarenyõmyke, luuna, òbitina.

43 Kobe làhàxe kaiboho fariseu mahãdu. Do-hodỹna heto luureny ikoòhòkỹle heka torokom-ahãtenyke. Kaiboho arybedỹnareny-ki awimy tahamyhỹtenyke.

44 Kaiboho kobe làhàxe. Wobrona wesemy toite. Iwese iny rubuhãloo tyremy iny rariamyhỹre wese ierykõnamy, kiawesele toite.

45 Bede ywina bede erydỹyduõ heka tai ratx-imyhỹ. Tii tahe Jesuisi-ò rarybere: –Erydỹydu, kai heka aõbinahakỹlemy wamyreny tarybeteri, kia wese rybe-ki.

46 Inatyhy rare. My tahe Jesuisi risỹnyre: — Inatyhy dori tule bironybenyke aõhòkỹmydỹnana. Iny dori adeereny rarybemyhỹre iny rybe bityhynymyhỹbenykemy tahe ihãrele tetyhynyõhyymahãtenyke. Bede ywina ritidỹna tewinymahãtenyke, ihãrele tahe tiu heka tetyhynyõhyymahãtenyke.

⁴⁷ Kobe làhàxe kaiboho, alahireny, alabiereny wese toite. Iwese tiiboho Deuxu rybedu rirubunyre wese kaiboho toite.

⁴⁸ Kaiboho rubudỹỹdumy toite. Òbitile tewinymahātenytelemy ixidee tahōtinymahātenynte.

⁴⁹ Deuxu tahe rarybere umyrenymy wahe: — Tahe jiarỹ aditeònykre heka Deuxu rybedỹỹduō tule Deuxu deòdỹỹnaō heka aditeònykre. Imahāduō birubunybenykre ihona tahe biteònybenykre.

⁵⁰ Kaiboho heka bede òrarumy boibekre kia rubudỹỹ òraru erydumy wahe.

⁵¹ Abeli hālubu txiwina tahe xiwena hure rubuna. Idi tule Zacaria hālubu txiwina wahidỹỹna bire-ki heka Deuxu hetobire-ki. Kohe, ihure rubureny òraru-ki aōhōkỹhỹkỹmy biòwinybenykre.

⁵² Kobe làhàxe, kaiboho bede ywina erydỹỹdu mahādu, bedeeryna ijò rayna dinoduboho wahe. Kaiboho tahe terònyōmy bede eryny heto-ò. Tule inywitxiraō tetòenytenynte iròte lau.

⁵³ Jesuisi ròhònyreu, teburemy tiiboho ritỹỹraxinymyhỹre aōna aōnamy.

⁵⁴ Tuu ròtỹỹraxidỹỹmyhỹre timykibo rirutaōnyrenykemy.

12

¹ Sōwemy iny tahe ributunyre. Ube tahe rỹximy ratxireri. Tahe juhoo Jesuisi taerydỹỹdu mahādu-ò rarybere: —Fariseu mahādu, saduceu mahādu urina biebenyke. Tiiboho dori ruidu mahādu roire.

² Wasimy wiji adeereny relyyre. Tiu ta ibutumy ijyynamy rỹikre

³ Aõbo wasimy wiji taholate heka ibutumy bi-urasòmy ratỹnykre.

⁴ Uritere iny lau brebuõmyke. Aumyle tii rirubunykre. Ijõ ibinamy adee aõkõ tii rotỹỹnykre.

⁵ Iny lau sohojile breburenyõmykre. Deuxu lau ta buberukre. Tii dori atyytyby bede bina-ò rahuke ixideewikeki.

⁶ Nawiiõ kaiboho bidymyhỹbenyke iòwy riðre iny heka riwymyhỹrekre. Ibutumy heka Deuxu nawii rieryre sohoji sohojimy.

⁷ Deuxu ara erymy heka aõma arati-ki tiwesebo aradeti rỹimyhỹre rierymyhỹre. Brebuõmyke, aõma Deuxu heka anaerymyhỹre nawii sõmo ratyre heka rierymyhỹ.

⁸ Kai marybeke: —Jiarỹ Deuxu retyhynyre dori tahe umy arelyyke Deuxu ýjukomy rarybeke biu-ki wahe, jiarỹ Deuxu Riðre Hãbutyhyhykỹ wahe.

⁹ Iny sõwehekỹy-ki riwatxiõnykeki tule aritxiõnykre jiarỹ Deuxu ýjuko-ò.

¹⁰ Inyõ Deuxu Riðremy aõbina binamy rary-bekeki, irybe-ribi nohõtilosa rỹikre. Deuxu Tyytybytyhymy tahe inyõ ibinabinamy rarybekreki tahe, aõhõkỹmy rotỹỹnykre irybe òraru-ki.

¹¹ Aramykeu heka uritere nohõtiõmyke aõmobo marybekremy ywisidỹỹna-ki. Bede heka ari-wahinykre rybedỹỹnanau. Rybeõmyke ikotyre.

¹² Kai ixivanale aõkõre marybeke. Deuxu Tyytybytyhy arãwiðhenanymyhỹreny.

¹³ Hãbuõ inysõwey-ki tahe Jesuisi-ò rarybere: —Wanyrỹ, Waha rurura. Waseriðre tahe ibutumy

waha aõna aõna riwyrā ixidee sohojile. Tamy marybeke wadee ritxuranykemy.

¹⁴ Jesuisi tamy rarybere: –Hābu, kia waaõmydỹyna aõkõ rare. Timybo ayreny-ki araywisidỹnyke?

¹⁵ Tahe Jesuisi ibutumy iny-ò rarybere: – Warybe-ò bodoholabedenyke. Ixityhyõmy! Arutyhy heka aaõna aõna-ki aõkõ rare aõna aõna sõwrehāre.

¹⁶ Tahe Jesuisi iyyymy ròkewesenadỹyre: – Hābutyhy riki ioworu nihikỹre. Tahe sõwemy rỹsỹna ributunyre.

¹⁷⁻¹⁸ Iheto tahe iyjare ibutumy ributunykemy. Tahe ixidee rarybere: –Aõhebo arotỹnykre? Waaõnaheto butumy aritxiwikre. Ijõ iribi inihikỹmy ariwinykre. Tai ibutumy waaõwiwi. tamy aridekre.

¹⁹ Tai tahe ibutumy waõwiwi-di areysakre. Arexielehynykre, ariroxikre, ariõkre. Waruhyy areysakre.

²⁰ Deuxu tahe kia hābu-ò rarybekre: –Hābu itxỹtere. Kai wijirulemy burukre. Tai tahe mobo aõna rimykre.

²¹ Jesuisi taijyy rihure rexirybenymy. Kia heka aõhebo rotỹnyre iny ityhy mahādu. Tiiboho dori Deuxuòle ityhymy aõkõ ihỹrenyre.

²² Kia heka Jesuisi taerydỹyna mahādu-ò rarybereri. Uritere nohõtiõlemy arỹsỹna tule atyymy, idi matykynykemy.

²³ Aumy heka rỹsỹna ratyre aõnityhy ratximyhỹre. Aumy heka atyky ratyre aõnimy ratximyhỹre.

24 Nawii-di betehebennyke. Tii-boho heka ioworuõrenyrene. Tarÿsÿna riyrubunyõhyymyhÿrenyrene. Deuxu heka nawii riyrubunymyhÿre, irÿsÿna tamy riwahinymyhÿre. Kaiboho tahe nawii ratyretyhy toite Deuxu dee.

25 Sõwetyhymy maraykywydynanykeki aõbo arumy arirarehemy mariake? Aõkõre!

26 Kia aõ iyjare tahe Deuxu-ò. Kia biwinybenyõkeki, aõherekibo ijõ aõna aõna nihikÿ-di tahõtinyinymyhÿte?

27 Betehemy inihe noijasa-di. Aõma tiiboho raaõmysÿdÿÿõhyymyhÿrenyrene. Ihãre tahe iruxerarenyrene ityy wiwihikÿrenyrene wese. Tyy ixidee riwinyõtyhy Deuxu rityyny wihikÿ heka tyy wihikÿ tamy riwahinyreri. Salomaõ heka ityynihikÿ rare. Ihãre tahe ityy heka awityhymy aõkõ noiròsò wese.

28 Deuxu heka noijasa rityynymyhÿre kia wijilemy idi ihÿre. Biurasòmÿ tahe ixãwimy reamyhÿre. Tii heka tyy adee kidiwahinykre. Tai tii atyyreny. Tai ta ixinohõtiyredÿÿrenyõmy. Aõherekibo ainatyhyna ibutere?

29 Tahe raykyõmy nohõtìõmy titxiribibo arÿsÿna adee kanakredi.

30 Tyhydÿÿdukõdu mahãdu heka tuure. Iny-tybyreny heka rierymyhÿre aõmybo tarumahãte. Ibutumy heka arerymyhÿre aõmybo teamyhÿte.

31 Tii Deuxu aõmy dÿÿnana sohojidile maraykynykeki heka tii ibutumy adee riwahinykre.

32 Brebuõmy ahãbenyke wariòrebobo. Deuxu Iòlòna adee kanakemy, Deuxudeewina wahe.

33 Aaõna aõna-di bohonybenyke. Iòwy tahe

iaõkõdu mahãdu-ò biwahinyke. Anieruhyna wiwi-hikỹdile boibeke. Kaki ibutudỹylemy heka biu-ò bibutunyke. Tai heka judðera aõ riròðtyhy tule rararyõtyhy. Tule tai wasidu ralòðtyhy.

³⁴ Tikibo aõwireny rỹikeki, tai heka araykyreny ratximyhỹre.

³⁵ Ijõ tahe Jesuisi rarybere: –Kaiboho bexiy-winybenyke, ibutumy aõhebo rotỹỹnykremy bexiy-winyke. Awereysanareny-di atyky beximyke. Aloosõna bitoonyke.

³⁶ Deòdu mahãdu wesemy boibenyke. Bexiy-winybenyke awedu dehemyynyna-ò, tii worana bedehesi-ribi rehemynyremy wahe. Iu rehemynyreu, teòdu mahãdu heka ijò riraynyke.

³⁷ Tiiboho riraðrenykeki, deysamy rỹikre. Iwedu dori reximykre ityky wereysana-di tahe rỹsỹna teòdu mahãdu-ò riwahinykre.

³⁸ Tii ruwetyakile rehemynykeki, deòdu mahãdu reysakre. Tiiboho dori rexiraðmy rỹimyhỹrenyke.

³⁹ Tai heka iny rexiywinymy rỹimyhỹkemy rybe roimyhỹre awedureny kanakreki. Aõma hãbuõ kanakeki heka tiu aõma hãbuõ itxeredumy ronykeki heka, tiu hãbuõ iribi rawasinyõtyhy.

⁴⁰ Kaiboho tule bexiywinybenyke wadehemynyna txu heka biijemy bonymyhỹbenyke.

⁴¹ Tahe Pedro rarybere: –Wanyrỹ, kai wadeerenyle ijyymy telyyte ada ibutumy iny-ò aõbo telyyte?

⁴²⁻⁴⁴ Tahe Jesuisi riwyònyre: –Aõtxile inyõdee, tibo deòdu taaõmysỹdỹỹna riywinymyhỹre, kia idinodu tai awimy rahamyhỹre tii dori rỹsỹna òbitimy riõriõmyhỹre. Idi tamy aõwiwi riwahinykre

taaõna aõna-di itxeredumy tule risỹnykre.

⁴⁵ Tii iwitxiramy rexiraykynykeki tahe, ijõ teòdumy raòhòtemy urile idi risinymy kamy rexirybenymy: –Wawedu dori wiji aõkõ rarerikre.

⁴⁶ Tai ierykõna-di iwedu kedehemynykre. Tuu rierymy iaõmysỹdỹna-ribi ritamy aõhõkỹmy risỹnykre ityhydỹdukõdu mahãdu wese.

⁴⁷ Deòdu tawedudeewi rierymyhỹre. Tai heka tuu rotỹnyõkeki, tii tahe sòwemy aõhõkỹmy rotỹnykre, òhòtemy wahe, tamy riywinyõreki.

⁴⁸ Ijõ deòdu tahe tii iwedudeewimy rieryõkeki, tii tahe aõbinamy riwinykeki, tamy tahe urihimyo òhòte tai rỹikre. Inyõ sòwemy ityhykeki, sòwemy ijõ iny tamy rexitòenykre.

⁴⁹ Jesuisi ijõ rarybere: –Heòty-di bede ariworonykemy heka jiarỹ anade. Tii òte raworonykremy idi watxireri.

⁵⁰ Jiarỹ ratisebenaõwesemy aralokre. Arurukre dori. Ele elemy rỹikemy ixi-di watxireri.

⁵¹ Kaiboho tahòtinyte wadehemynyna-di. Ywina adiwydemy wadi tahòtinyte. Aõkõrehe, bede jei jeidỹmy anade iribi widee rahitxihitximy rỹikremy.

⁵² Iruyre inysỹ mahãdu heka widee rahitxihitximy rỹikre. Inataõ iny iuhe òludumy rỹikre.

⁵³ Hãbu mahãdu heka tyby òludumy rarekre. Hãwyy tule tadi òludumy rarekre. Iriokorese heka tariòrelahi òludumy rarekre.

⁵⁴ Ijõmy Jesuisi rarybere: –Iu biuwetyky biura-ribi ròhònyreu, Kaiboho kia rybemy tarybemahãtenyete biu kòdòakre. Inatyhymy biu ròamyhỹre.

55 Tule tarybemahâte. Yhy ibòò-ribi rebonyreu, bede ratòteekre. Inatyhymy tuu ratòteemyhÿre.

56 Itxenadÿÿdu mahâdu! Kaiboho kia terymahâtenyte bede, biu aõmydÿÿna tule iwitxira aõmydÿÿnana teerytenykõlemahâtenyte, bededÿÿnana konana eryna wahe.

57 Ijõ Jesuisi rarybere: –Kaibohole teywinyõmyhÿtenyte, aõòbitinamy wahe.

58 Aõòrarumy heka aòludu umy rarybekeki, idi ywisidÿÿna ube-ò aradykemy ratxireri, tii-wana widee marybeke idi widi bede biòbitinykemy. Aõkõkeki, tii aradykre ywisidÿÿdu-ò idi ròtenawo-ò soldado mahâdu araròtenykre.

59 Tiu heka aòlòkõmy heka mabekre. Ibutumy iòwy biòwynyke xiery bòhònyke.

13

1 Tahe inyõ Jesuisi-ò relyyre: –Pilato rybemy-namy Kalileia mahâdu rururenyre Deuxu-ò raxi-werenyriò.

2 Kia ta Jesuisi narybede: –Kaiboho timybo irubureny-di texinohõtinytenyteri. Ijõ wiratyre raòrarunanyrenyreki aõbo?

3 Ture aõkõ, kaiboho bexirâhĩõbenykeki tule burubenykre irubureny wese.

4 Iasÿse ijõ. Iu Silòe hãwã mahâdu tyre heka heto rarie resereu 18 iny sõwe rirubunyunyrene. Arãÿÿraxikre Jerusalẽ hãwã mahâdu ratyre raòrarunanyrenyreki aõbo? Aõbo tahõtinytenyteri?

5 Kaiboho bexirâhĩõbenykeki tule burubenykre irubureny wese.

6 Tahe Jesuisi kaa ijyy-wana rikewesenanyre, Figoratyò wese heka. Tahe Jesuisi kaa ijyyimy

delyyde: —Hābu oworu-ki figoòõ rỹimyhỹre. Tii iraty dilawijunyde tiubo. Tahe iraty-txi reakõre.

⁷ Tahe hābu taoworu-di itxeredu-ò narybede: —Inataõ wyramy relawijunyre tahe aõkõhyra. Urile ta biòròkre. Iraty ihoõreki, awi aõkõ rare.

⁸ Tahe oworu-di itxeredu dirawyònyde: —Wawedu, txioini kawyramy idi warukikre, isu ariywinykre.

⁹ Aõkõhykrekreki tahe urile raorokre ijõ wyrau.

¹⁰ Judeu mahādu elehyna txuu Jesuisi rotohodỹmyhỹ judeu mahādu dohodỹna heto-ki.

¹¹ Tai ta hāwyyõ ratximyhỹ. Tii 18 beòra webinadumy ratximyhỹ tyytybybina òraru-ki. Tii iumy rarabunymy rariamyhỹre. Ixitaradỹ risiranymyhỹre.

¹² Jesuisi tuu robireu, tamy narybede: —Hāwyy, kai heka teytemy tate.

¹³ Tahe Jesuisi tebòmymy rimyre iuleta reytere. Tai tahe hāwyy heka Deuxu riwowydynyre.

¹⁴ Dohodỹna heto wedu tahe ibinamy Jesuisi-ki rahare, judeu mahādu elehynatxureki wahe. Takamy inyreny-ò narybede: —Debò sohoji reurò txumy aõmysỹdỹnamy rỹimyhỹre iu heka adeytemy ixi-di bòdòimyhỹke, judeu mahādu elehynatxu ta aõkõre.

¹⁵ Tahe Jesuisi dirawyònyde: —Kai, itxenadỹdu tate uriteremy iximy rybedu. Kaiboho judeu mahādu elehynatxu dori abroneni, aawaru heto-ò toimahāte tuu teesenymahātenyte, tedymahātemy idi ibemomodỹmy bidybenykremy.

¹⁶ Kaa heka Abraõ riore riòreõ heka Satanasi 18 beòramy rimyre. Aõherekibo ta iribi retaraki sabadotxu ibinamy tahateri.

17 Tahe Jesuisi òludu mahãdu raixÿrurenre Jesuisi rybe òraru-ki. Tahe ixÿ mahãdu awityhymy tai rahamyhÿ iòraru-ki. Ibutumy reysarenre.

18-19 Tii rarybera: —Deuxu Iòlòna wexe aõwesere. Aõ-ò wexe rikiwesenanyrenre. Tiwexe ijyy kawesere? Deuxu Iòlòna heka alòbòròna sòmo sòmo wesemy ratximyhÿre. Raumynre heka òwòru rariwesele relemyhÿre. Nawiile tuu rÿtÿnymyhÿre kia òwòru-ò.

20 Ixityre tamy rarybere: —Aõ ijyy wese heka Deuxu Iòlòna rare. Aõwexe rikiwesenanyrenre.

21 Paõ ixìòlòdÿÿna wese rare, iuri rare. Hãwyy paõ riwinymyhÿre, inataõ urihixina-ki iuribemy riurinymyhÿre. Tai tahe raubÿtÿmyhÿre, rexiòlònymyhÿre.

22 Jesuisi tahe Jerusalẽ hãwã-ò rareu, hãwã hãwãmy rotohodÿÿmy.

23 Iu inyõ ritÿÿraxinyre: —Wanyrÿ, Hedu mahãdu we sòwekre aõbo?

24 Jesuisi tamyreny narybede: — Bexityhnybenyke ijòyja-di birònybenykemy. Sòwemy iny tahe ròtemy reakre tahe ralòõhykre.

25 Hãbuõ kie taheto ijòtòbòna ritòbònyre. Iu kaiboho uritere bydrydenykre: —Wanyrÿ, aralòrenyke ini. Kiata tii anawyònydenykre: — Tiludubo toite, araeryrenyõre.

26 Kamy ta bidiwyònydenykre: —Inybohole riroximy roiremyhÿ. Wahãwãreny-ki tòbedeerydÿÿmyhÿ.

27 Ixityre anawyònydenykre: —Boibenyke aõbina bina widÿÿdu. Tiludubo toite dori reerykõre.

28 Deuxu iòlò-ki Abraõmy, Ijaimy, Ijaòmy, tule ibutumy Deuxumy rybedu mahãdumy bobibenykreu, kaiboho malòbenyõtyhy. Tai hii, ibru, jumytata rỹikre.

29 Iny ibutu bede bede-ribi, Ibòò-ribi, Iraru-ribi, Biura-ribi, Beà-ribi Deuxu iòlò-ò hãwãmy.

30 Kiaremy ta, koludu mahãdu heka ibutuhewomy kedeakre. Ikõmyta, hewoludu mahãdu, koludumy kedeakre.

31 Iu ta fariseu mahãdu Jesuisi-ò narybedenyde: —Mahenyke, Herodi dori arubudỹỹmy araijereri.

32 Jesuisi dirawyònyde: —Bòòsebenyke kamy ijòrò-ò marybebenykre: —Jiarỹ tyytybybina iny-ribi retareri, tule ròteytedỹỹreri wiji biurasòmmy. Ijõ txumy ta waaõmysỹdỹỹna arihukre.

33 Kiaremy ta kia rewinyreri arihukre. Deuxumy rybedu dori Jerusalẽ hãwã-ki sohojile ruru-rukre, iwitxira hãwã-ki ta aõkõre.

34 Jerusalẽ, Jerusalẽ hãwã, amahãdu heka rirubunyrenyre Deuxu rybedu mahãdu wahe. Iwese hãnie tariòre ributunymyhỹre wese terawo-ò, kia wesele arayrubunykeny rexinohõtinyre tahe kaiboho terarenyre.

35 Aheto-ribi heka Deuxu rexitakre. Kaheka ararybekre adeereny: —Wamy heka bobioõtyhy ixityre. Tiutxumy kamy bexirybenykre bede-ò, myỹ: —Deuxunimy nodu awityhy heka rare. Kiaule wamy bobikre.

14

1 Sabadoõu Jesuisi heka fariseu mahãdu wedu mahãduõ heto-ò ralore roximy. Tahe iny idi retehemyhỹreny.

² Iu inyõ taruti, tadera-di taritari-di tamy dehemynyde.

³ Tahe Jesuisi narybede bede ywina erydÿÿdu-ò, fariseu mahãdu-ò: —Sabado txuu deytedÿÿwe awire aõbo, aõkõre aõbo.

⁴ Tiiboho rirawyõnyõhyyre. Tahe Jesuisi hãbu riteytenymy bede riywinyre iribi tahe riòlòdÿÿnyre.

⁵ Ixyby narybede Jesuisi: —Txibo kaiboho ariõreõ ada abroreniõ hãloo-txi resekeki, bitabenyke Sabadotxu hãrele. Aõhe inatyhy.

⁶ Tiiboho rirawyonyõhyyre.

⁷ Tahe Jesuisi roxidu mahãdu-di retehemyhÿre. Tiiboho dori rynana wihikÿ-txi rononymhÿreny. Tai kamy tamyreny rarybere:

⁸ —Txibo inyõ bedesanaõ araarikeki. Uritere rynanawi-ò rÿõmykre. Txibo dori inyõ aratyre ityhy kanake lau.

⁹ Tukeki bedesa dinodu inyõ aratyre-ò ryanana-txi ronykemy adee kanarybekre. Tai tahe maixÿrumy rynana bina-ò bonykre.

¹⁰ Kialemyta inyõ araarikeki, rynana bina-txi bonykre. Tahe bedesa dinodu adee kanarybekre: —Wy, katxi bodonyke ryanawihikÿ-ò. Tai tahe kai mabedesakre ibutuko-ò.

¹¹ Tahe ixityhydÿÿdu mahãdu uritere reakre. Kõmyta uriixi dinodu mahãdu rawowydykre.

¹² Tahe Jesuisi bedesa dinodu-ò rarybere: —Txibo roxina biwahinykeki, uritere asÿ mahãdu, aery mahãdu, ityhy mahãdu aarixiõmykre. Urikõ-ribi iwese teariteri wese araariheny.

¹³ Tukõmyta roxi biwahinykeki, uriteremy rÿira mahãdu, iny tiere mahãdu, iny ruetà mahãdu

biarikre.

¹⁴ Tai adeysatyhymy mabekre. Tiibocho dori tiu ixiwesemy araariõtyhy. Deuxu tahe aòwydÿÿdukre iu bede awikreu.

¹⁵ Ijõ roholare Jesuisi rybe tai tamy rarybere: — Deuxu Iòlòna-ki, òwòrubese rÿdu mahãdu reysamy rarekre.

¹⁶ Tahe Jesuisi rarybere: —Inyõ roxina nihikÿõ riwinykemy ratxireri. Sòwemy iny ritobinyre.

¹⁷ Rexihumy rÿireu, teòdu mahãdu bede riywinyre iny kididykremy.

¹⁸ Sohoji sohoji tahe tarybe tamy riwahinyre. Ijõ taoworu tÿmyra-ò reteheke. Ijõ kanaõtyhy heka.

¹⁹ Ijõ tahe broreni debòitue riõbranyre tai riurihikreki kanaõke.

²⁰ Ijõ tahe hãwyy herinamy rexihumy rÿire tai kanaõke.

²¹ Teòdu tahe ròðsera tawedu-ò tamy relyyre. Tii reburere tahe rarybere: —Wylemy makre ibutury-di hãwã-ki. Ibutumy iny witxira witxira bididyke, iaõkõ mahãdu, itiere mahãdu, ruetà mahãdu wahe.

²² Iribi tahe teòdu ròðsera rarybere: —Ibutumy rewinyre wawedu, tahe heto rÿxiõmy rÿire.

²³ Tahe iwedu ixybymy bede riywinyre hãwã-ribi ibyrary-ò iny kididykemy: —Aruru-di bididyke, waheto dori rÿximy rÿirakremy idi watxireri.

²⁴ Juhuu watobidÿÿna mahãdu warÿsÿna riurihiõtyhy.

²⁵ Iu sòwemy iny Jesuisi heludumy roire. Tai Jesuisi tamyreny rarybere:

²⁶ —Kaibocho aõbo inatyhymy waluu mahãdumy toite. Tuu tarybeta. Tahe boluu, adiluu,

ahãwyyлуу, ariòreluu, aseriòreluu, ixiluu ratyre waluuòkeki, wamahãdumy aòkõ boibeke.

²⁷ Inyõ riwaheludunyky ratxireri, tii juhUU taitxeò riwykre. Kialemy tahe riwaheludunyke inatyhymy.

²⁸ Inyõ heto rare riwinykemy ratxikeki, juhUU iòwy-di rõhõtynykre. Inieru rimykeki tahe riwinyke, aòkõkeki tahe riwinyòtyhy.

²⁹ Tii tuu rõhõtynyòkeki, tii ibutelemy riwinykre tahe inieru ituereu, ibutumy iny idi risinykre:

³⁰ –Tii taheto rarei ritelenyre tahe rexihuòtyhy.

³¹ Iòlòò wou riwinykeki, juhUU taaòbinadu mahãdu-di rariamyhÿre. Idi rõhõtinyre. Ijõ iòlò wawiò mil soldadomy ijòdikeki, tahe tii debòwiò mil ijòdikeki, tahe wou riwinyòtyhy.

³² JuhUU tahe teòdu riteònyre ijõ iòlò-ò ireheribile tii-wana wou ixãwidÿÿmy rarybekemy.

³³ Akireny tule iweselere. Ibutumy aaõna aõna biriòbenykeki, waheludu mahãduõmy boibeòtyhy.

³⁴ Saa heka aõni awi rare. Tatxuberere rexi-hukeki tahe turibi ixãwike.

³⁵ Tai tahe suurina-ki ahirana silÿna binakõki awiòhõtidiirenykeki boholabenyke warybe-ò. Suò awiõre, tule ahirana bitòbònykemy awiõre. Urile idi behuke. Kaiboho òhõtidiirenykeki, boholabenyke!

15

¹ Idi nieru tarasadu mahãdu sòwemy tamy roholamy doide. Tule ijõ iny òrarudu mahãdu rehemynyre.

² Fariseu mahãdu, tule bede ywina erydu mahãdu kawesemy rarybere: –Kahãbu ibinare.

Tii òrarudu mahãdu-wana riroximyhÿre, iny iehehe-wana.

³ Idi Jesuisi rierynanyre ijyy-di rawesenanyre.

⁴ Kaibohoõ òsana 100 budoeni ijõdire. Sohoji heka iy-ribi iõre. Kai aõbo makre ijesemy? Kohe, iuhe, 99, birike bedero-ki tahe biòryhyyke. Aõhe inatyhy?

⁵ Mahakre wana tahe eysamy atxikre. Tahe bidyke iuhe-ò.

⁶ Taheto-ò rehemynyreu, tasÿ mahãdu-ò tahe ritobinyre: –Wawana ini kÿny bedeysabedenyke. Wabudoeni-ki rahara, iõreõ wahe.

⁷ Iwesetyhylemy taheka adee reerymahãre iny òrarudu mahãdumy. Iu sohoji iny rexirahÿkeki, biu-ki deysana sõwemy rÿikre. Iny òbiti 99my tahe urihimyo biu-ki deysana rÿikre.

⁸ Ijõ Jesuisi relyyre: –Hãwyyõ òsÿny womati ura nieru debòwiò dire. Sohoji iõre-wana, tii riijeke inatyhy? Loosòna ritoonyre, iube riwysynyre, sõwemy riijeke ihyyemy tahe tai rahara.

⁹ Tii itxi reakreu, reysamy rÿira. Iu tasÿ mahãdu ritobinyre: –Wawana inihe bedeysabedenykre. Wanieru-txi dokuri rahara.

¹⁰ Jesuisi tahe ritÿnynyre: –Iwesetyhyle biu-ki rare. Deuxu ÿju mahãdu reysamy roirenyre, sohoji òrarudu rexirahÿreu.

¹¹ Ixyby tahe Jesuisi narybede: –Hãbuõ iriòre inatxire.

¹² Tiutxumyta ihelÿÿna tyby-ò rarybere: – Waha, ibutumy aõna aõna burukreu wadee rawahikre, wijile bidiwahinykre. Tyby tahe iaõna aõna jura tamy riwahinyre.

13 Iriòre helỹỹna tahe ibutumy taaõna aõna-di rare irehe-ò, iwitxira bedehãwã-ò. Tai aõbina binale riwinymyhỹre. Ibutumy tanieru tai rahure.

14 Taaõwiwi rahu-di ta, tai rama ibede mahãdu rahumyhỹre. Tii uritere reamyhỹ wahe.

15 Tahe aõmysỹdỹỹnamy rarunyre. Hãwãduõ tahe taixỹniòwedỹỹdumy bede riywinyre taoworu-ò.

16 Tai rama risamy ta ixỹni rỹsỹna rỹsỹmy rexi-nohõtinyre. Tahe aõkõre.

17 Kia tahe tõhõti deade. Kamy dexi-nohõtinyde: –Yla aõkõ waha aõmysỹdỹỹdu mahãdu irỹsỹnadireri iwana jiarỹ kaki rama warubudỹỹmyreri.

18 Ixyby aròðekre. Kamy Waha-ò arexiry-benymy: –Waha, Deuxuko-ò ako-ò rexiitxỹtenyre jiarỹ raòrarunyre wahe.

19 Ariòre wese aõkõmy wadi mabeke, waitxỹte òraru-ki. Aaõmysỹdỹỹdu mahãdu wese ta ararekre myỹ tii rõhõtiny.

20 Tii tahe tyby heto-ò rare. Irehemy nadeò, tyby tuu dobide. Idi rexiwobrunumy tamy rajaranyre iwehityhydỹỹmy.

21 Tahe tii narybede: –Waha, Deuxuko-ò, ako-ò rexiitxỹtenyre jiarỹ, raòrarunyre wahe. Ariòre wese aõkõmy wadi mabeke, waitxỹte òraru-ki.

22 Iule ta tyby teòdu mahãdu-ò rarybere: –Wylemy tyywihikỹ tymyra-di bityynybenyke. Debòò tebò-ò roikre. Waõ-di rawanykre.

23 Tasỹse broreni riòre dedi birubunybenyke. Idi rikiroxirenykemy rekeysarenykre dori.

24 Wariòre dori rubu-ribi wese rexixara. Ikõ-ribi itxi ijara rỹira. Tahe rawobedesarenyre.

25 Iwana ta iumydela tahetoreny-ò

dehemynomy nade taaõmysÿdÿÿna-ribi. Tahe wobedesana-ò roholamy.

²⁶ Tahe deòduõ-ò narybede: —Aõhereriwe.

²⁷ Dirawyònyde: —Ahelÿÿna kie ròðsereri aõhe rotÿÿnyõhyylemy. Tai boo broreni rirubunya.

²⁸ Iumydela tai reburere ròte deramy reare. Idi tyby tamy nade riròtenykemy.

²⁹ Tahe iriòre dirawyònyde: —Aõhe òhòkõ adee raaõmysÿdÿÿnomyhÿre. Ibutumy arybe retyhynomy watximahãre. Ihãreta budoeni wadee tewahinyõhyymyhÿte, waijoi mahãdu-wana idi arexideysanykemy.

³⁰ Katahe ariòre urile aõnawiwi rahura wedena mahãdu-wana. Ròðsemyta kai broreni riòrede tamy terubunya.

³¹ Tai tyby dirawyònyde: —Wariòre iny ratximyhÿre kiaremyta ibutumy waaõwiwi heka ahõrõle rare.

³² Iny bedesarenomy heka kawese rewinyre, wadee awireki. Ahelÿÿna dori ruruwese-ribi rexixara. Ikõ-ribi itxi ijara rÿira. Tahe rawobedesarenyre.

16

¹ Jesuisi taerydÿÿna mahãdu-ò relyyre ijyyõ: —Hãbuõ inieru sõwere. Tamy deòduõ ibutumy inieru-di raaõmysÿdÿÿre ijõ nieru ributunykemy. Ijõtxu tahe inyõ rarybere: —Eòdu riki heka anieru-di òbitimy aõkõ raaõmysÿdÿÿmyhÿre. Anieru sõwemy rexihumyhÿre.

² Tahe didyde ixidee taconta retehekemy. Tamy rarybere: —Inatyhymy aõbo umy iny rarybemyhÿre? Wanierumy tyyrity aretehekemy

watxireri. Òbitimy aõkõkeki, waribi arateònyke. Wanieru-di tiu maaõmysỹdỹỹnyõkre.

³ Tahe teòdu iximy rexiraykynyre: –Wadinodu riwateònyke. Aõhebo arotỹỹnyke? Warurukõre dori tahe aõmysỹdỹỹsira ariwinyõtyhy. Tule ijõ iny-ribi iixitòedỹỹna riwaixỹrure.

⁴ Reeryre tahe, aõhebo arotỹỹnykremy. Aõwiwihikỹ wabiòwa dee ariwinykre. Riwateònykeki tahe wabiòwasỹ-ò arakre.

⁵ Ibutumy nieru huòtedu mahãdu-wana rarybere, tawedu-ribi huòtedu wahe. Tamyreny rarybere: –Tiwesebo tewyta wawedu-ribi?

⁶ Tahe diwyònyde: –Adỹỹ rehuòtera, 100 hynamy wahe. Tai tahe rarybere ijõ: –Iwekre tahe wylemy biritinyke, 50 wahe.

⁷ Ijõ-ò tahe rarybere: –Tiwesebo adeve? Diwyònyde: –Trigo rehuòtera, 1000 prato wahe. Tai tamy rarybere: –Kai 800my biritinyke.

⁸ Iribi tahe hãbu ityhy heka teòdumy rarybere: –Tii inatyhy nieru erydu ratxireri. Tahe Jesu-isi rarybere: –Kabede wijinabòdu mahãdu heka aõmydỹỹnana erydutyhy rare, ityhydỹỹdu mahãdu ratyre wahe.

⁹ Tai tahe adee ararybekre. Kabede mahãdu biòwamy boibeke, anieru-di. Tahe anieru ituekeki, Deuxu taheto wiwihikỹ-ò aradykre, biu-ò heto wiwihikỹ wahe.

¹⁰ Aõmydỹỹnana aõ aõkõmy kai òbitimy masỹnykeki, tule aõ nihikỹmy kai iweselemy mabeke. Inyõ heka ibutemy wasikeki, tii tule aõ nihikỹmy rawasinykre.

¹¹ Kaiboho heka kabede nieru-di òbitimy aõkõ

atxibenykeki, tule biu-ki araròsòna bitaõtyhy, aõ wiwihikỹ inatyhy wahe.

12 Iny wixira nieru-di heka òbitimy boibebenyòkeki, timybo anieru tyhy-di òbitimy boibeke.

13 Inyõ iny inatxi deòdumy aõkõ rarekre. Inatx-inaõ dori iluukre, ijõ ta iluukõkre. Deuxu dee maaõmysỹdỹõtyhy. Tiu nierurahi inatyhymy teamyhỹteki.

14 Fariseu mahãdu tamy roholareu, urile idi nierurahi risinyrenyre, tiiboho ire nieru ributunymyhỹrenyre bòdỹyluurenyre.

15 Tahe Jesuisi tamyreny rarybere: –Kaiboho heka òbitimy inyko-ò ixi-di atximahãtenyte. Ihãre tahe Deuxu timybo toimahãte rierymyhỹre aõna aõnareny bina. Aõmy hãbu rexinohõtinyinmyhỹre, aõtxi-ki Deuxu-ò awiõhyyre.

16 Moisesi bede ywina rybe tahe tule Deuxu Rybedu mahãdu awi rare, Joaõ Sebedỹỹdu rehemynyre tahe ixãwire. Iu tahe Deuxu Iòlòna Rybe wihikỹ tamyra ròhònnyre. Kia tahe iny ri-tohodỹỹnyre. Ibutumy iny kia-ò ralokremy idi ratxireri.

17 Biu, bede rexihuke tahe isiraõre. Deuxu rybe tahe rexihuõtyhy. Kia isiratyhy rare. Ityyriti rybe wedenaõ riõnonyõtyhy.

18 Hãbuõ tahãwyy-ribi ixãwikeki, idi iwixira-wana roikeki, tii òtadu rare. Hãwyy ixedu-wana tii roikeki, òtadu rare.

19 Ityhy mahãduõ riki tyy òwyhykỹwiwi-di rexi-tyynymyhỹre. Tii idi rexirabedesirananyhỹre. Awimyhỹre tuu ratximyhỹre.

20 Tahe urimynodu tyymy binadumy iijò-ki ixyby ixyby ratximyhÿre. Lazaru inire.

21 Tii ityhy rÿsÿnauhe rirÿsÿkemy raòbirenymyhÿre. Ijòròsa dori ityybinatòmý dirahumyhÿde.

22 Lazaru rurureu, ÿju mahãdu ridyrenyrene biu-ò ilabiereny rora-ò, Abraõ wahe. Tule ityhy rurure idi rituunynyrene.

23 Tahe rubu-ki rubu mahãdu bedebina-ribi aõhòkÿmý dÿÿnana ityhy Abraõmý robire irehe-ò Lazaru tule irora-ki.

24 Tahe ityhy dyryde: —Abraõ, walabie, wadi ihe bedexiwoboronyke. Lazaru ini wadee tebò-ki beruty-di kanake wadòròtò elehynamy. Jiarÿ dori raòhÿtÿhÿtÿreri kaheòtywo-ki.

25 Tukõleta, Abraõ narybede: —Dàa aõwiihikÿ-di tatemyhÿ-di bexinohõtinyke. Tukõlemyta Lazaru aõbina binahakÿle rimyre. Tahe kaki aõwimy Lazaru ratxireri. Tukõmyta kai ibymy atxiteri.

26 Ihãre ta hãloohukÿ inyko-ki rÿire. Timyki kaludu kia-ò iòhòreseõna. Tule kia ludu kaò iòhòreseõna.

27 Hebose, Abraõ walabie, kamy ityhy narybede, Urile Lazaru wasÿ-ò biteònykekõ aõbo. Waseriòreboho deòwarisidÿÿmy.

28 Waseriòreny dori iruyrenyrene urikõ-ribi kabedebina-ò kòdòiheny.

29 Tahe Abraõ diwyònyde: —Tiibohe dori Moisesi tyyriti, Deuxu rybedu mahãdu tyyriti dire. Tii tahe tamy roholarenymy rityhynyrenyke.

30 Ityhy narybede: —Aõkõre Abraõ walabie. Kia inyõ tarubu-ribi rexixamy ròòsekeki xiery ta,

taòrarunareny-ribi rexirahĩrenyke.

³¹ Tahe Abraõ dirawyònyde ixby. —Moisesi tyyriti rybe-ò, Deuxumy rybedu mahãdu rybe-ò roholaõkeki, tii mobo rexixake tule ityhydỹỹõna.

17

¹ Tahe Jesuisi taerydỹỹna mahãdu-ò rarybere: —Kiemy inyõ wodohonadỹỹmy aradykre òraruna-ò besekey. Kobe làhàxe tii kiawesemy rotỹỹnykreki.

² Tii dori ibinatyhy rare. Wadee heka kabera-txi mana-di rataataamy sỹy-ò reakenawi rare. Tukõmy uri-ribi watyhydỹỹdu tỹmyraõ riòrarudỹỹnyheny.

³ Bexiijebeny ta. Aityhydỹỹdu seriòre rexiòrarunanykeki, tamy marãhĩke. Tii rexirãhĩkeki, iaõna aõna bina-ribi bexinohõtilosanyke.

⁴ Txu sohojiõmy adee rexibinanykeki, kai tule ibinamy tai mahamy. Tii ix-di rexiwotòdenymy adee nakeki, tule idi bexiwobrunymy bexinohõtilosanyke iaõna aõna-di.

⁵ Jesuisi erydỹỹna mahãdu dexitòenydenyde: —Wanyrỹreny, wainatyhynareny ini bisõwedỹỹnyke.

⁶ Jesuisi dirawyònyde: —Ainatyhynareny heka sunyisõmo wesekeki, kamy bederarade-ò mary-bebennyke: —Bexitake inihe idi bera-txi myike. Tahe tii aratyhynykre.

⁷ Titxibo kaibohoõ eòdudirenykeki aoworu-di itxeredu ada budoeni-di itxeredu wahe. Tii taaõmysỹdỹỹna-ribi kanalokreu, kawesemy aõbo tamy manarybekre? Wy, wylemy rikiroxikre dori.

⁸ Timyki kawese tamy arybeõna. Tukõmyta tamy marybeke: —Warÿsÿna biywinyke idi wadee, idi manakre. Ariroxikre dori. Wabyre arihu-di ta bexiõenykre.

⁹ Teòdu deòdumy rearahu-di aõbo, txiòtòetuukemy tamy rarybere aõbo. Timyki tukõna. Kiemy dori taaõmysÿdÿÿnale riwinyre.

¹⁰ Iu aõmysÿdÿÿnareny bihudi, iwese heka atx-imahãbenyke kamy bexirybenymyhÿbenyke: Inyboho deòdule roire, aõtyhy aõkõ mynodu, iny aõmysÿdÿÿnarenyle heka inyboho riwinyreny.

¹¹ Jesuisi Jerusalẽ hãwã-ò ramyhÿreu, Samaria bede, Kalileia bede woty-a-di rare.

¹² Iu hãwãõ-txi raloreu, debo ituemy sõwereny tyymy binamy mahãdu iry-ò doide, tahe irehemy rexiereny.

¹³ Iribi tamy dyrydenyde: —Jesuisi, Erydÿÿdu, wadireny ini bexiwobrunyke.

¹⁴ Tureny robireu, narybede Jesuisi-ò: —Xiwena wahidÿÿna mahãdu-ò ixi-di itxerenamy bõike. Kia-ò rariamy roirenyreu, tahe reytereny.

¹⁵⁻¹⁶ Ijõreny Samaria ludu mahãduõ reytemy iximy robireu, Deuxu riwowydÿÿÿnymy tamy dòòsede, rawiunymy. Tatiowomy Jesusiko-ò resere. Tahe rarybere: —Txiòtòetuuke.

¹⁷ Tahe Jesuisi ritÿÿraxinyre: —Debò itue wese, asõwerenyre? Titxibo ta debò inaubiõwaboho roire?

¹⁸ Aõherekiwe kaa iny witxira sohojile Deuxu wowydÿÿÿmy dòòsede, Samaria luduõ wahe?

¹⁹ Tahe Jesuisi tamy rarybere: —Mynyike, idi makre. Atyhydÿÿna òraru-ki dori teyteta.

²⁰ Idi fariseu mahãdu Jesuisi-ò rÿÿraxirenyre: —

Tiubo Deuxu Iòlòna kanakre? Tii diwyònyde: — Timyki Deuxu Iòlòna dehemynysŷnami inyõ ro-biõtyhy.

²¹ Tule inyõ kiau rarybeõtyhy: —Betehebeny inihe ka-ò: —Tukõmy aõbo: —Kowaki heka rare? Deuxu Iòlòna dori aworeny-ki rare.

²² Tahe taerydŷŷna mahãdu-ò rarybere: — Tiutxumy heka Deuxu Riòre Hãbutyhyhykŷ txumy bobibenykemy tahe bobibenyõtyhy.

²³ Tahe ijõ adeereny kanarybekre: — Bedetehebeny inihe kaò ada kowa-ò. Tahe iitxerenyõmykre.

²⁴ Iwese tiribi tiò biu relaanymyhŷre wese heka Deuxu Riòre Hãbutyhyhykŷ txu kŷnyikre.

²⁵ Delemy tahe tii aõhõkŷmy rotŷŷnykre. Wijin-abòdu mahãdu teramy reakre.

²⁶ Noe bededŷŷnana wesemy heka rŷimyhykre. Iu beòra rariareu. Tahe Deuxu Riòre Hãbutyhyhykŷ kedehemykre iu.

²⁷ Ibutumy heka worana bedehesi rŷire. Lisisò tahe rŷire. Hãwyy herina lisina rŷire iu. Iu tahe beòra rariare. Ibutumy ituere.

²⁸ Lòò bededŷŷnana tule iwesere. Tiiboho worana bedehesidile rŷire. Tiiboho rityhynyõtyhy. Urile hetomy riwinymyhyre, oworumy riwinymyhyre, aõna-di rohonymyhyre.

²⁹ Iu tahe Lòò ihãwã-ribi ròhònyreu, Deuxu heòty ityre riteònyre. Biu-ribi heòty ityre resere enx-ofre-wana.

³⁰ Iwesele txu tii heka rarekre heka, Wadehemynyna Deuxu Riòre Hãbutyhyhykŷ wahe.

³¹ Kiau tahe inyõ ihetotyre heka rŷire. Malòkekõ heka ahetowo-ò aõnamynamy. Inyõ tule oworu-ki

rỹire, taheto-ò aõkõ ròðseke.

³² Lòò hãwyy-di mohõtinyke.

³³ Inyõ taumy riyrubunykeki, tii ruruke. Ijõ tahe wadeewimy rurukeki, tii taumy rayrubukre.

³⁴ Adee rarybere: –Bede rurureu heka inatxi hãbu rõrõreri. Ijõ heka rakre dynamy reakre. Ijõ tahe rarikre.

³⁵ Inatxi hãwyy heka rỹsỹna-di raaõmysỹdỹỹnyny heto-ki ratxikre. Ijõ heka dynamy reakre, ijõ heka rarikre.

³⁶ Inatxi hãbu heka oworu-ki raaõmysỹdỹỹkre. Ijõ heka rakre dynamy reakre, Ijõ tahe ririkre.

³⁷ Ierydỹỹna mahãdu rỹỹraxire. Titxibo rỹikre, Wanyrỹ? Tii rirawyònyre: –Titxibo iumy rubu roire-wana, rara tai wii ributunyre.

18

¹ Jesuisi heka ròkewesenanyre ribedeerynyreu. Kia wese heka tii ijyymy relyyre. Rex-itòenyhykemy tii ribedeerynyre tule ixitòedỹỹ-ò ixirarenyõmy.

² Hãwãõ-ki tahe hãbu matuariõ rare, tii tahe ibinare. Juizimy heka ratximyhỹre ywisidỹỹdu wahe. Tii iny rityhynyõtyhy, Deuxu lau ruberuõmyhỹre.

³ Tule heka hãwyy wyteseõ tai rasỹnymyhỹre. Kia tamy ramyhỹre sõwemy. Tamy rarybera: –Biwawikòhenakykre wahe. Wakòludu tahe riwahureri. Kywisidỹỹkỹdu kai atxiteri. Anoherek-ibo tiwawokutòenykõteri.

⁴⁻⁵ Aòhòkõmy hãbu iaõna aõna òbitidỹỹ deramy reamyhỹre. Tahe Hãbu ixidee rarybehyra. Inatyhymy jiarỹ inyõ retyhynyõtyhy. Tahe

hãwyy wytese sõwemy wadee rarybereki, jiarỹ ariõbitinykre iaõna aõna ibutumy iòludu-wana. Aõkõkeki tiiemy kidiwarulòlòdenyke.

⁶ Tahe Jesuisi ritỹnynyre: —Juizi bina rybe-ò kai-boho boholabenyke. My wahe.

⁷ Deuxu heka taijoi mahãdu-ò roholake. Òbitimy iòludu-di riywisinykre. Taijoi mahãdu dori tamy rexitòenyre. Tii wymy riwiòhenanyke.

⁸ Tii inatyhymy taijoi mahãdu riwiòhenanykre. Jiarỹ, Deuxu Riõre Hãbutyhyhykỹ wymy adehemynykreu, watyhydỹỹdu-txi aõbo areakre.

⁹ Tule Jesuisi kia ijyy relyyre, iny ixityhymy ixi-di ratxityhymy kia ijõ inymy kiale radònymyhỹre. Kia tahe rikewesenanyre.

¹⁰ —Iny inatxi hãbumy heka templo-ò ròirenyre rexitòenykemy. Ijõ fariseu rare, ijõ tahe nieru arisidu rare.

¹¹ Fariseu tahe rỹimy rexitòenykemy ixidee. My wahe: —Deuxu, jiarỹ aõhãbubina aõkõ rare. Tai tahe umy reàlãmy wahãre. Jiarỹ aõwasidu aõkõ, aõòrarudu aõkõ, aõòtadu aõkõ. Iwese kowa nieru arisidu wese aõkõ jiarỹ rare. Txiòtòetuuke tai.

¹² Semana sohoji heka wabyreõ-di inatxix-umy rewymyhỹre. Tule waaõna aõna ibutumy ijura adee rewahinyre. Debòwiõna-ribi sohoji re-wahinymyhỹre wahe.

¹³ Nieru arisidu tahe irehemy rỹire. Biu-ò aõkõ retehere, tahe rexihetenyre rexitòenyrerimy Deuxu-ò. My wahe: —Deuxu, biwawotòenyke. Jiarỹ òrarudu rare.

¹⁴ Jesuisi ijyy ritỹnynyre: —Adee ararybekre. Mobo teysamy taheto-ò nade? Ixityhydỹỹdu aõbo

ada ijõ aõbo. Kohe ijõ tuure, ixityhydỹdukõ wahe.

¹⁵ Tiiboho heka uladu tamy didydenyde. Iu Jesuisi tebò iratityre ritidimy ritxuhore awimy roirekemy. Tahe ierydỹña mahãdu tamy idyrenyõkremy raryberenyre.

¹⁶ Jesuisi rarybere: –Txiò, kididyke uladu wadee. Uladu wese dori Deuxu Iòlòna rare.

¹⁷ Inatyhymy ararybekre: –Moõ heka uladu wese Deuxu Iòlòna rityhynyõkeki kia heka Deuxu Iòlòna-ò ralòõtyhy.

¹⁸ Idi tahe iweduõ rarybere: –Erydỹdu wihikỹ, aõwexe ariwinykre idi biu-ò arahenykemy.

¹⁹ Jesuisi tamy rarybere: –Aõbo wa wihikỹmy wadee tarybeta. Hãbuõ tiu awiõre. Deuxu sohojile tahe awira.

²⁰ Bede ywina tyyriti kai teeryte:

–Rubudỹõmykemy, tule òta òtaõmykemy, wasiõmykemy, tule ruiõmykemy, iny wii itxenadỹõmykemy, adi biywinykemy, boo tule.

²¹ Hãbu tamy rarybere. –Kia bede ywina rybe retyhynyhyylere, uladudihyyle wahe.

²² Jesuisi rarybere: –Kai sohoji aõmydỹñale aki nasiranyde. Kai makre, ibutumy aõna aõna-di bohonykre, idi tahe kia nieru biwahinykre iny aõkõdu mahãdu-ò. Kia tahe aõmydỹñadikre biu-ki. Tahe manakre biwaheludunykre.

²³ Kia rybe-ki heka hãbu rabadewore. Rexitare ibedewomy iaõna aõna sõwetyhyreki.

²⁴ Jesuisi retehemy ibederyry-di tahe rarybera taerydỹña-ò: –Kia iny iaõna aõna sõwemy rỹireri, Deuxu Iòlòna-ò ralòke isirare.

25 Kamelo tyyrorenawo-di ralòkemy isirakeki, kia-ribi isiratyhyre iny iaõna aõnadikeki ralòke Deuxu Iòlòna-ò.

26 Ijohonadu tahe widee rarybere: –Mobo tai biu-ò hedukre.

27 Jesuisi rarybera: –Inatyhymy kōaõboka hābu-ò isiratyhyre. Deuxu-ò tahe ibutumy aõna aõna isiraõre.

28 Pedro rarybere: –Boholake, jiarỹboho ibutumy rerirenyra araheludunykremy.

29 Jesuisi rarybere tamy: –Inatyhymy adeereny ararybekre. Moõ waluukeki, rybewihikỹ luukeki, kia heka ririkre: heto, taseriòre, tyby tadi-wana, tariòre, tabede, ibutumy waòraru-ki, Deuxu Iòlòna òraru-ki, ririkre.

30 Ka bedekile ritakre sōwetyhymy ibutumy aõna aõna. Ihāreta biu-ò rahenykre Deuxu-wana rasỹnykemy.

31 Jesuisi taerydỹna mahādu ridyre inysōwe-ribi tamyreny rarybekemy: – Boholabenyke waijoi! Jerusalē-ò rokoirenykre. Tai iny riwarubunykre jiarỹ Hābutyhy rarehāre, Deuxu Riòre rarehāre wahe. Iwese Deuxu Rybemy rybedu mahādu rarybere wese.

32 Tiiboho riwawahinykre judeukõdu mahādu-ò. Tiiboho riwabinabinadỹnykre, riwalahikre, watyre rarybexinykre.

33 Riwahetenykre òhòte-di, idi riwarubunykre. Ihāre tahe inataõ txu-di tahe adexixakre rubu-ribi.

34 Jesuisi erydỹna mahādu urile bederiòtiinyrenyre. Aõmybo tii rarybere rierytyhyõrenyre. Irybe tamyreny dori ierynatyhykõreri.

³⁵ Iu Ijeriò hāwā-ribi iòhòmý roirenyreu, inatxi iny ruetàmý heka rononymhỹ Jesuisi ibire-di rareu. Tiiboho nierumý rexitòenymyhỹrenyre.

³⁶ Inysõwe-ò roholarenyre tahe, tii rỹraxirenyre: –Aõhereriwe.

³⁷ Tahe tamy rarybere: –Jesuisi wa rareri Nazare hāwā ludu wahe.

³⁸ Tahe ruetãõ rryre: –Jesuisi, Davi riokore! Biwatòenyke hewa! Wadi làhà inihe bexirux-etòenyke.

³⁹ Iny sõwemy tamy rarybere: –Iryõmyke! Ihāre ta tii rryrymyhỹre: –Davi riokore, wadi ma-wotòeke!

⁴⁰ Jesuisi rryryre tahe rarybere: –Tamy byryke wadee kanakemy.

⁴¹ Jesuisi tamy rarybere: –Aõmybo kai taruteri adee arutỹnykremý. Tahe hābu ruetàhàkỹ tamy rarybere: –Wawedu, ixityre arobikremý.

⁴² Jesuisi tahe tamy rarybere: –Makre, atyhý-dỹna kai arateytenyra. Kialehe rare.

⁴³ Aõwesele ixityrele tii robire. Tahe Jesuisihemy rare rry-di. Taihe ibutumý iny heka Deuxu ri-wowodynymyhỹ.

19

¹ Ijeriò hāwā-ki Jesuisi rehemynyre. Idi rari-areri.

² Tahe hābuõ tahe Jesuisi riere. Zaqueu inire. Inieru sõwere. Tii nieru tarasadu weduõ rare. Inieru sõwere. Tii heka iyjare tahe Jesuisimý ro-biõtýhy. Raòwònýre tahe òwòru-txi.

³ Tii Jesusimy robikemy risŷnymyhŷ, tiu tuu robiõhyymyhŷreki. Ijzare-ki tahe rexisiranyre. Kiemy dori iny rarie rarie iko-ki rŷimyhŷ.

⁴ Tahe ijoiko-ò rexiraðre tai òwòruõ-ò raòwònyre Jesusimy robikemy iribi idi kanakrèð.

⁵ Iu Jesuisi tamy rehemynyreu, biu-txi retehemy Zaqueu-ò. Narybede: –Wylemy bedeseke Zaqueu. Wiji dori aheto-ki bede wadi rŷike.

⁶ Tahe rabedesamy wymy resere. Awimy Jesuisi rybe-ki rahare.

⁷ Tahe inyõ mahãdu iòraru-ki kamy rexyry-benyrenyre: –Aõhewe Jesuisi iheto-ò rara? Tii iny òbikõmy nodu hãrele wahe.

⁸ Zaqueu tahe Jesuisi rarybere: –Bodoholake ini, Wanyrŷ. Tahe waaõna aõna iwekre iaõkõdu mahãdu-ò ariwahinymy ararekre. Tule txibo inyõ-ribi rowasire inaubiòwa wawasi ratyre tamy ariwahinykre.

⁹ Tai Jesuisi narybede: –Wijityhyle kahãbu sŷmahãdu-ò henana rehemynyra. Kahãbu tule Abraõ riore riòrele rare.

¹⁰ Deuxu Riòre Hãbutyhyhykŷ dori iny òrarunamy resere mahãdu òrysomy itarasamy nade. Jiarŷ tiire.

¹¹ Jesuisi tamyreny rawesenanyre timybo Deuxu Iòlõna raremy. Jerusalẽ hãwã-ò iòhõmy ratximyhŷre. Tai tahe Deuxu Iòlõna iòhõmy ratximyhŷremy roholare.

¹² Tahe Jesuisi rarybere iny ityhyõ heka: –Inyõ nihikŷ heka rakemy ratximyhŷre ijõ bedè-ò ratŷinykemy. Tai iòlõmy ronykremy rare. Iribi tahe ròðsere.

13 Tii tahe taaõmydÿÿnana ririre teòdu mahãdu-ki. Teòdu mahãdu debòwiòmy heka womati tÿrÿrÿhÿkÿ nieruõ sohoji sohoji tamyreny riwahinyre. Tamyreny rarybere: –Nieru bitakre, idi bibutunybenykremy adireny watzireri adoosekreu.

14 Tahe kia bede ludu mahãdu iòlò deramy ratximyhÿre tai tahe tamy rybemy iny mahãduõ riteònyre: –Kahãbu aõkõ iny iòlòreny ronykre.

15 Ihãre tahe iòlòmy ronyre. Idi tahe tanieru wedu mahãdu-ò rarariòwyre. Tiwesebo teòdu mahãdu nieru ritare rierykemy.

16 Juhuludu tahe rehemynyre: –Wawedu, betehe inihe ijõ debòwiò anieru ratyre rebutunyre.

17 Tahe iòlò sõwemy riwowydynyre: –Awityhymyhe taaõmysÿdÿÿta. Kai heka deòdu wihikÿ tate. Kai ibutedile sõwemy tewinyte tahe debòwiò hãwã adee ariwahinykre.

18 Ijõ tahe rehemynyre: –Wawedu, betehe iny iruyre anieru tyre rebutunyre.

19 Tahe iòlò tamy rarybere: –Kai sÿ iruyre hãwãmy dinodu mabekre.

20 Ijõ deòdu rehemynyre: –Wawedu, ahãxe anieru. Jiarÿ tyky-di reraserasenymy rerarenyre.

21 Jiarÿ alau raberure. Kai dori hãbu nieru tarasaery heka tate. Aõ taaõmysÿdÿÿteri-ribi aõkõ heka nieru tetamahãte.

22 –Kai heka deòdu awi aõkõ heka tate. Arybe xiery waribi arateònykre. Kai tiwaeryte jiarÿ nieru tarasaery heka watzireri. Aõ raaõmysÿdÿÿre-ribi aõkõ nieru retamahãre.

23 Aõherekibo. Kia nieru yrubuna heto-ki

terikõte. Tai iximyna ratyre ini iribi ratare.

²⁴ Iòlò teòdu inatxi-ò rarybere: —Wanieru iribi bitabenyke. Ijõ hãbu sõwemy ròtareò rawahikre.

²⁵ Ijõ raryberenyre: —Tii heka debòwiò nieru ijõdire.

²⁶ Adee ararybekre: —Inyõ òbitimy raaõmysÿdÿÿkeki, tii sõwetyhymy ritakre. Tule inyõ òbitimy raaõmysÿdÿÿõkeki, tii ibutumy ròõnodÿÿkre.

²⁷ Iwedu rarybekre: —Waòludu mahãdu tahe wadee bididybedenyke. Wadera mahãdu wahe. Wako-ki birubunybenyke.

²⁸ Tarybe rahudi tahe Jesuisi rare Jerusalẽ hãwã-ò.

²⁹ Jerusalẽ iòhòmy ritehemynyrenyreu, tahe inatxi taerydÿÿna bedede riywinyra hãwã-ò roikemy. Inatxi hãwã iòhòmy roire, Betabaji, Betÿnia-wana. Kia-ò Oliveira hãwãlò roire.

³⁰ Jesuisi rarybere: —Kaiboho boikre kowa hãwã-ò. Kowa-ò birònykreu jumenta riòre mahabenykre. Moheka ityre rariaõlemy ratximyhÿre. Biesemy, wadee bididybedenyke.

³¹ Inyõ adeereny rarybekeki: —Aõhekremybo idi atxitenyteri. Tahe tamy marybebenykre: —Wanyrÿ tuu rurureri. Ixityre kaò kidiòkesedÿÿnykre.

³² Tahe hãbu roire. Iwese Jesuisi rarybere wese ibutumy rÿire. Jumenta riòre ryro hetoijò-ki riti-sanymy rÿimyhÿ.

³³ Tai riesereu, iwedu rarybere: —Aõherekibo teeseteri.

³⁴ Tai tiiboho Jesuisi rybe myna tamy raryberenyre: —Inynyrÿ tuu rurureri.

35 Tahe ridyrenyrene jumenta riòre Jesuisi-ò. Tii-boho tatyreny ritidirenyrene jumenta riòre tyremy. Tiiboho risỹnyrenyrene Jesuisi ityre-ò.

36 Jesuisi rehemynyreu, ijõboho tahe tauwòhi ryromy ritidire ityre rariakemy.

37 Jerusalẽ iòhòmy rehemynyreu, Oliveira hãwãlò-ribi, ierydỹna mahãdu rawyhyrarònyreri, tule ryrereri.

38 Tii heka wowydyna rare. Tii heka Wanyrỹ ni-wesekemy naderi. Wowydyna rare Deuxu Iòlòna. Kai Iòlòna kanakre. Wyhyrarò biu-txi kodoholakre.

39 Ijõ fariseu mahãdu rarybere Jesuisi-ò: —Marybeke aerydỹna mahãdu-ò tiiboho riyrykemy.

40 Jesuisi tamy rirawyònyre: —Tiiboho riyrykeki, manale wowydynamy riryke.

41 Jesuisi Jerusalẽ hãwã-ò iòhòmy rehemynyreu, rahinyre.

42 Tii rarybere: —Kaiboho ywinatyhy teeryõte. Inatyhymy teeryte wana wadee awire, tahe aõkõre.

43 Ijõ txu kanakre. Ahãwã ibutumy rirurawonykre aõbina mahãdu, aòludu.

44 Ibutumy hãwã ituekre. Iny iwo-ki tule rurukre. Mana ibutumy kedesekre. Rierykõre dori tiubo jiarỹ ahedỹrenymy nanade.

45 Tahe Jesuisi dohodỹna hetowo-ò ralore. Tahe kia-ribi aõna aõna-di rohononymhỹre mahãdu, õbradu mahãdu diteònyde.

46 Rierynanymyhỹre tahe tamy rarybere:

—Raritidyõlemy aõbo rỹireri: —Waheto kõaõboka inatyhymy ixitòedỹna hetomy rỹirakre. Idi kaiboho tewinytenyete wasidu hetowesele.

⁴⁷ Txu ibutumy Jesuisi dohodỹna heto-ki ròbedeerydỹmyhỹ. Xiwe wedu mahãdu, Deuxu aõmysỹdỹdu wedu mahãdu roholarenyreu, rõhõtynyrenyre: —Timybo inyboho Jesuisi rubudỹmy rikiwisỹnyrenykre.

⁴⁸ Tiiboho tahe aõkõhykyre iny sõwemy dori bede riòtiinymhỹ ibedeerynadỹna-ki.

20

¹ Ijõ txu tahe Jesuisi ròbedeerydỹmy, Ijyy Tỹmyra Wihikỹ wahe. Ririranymhỹrenyre dohodỹna hetowo-ki, bede ywina erydỹna mahãdu, Deuxu xiwena wahidỹdu mahãdu wedu, tule matuari mahãdu tamy doide.

² Tiiboho tamy rỹraxyrenyre: —Mowe ateòdỹdure kia aõna aõnamy tatỹnymhỹtemy.

³ Jesuisi dirawyònyde: —Adeereny tule araỹraxikre. Kaiboho bidiwawyònykeki, tahe jiarỹ akoreny ỹraxina ariwyòkre aõrurudibo aõna aõna rewinyhỹre.

⁴ Tahe Jesuisi ritỹraxyrenyre: —Mobo Joaõ ralisebedỹmy riteranyre? Deuxu aõbo ada iny aõbo?

⁵ Tiiboho widee rarybera: —Deuxu riteranyremy inyboho rakaryberenykeki, tai tii rarybekre: —Aõherekibo tahe tii tetyhynytenyõte.

⁶ Inyõ riteranyremy rakaryberenykeki, iny aruberuwỹhỹrenykre. Ibutumy iny dori Joaõ rityhynyre tii Deuxu rybe-di rybedumy. Ijõ ijoi mahãdu urile inyreny kidihetenykre.

7 Tai tahe tiiboho raryberenyre: –Jiarỹboho reeryõrenyre. Tai tahe Jesuisi rarybere:

8 –Hebo, jiarỹ adeereny iximy ararybeõtyhy modeòdỹỹnamy jiarỹ tuu watxirerimy.

9 Iribi tahe Jesuisi tamyreny ijyy-di rierynanymyhỹre: –Hãbu uva oworuõ wese ròbròre. Tahe riòtitynyre. Tahe hãloo riare oworu ubetya-ki, ruỹdỹỹnomy. Tahe utò riwinyre. Idi tahe rityhere hãbu mahãdu-ò. Tahe rexitare tasỹ-ribi ijõ bede-ò.

10 Tahe bederaty siredemy bededỹỹnana rehemynyreu, iwedu teòdu riteònyre bederaty ritakemy. Tahe oworu-di itxeredu oworu wedu deòdu rimyrenyre, rihetenynyrenyre idi riteònyrenyre ixihyylemy.

11 Ixityre oworu wedu teòduõ riteònyre. Kia heka irati rihetenyre ta tamy rawobinarybenyre.

12 Ijõ riteònyre. Kia heka rirubunynyrenyre.

13 Iwedu ixi dee rarybere: –Aõhebo arotỹỹnykre. Tahe oworu wedu iriòre sohojilere, wariòre kie kie sohojile ariteònykre. Tai tiiboho rityhynyrenykre.

14 Kia oworu-di itxeredu mahãdu widee raryberenyre: –Kia heka wedu aõna aõna tarasadu rare. Rurukre, idi tahe iaõna aõna inydeerenykre.

15 Tahe rimyrenyre idi rirubunynyrenyre tahe idi rehurenyre oworu-ribi. Jesuisi ritỹỹraxinyre: –Aõhebo tahe oworu wedu rotỹỹnykre. Tai Jesuisi ixityre narybede:

16 –Tii kanakre oworu-di itxeredu mahãdu hudumy, tai tahe oworu rityhekre iny witxiraõ-ò. Kia-ò tiiboho roholareu, tahe raryberenyre. Timyki tukõna.

17 Jesuisi idi reny retehemy tahe rarybere: — Ritina-di aõbo tariaõletenyte kia ryberiti:

—Mana-di hetowidỹdu rehura. Kia mana heka hetohàtxi-ki heridu rare.

18 Inyõ kia manatyre resekeki, kia urile raoroorokre. Mana tahe inytyre resekeki, kia urile risyrisynykre.

19 Bede ywina erydỹna mahãdu, tule xiwena wahidỹna mahãdu wedu rimykyri riwisyryre kiaule. Brebумы ta turenykõre.

20 Tiiboho hãbubinaõ riòwynyre тамы imynamy irybe-ki. Tai tahe Dinodu-ò riwahinykremy aõsirakõmy timykibo irutaõmy rirybewitxiranyrenyky.

21 Tiiboho rarybere Jesuisi-ò: —Erydỹdu, jiarỹboho araerymy adi watximahãrenyre kai inatyhy hãbu tate. Iny ibutумы adee wiwese wiweselere. Inatyhymy iny-ò Deuxurymy teerynanymahãte. Tahe tiiboho ritỹraxyrenyryre:

22 —Awire aõbo ada ibinare aõbo nieru rawahinyryhỹre bede dinodu-ò. Tимыbo tahe, imposto raòwумы aõbo ada aõkõre aõbo.

23 Jesuisi rierymyhỹre tõhõtinanareny, tahe ritỹraxyryra: —Aõherekibo kaiboho tiwaurihitenyteri.

24 Wadee womati nieruõ bidiwy waitxerenamy. —Kawe moõ tyytarasana rare, katahe moõ tyyritina rare. Tiiboho dirawyònyde: —Kiahe bede dinodu hõrõ rare.

25 Jesuisi rarybere: —Hỹdebo, bede dinodu hõrõ tahe тамы biwahinybeny, tule tahe Deuxu aõna aõnahõrõ Deuxu-ò biwahinybeny.

26 Tiiboho aōkōre. Irybe-ki rimynamy aōkō. Urile ribedeòtiinyre.

27 Saduseu mahādu tamy nade. Kia heka iny rubu-ribi rexixamy aōkōre-riki rierynanymyhỹre. Tiiboho ritỹỹraxinyre Jesuisi:

28 –Erydỹỹdu, Moisesi raritinyre bede ywina-ò, kaimy:

–Hābuō rurukeki, tahāwyy iriòre ijōdiōkeki, tahe
kia hāwyy tahābu seriòre-wana roike.
Iriòredikre taseriòre rubuòwmy roikre.

29 Seriòre debòinatxi reuròmý raremyhỹ. Juhuu ijō roire hāwyy-wana. Tahe tii rurure iriòreòlemy.

30 Tahe ihewoludu iseriòre wytese-wana roire. Tii rurure iriòreòlemy.

31 Ihewoludutyhy tule ibutumy roire wytese-wana, tahe ituerenyre iriòreòlemy.

32 Iròòbmy tahe hāwyy tule rurure.

33 Ixixanau tahe mohābubo tii-wana rarekre. Ibutumy dori wytese-wana roire.

34 Jesuisi rirawyònyre: –Kabede-ki hāwyy my iny roimyhỹre.

35 Ixixanabedeu heka moō roiōtyhy, inyō dori bede kia riòbnykreu.

36 Ibutumy iny ýju wese rarekre biu bede-txi.

37 Moisesi tatyryiti itỹnyhỹkỹlemy rarybere: –Iny rubu-ribi kedexixakremy. Tai ta heòty òwòru sōmo riworonanymyhỹki ixybylesỹ rarybera:

–Deuxu heka Abraō, Ijai, Ijaò kia Deuxu rare.

38 Tai Deuxu inyru mahādu Deuxu dori rare. Iny rubu mahādu ta aōkōre.

39 Inyō rarybere: –Arawyònakyhyna, Wanyrỹ tate. Bede ywina tabohe teerytyhyte!

40 Tai tahe ixyby rỹỹraxiōhyyrenyre.

⁴¹ Jesuisi rarybere: —Timybo bede ywina erydỹdu mahãdu rarybemyhỹre Kristu Davi riòre raremy.

⁴² Davi rarybere aõmybo Deuxu Tyytybytyhy tamy narybedemy iwiuna-ki:

—Wanyrỹ rarybere Wanyrỹ-ò:

—Bodony warurunawe-ribi.

⁴³ Txiòhe inihe, aòludu awarawo-txi aritidikre.

⁴⁴ Tahe Davile tanyrỹmy rininire. Timyki tahe Davi itybymykre.

⁴⁵ Tii taerydỹỹna mahãdu rierynamyhỹreu.

⁴⁶ Tii rarybera: —Bexiemyhỹbeny bede ywina erydỹdu mahãdu lau. Tiiboho heka tyyrehetyhywidihikỹle rexityynymyhỹrenyrene. Tiiboho heka ixi rybedỹỹluurenyre hãwã riraki. Dohodỹỹna heto-ki rynanawi luurenyre. Tule ta anarỹỹ rỹi-wana, tyhytyrekile rynana tamyreny awire.

⁴⁷ Tiiboho tule wytese aõ aõkõ mahãdu aõna aõna ritamyhỹrenyrene. Ixitòedỹỹna rehehekỹ rexitòenymyhỹrenyrene. Tiiboho heka aõnihikỹmy aõhõkỹmy dỹỹnanamy rotỹỹnyrenykre.

21

¹ Jesuisi retehemy rỹimyhỹ dohodỹỹna heto nieruhyna-txi. Tii retehere tibo iny tanieru-di rehumyhỹdi. Tai inieru sõwe mahãdu nieru sõwemy ritidimyhỹ.

² Tule tahe nade wytese aõ aõkõ mahãduõ. Tii inatxi nieru sõmo-di rehure.

³ Tai Jesuisi rarybere: —Kowa heka wytese nieru-di rehure ibutumy iny witxira ratyre.

⁴ Ijõ mahãdu tanieru uhedile rehumyhỹ. Tahe wytese idi rehure ibutumy tanieru-di rexihumy taumy-ribi idi rehure.

⁵ Dohodỹ̃na hetomy ierydỹ̃na tamy rarybere: –Erydỹ̃du, beteheke mana wihikỹ ruxera ruxera-di eryna heto riruxeranyreridi.

⁶ Jesuisi rirawyõnyre: –Kaiboho betehebennykre hetonihikỹ-ò. Kia heka mana ijõ wityre-ki rỹiõtyhy, ibutumy heka kedejuxunykre.

⁷ Tiiboho ritỹ̃raxinyre. Tiubohe ibutumy kidixixãwididỹ̃nykre. Tiiboho ibutumy bedekonanadỹ̃namy reakre. Timybohe arieryrenykre, aõma bedekonyrenykre.

⁸ Jesuisi tamyreny rarybere: –Kaiboho anaitxenanydenyheny lau bexiebennykre. Sõwemy dori rỹikre wanimy rarybemy rarekre: –Jiarỹ dori Kristu rare. Tahe iny sõwemy itxenadỹ̃my reakre.

⁹ Kaiboho wounarybe-ò, aõbina rybe-ò, boholakreu, breburenyõmykre. Kia heka kanakremy ratximyhỹre. Urile bededỹ̃nana ikonanatyhy aõkõ rare.

¹⁰ Tii tamyreny rarybere: –Uritere iny lahinaryny, ijõ lahinaryny widee kanaaõbinanykre. Tule iõlõna mahãdu, ijõ iõlõna mahãdu-wana widee kanaaõbinanykre.

¹¹ Bede bedesu ijõ hãwã-ki kanamytatakre. Tahe aõkõre rama kedekre. Kia heka juhu aõhõkỹmydỹ̃nana rarekre. Aõbrebuna brebuna kỹnyikre. Idi biu-ki aõwitxira kỹnyikre.

¹² Tiiboho arawahinyrenykre aõludu wedu-ò, iõlõ-ò. Kaiboho heka aõhõkỹmy iu botỹ̃nybenykre, watyhydỹ̃ õraru-ki. Tiiboho arahatenyrenykre

dohodỹna hetowo-ki. Kiabohoko-txi wadee kai-boho kedelyykre inatyhymy aõna aõna rỹiremy.

13 Rybewihikỹmy ibutumy bede bede hãwã hãwã-ò belyybenykre.

14 Tiubo aradyrenykeu, urile nohõtiõmy aõmybo kaiboho marybebenykre.

15 Kiautyhyle aõmybo marybebenykremy bierykre. Kia tahe marybekre. Kai aõkõ dori marybekre, Deuxu Tyytybytyhy tahe rybedukre.

16 Asỹreny dori rõtenawo-ò ararõtenyrenykre. Seriõre seriõrele wii kidirubunykre. Tyby heka tariõre kidirubunykre. Uladule tadi, tyby kidirubunykre.

17 Ibutumy heka iny iy kedeakre wani òraru-ki adeereny.

18 Ibedeu araderenytiõ reseõtyhy.

19 Bexityhymy ta tai ixiery dori biu-ò mahenybenykre.

20 Ijõ tahe Jesuisi rarybere: –Woudu mahãdu Jerusalẽ rirurawonykreu heka bierybenykre aõhuluhudunamy bede rỹirerimy.

21 Judeia hãwã hãwã-ki ratxikeki, mahenybenykre bederatòòhòkỹ-ò. Inyõ Judeia hãwãkikeki, iribi òlò rỹikre. Idi inyõ bederokeki ixyby Jerusalẽ-ò rôteõmykre.

22 Kia txuu heka òwynatxumy rare. Ibutumy rybe tyyriti myna heka bede rỹikre.

23 Kobexe heny hãwy bõtõmy rỹira, tule hãwy tariõre ritõnymy rỹira. Aõhòkỹmydỹỹnana kanakre tiu heka tuuõre. Debure nihikỹ heka kanake kia iny tyre-ki. Tiu heka kiamy bede roiõtyhy aõhòkỹmydỹỹnanamy.

24 Sõwemy iny rurukre mayrehe-di. Iny sõwemy radykre ijõ bede-ò aõhõkỹmy tai rotỹỹnykremy. Ity-hydỹỹdukõdu mahãdu rasỹnykre Jerusalẽ hãwã-ki iu.

25 Ixityre tahe Jesuisi rarybere: –Idi webòhõna rỹira txuu, aõhõkỹmydỹỹnana itue-di, txuu heka ru-runykre. Ahãdu tule rurunykre, tule taina. Beòbò lau iwodỹỹ lau ibutumy iny ruberukre inihikỹ òraru-ki.

26 Iu bede bede iny mahãdu aõhebo rotỹỹnyny, tatõhõtibre-di tiiboho reserenyre sutyre-ki tai.

27 Iny retehekre

Deuxu Riòre, Hãbutyhyhykỹ dehemynyna-di. Biu-rawetyky-ribi kodobehekre tatyhy-di.

28 Tahe kia aõmydỹỹnana rỹikreu, ywinamy bõibenykeu, iõhòlereri.

29-30 Tai tahe Jesuisi figueiraò-wana tahe bede ròkewesenanyre: –Figueiraò-di ini bexinohõtinybenyke. Tii heka tairu-txi, tanoiròsò ritỹmyranymyhỹreu, tai tahe bierybenykre wyra iõhòlereri.

31 Tule kia aõna aõnany bobibenykre, tii iõhòlereri. Ijò-ki iõhòwesele rỹire.

32 Inatyhymy adee ararybekre, kia wijinabòdu itueõtyhy aõna aõna rỹikre hãrele.

33 Biu, bede-wana ituekre, tahe warybe itueõtyhy.

34 Tahe Jesuisi tarybe rihumy rarybere: –Kaiboho bexiebenyke, betehebennykre ixinohõtidiỹỹrenytyhykõmy. Roxina worana bedehesi-di timybo kaiboho atximyhỹtenytedi. Mona juberere biõbenykemy mohõtinyõke.

Kaiboho dori teeryõtenyete tiubedemybo adòòsekre.

³⁵ Kiatxu kanakre tahe iwese nawii mynyna wese aõwesele rymykre ibutumy bede iny mahãdu rymykre.

³⁶ Biebenyke tahe, Deuxu-ò bexitòenybenyke. Kia tahe aõhebo rotỹỹnykre-ribi mahenyke. Bityhynyke Deuxu Riòre, Hãbutyhyhykỹ, jiarỹ wahe.

³⁷ Txuõ txuõlemy tii Dohodỹỹna heto-ki ribedeerynyre ihãre tahe rummy Oliveira hãwãlò-ò rara.

³⁸ Rudile tahe sõwemy iny dohodỹỹna heto-ò rehemynymyhỹre Jesuisi rybe-ò ijohomy.

22

¹ Iòhòmy ratxireri Pascoa worana bedehesi kodohònykremy. Kia anarỹỹ wehityhynamy heka iny ratya-di reare. Tule orotxu anarỹỹ kia ròhònyre.

² Deuxu aõmysỹdỹỹdu wedu mahãdu, tule bede erydỹỹdu mahãdu Jesuisi rymykemy ratxireri idi rirubunykykemy.

³ Satanasi heka Judasi Isariòwo-ki ralore, tii Jesuisi erydỹỹnaõ ihỹre.

⁴ Juda Isariò heka Deuxu aõmysỹdỹỹdu-ò rara Jesuisi riwahinykemy.

⁵ Tiiboho tamy roholarenyre, reysare. Tahe tamy nieru riwahinykemy riurenanyre.

⁶ Tahe Juda riijemyhỹre aõu aõu bedewihikỹ tamyreny riwahinykemy. Wasimy riwahinykemy tii roholare.

⁷ Juhu orotxu anarỹỹtxure budoeni xiweloo rirubuny rahudi tahe Jesuisi erydỹỹna mahãdu

tamy rarybere: —Titxibo anarỹỹ rỹsỹnamy biroxi-kemy atxiteri.

⁸ Tahe Jesuisi heka Pedro, Joaõ-wana riteònyre: —Kaiboho boike iny rỹsỹnareny ywidỹỹmy.

⁹ Tiiboho rỹỹraxire. Titxibo ariywinyrenykre?

¹⁰ Jesuisi tamy rarybere: —Kaiboho boikre hãwãhãkỹ-ò. Tahe hãbu-wana wii biòbynykre butxi-di retyyteriò. Tahe tii biheludunybeny. Titxibo heto-txi ralokreò, kaiboho tule birony-benyemy bitỹỹraxinybenykre heto wedu:

¹¹ —Wawedureny rarybera: —Titxiwexe anarỹỹ rỹsỹna arirỹsỹkre waerydỹỹna mahãdu-wana.

¹² Tii heka adee kiditeòsinykre hetowoõ-txi biu-ki. Ibutumy rexihumy rỹire inydeereny. Tai rỹsỹna inydeereny biywinybenykre.

¹³ Tahe ierydỹỹna rexitare. Roire hãwãhãkỹ-ò. Tahe rotỹỹnyrenyre Jesuisi rybe myna. Tahe ibutumy rexihurenyre anarỹỹ-ò.

¹⁴ Kia txu rimyreu tahe Jesuisi nade taerydỹỹna waòinatxi reurò-wana byremy ronyrenykre.

¹⁵ Tii tamyreny rarybere: —Jiarỹ awanareny ariroxikemy watxiwãhãre. Karibi dori warubuna-ò arakre.

¹⁶ Inatyhymy ararybekre: —Jiarỹ konanamy ayreny-ki ariroxikre. Ixyby ta Deuxu Iòlònakile tahe rikiroxirenykre.

¹⁷ Tahe vỹĩ mona hyna rimyre, rexitòenyre, tahe tamyreny riwahinyre. Ibutumy ibute bute iribi tuu riòrenyre.

¹⁸ Inatyhymy ararybekre: —Tiu ixyby tuu ar-iõõtyhy Deuxu Iòlòna-ki kotyre.

¹⁹ Tiiboho riroxireriu, Jesuisi orotxu rimyreu, raorore, rexitòenyre, tahe tamyreny riwahinyre.

Rarybere: —Ahãxe, kia heka waumy wese rare. Iu biroxikeu, warubuna-di mohõtinybenykemy.

²⁰ Biõbenyke! Kaa dori wahãlubu wesemy ratxireri. Tahe tamy riwahinyre riõrenykemy. Tai sõwemy iny ròhònyke biu-ò hena-ò ibutumy òraruna ixãwididỹmy. Tuu ròhònyra. Kia heka wadeewimy iny Deuxu-wana ratxiinyhỹre, wahãlubu òraru-ki.

²¹ Boholabeny inihe watyhedỹdu inykyrenyke ile ronyre.

²² Iwese tyyriti-ki roire wese heka arurukremy, Deuxu Riòre, Hãbutyhyhykỹ, jiarỹ wahe. Kobe làhàxe watyhedỹdu.

²³ Tiiboho tahe widee rarybere: —Mobo tahe rare? Mobo Jesuisi riwahinykre.

²⁴ Iribi tahe widee raryberenyre, mobo wiratyreremy?

²⁵ Tahe Jesuisi tamyreny rarybere: —Kabede iòlò mahãduy-ki iruru dire. Bede dinodu tahe iny rininire: Iny biòwa.

²⁶ Tahe ayreny-ki kawese aõkõ ihỹre. Inihikỹtyhy inyõ ratxikeki, tii inyuhe deòdumy ratxikre.

²⁷ Tibo inytyhy rare? Roxidu mahãdu ada deòdu mahãdu? Roxidu mahãdu, aõhe inatyhy? Jiarỹ tahe ayreny-ki deòdu wesemy jiarỹ rare.

²⁸ Kaiboho heka wawanahyy atxitenyte aõhõkỹmy ratỹỹnymyhỹreu.

²⁹ Tai tahe adee ruruna ariwahinykre. Iwese Waha wadee riwahinyre wese, adee ariwahinykre.

³⁰ Waiòlòna-ki kaiboho wawana biroxibenykre, biõbenykre. Tule rynana wiwihikỹ tyre-ki rỹdu mahãdumy bonybenyke. Israeli iny mahãdu heka

kaiboho biòbitinybenykre, ibutumy judeu mahãdu wahe.

³¹ Jesuisi ijõ rarybere: –Simaõ, Simaõ, wadee bohohatyhyke. Satanasi araurihirenykemy wadee rexitõenyre. Tahe adeereny kanake araurihidyỹmy.

³² Dori rexitõenymyhỹre, Simaõ, kai bityhynyhykemy. Wadee bòdòòsekeu, abiòwa mahãdu bi-wiòhenanyke.

³³ Tahe Pedro diwyònyde: –Awanahyy arakre, wanyrỹ, arurukre hãre, ròtenawo-ò arakre hãre.

³⁴ Jesuisi tamy rarybere: –Pedro, kai biwatxiõnyke, hãnie hãbu ryrykõule biwatxiõnyke inataõmy.

³⁵ Jesuisi tamyreny rỹỹraxire: –Juhu arateònyrenyreu anieruhynakõmy, asaurenkyõmy, awarenyõmy, adeereny aõbo aõ rasiranyre? Tiiboho dirawyòmy: –Aõkõ, aõ rasiranyõhyre.

³⁶ Tahe Jesuisi narybere: –Wiji tahe txibo inyõ inieruhynadikeki, saudikeki, biwykre. Txibo inyõ imayrehedikõkeki tayhyitxena-di rohonykre iòwy-di tahe tii riòbranykremy.

³⁷ Kamy dori Deuxu rybe tyryiti-ki roire: –Òbitikõmy nodu mahãdu-wana tii rỹire. Ibutumy timybo tyryiti wamy rarybere heka rỹikre.

³⁸ Tamy ierydyỹna mahãdu rarybere: –Wanyrỹ, kaa inatxi mayrehe rỹire. Tahe Jesuisi rỹire rarybere: –Awire kia.

³⁹ Tahe Oliveira hãwãlò-ò roirenyre, taerydyỹna mahãdu-wana.

⁴⁰ Tiiboho kowa-ò rehemynyreu, Jesuisi rarybere: Bexitõenyke! Tai tahe òraruna-txi beseõke.

41 Tahe iko-txi urihimyò rareu, taowotimy re-semy. Rexitòenyre:

42 –Waha, adee arexitòenykre. Adee awikeki, aõhõkỹmy dỹỹnana waribi biixãwidỹỹnyke. Tahe adeewikomykre, wadeewi ta aõkõre.

43 Ýjuõ tamy nade biu-ribi tamy ruru riwahinyre.

44 Sõwemy tahe rexitòenyre, iòsana-ribi resere bee wahe. Hãlubu wese heka ihỹre resereri bede-ò.

45 Tii rehemynyre tai rahare rõrõrenymy roireriò. Tiiboho ele risarenyre sõwemy rabadeworenyreki.

46 Tamyreny rarybere: –Aõherekibo tarõtenyteri? Biijebenykre, bexitòenykre.

47 Tii rarybereriu, aõwesele Judasi nade. Tii-wana doide hãbu mahãdu.

48 Jesuisi rarybere Judasi-ò: –Judasi, Deuxu Riòre bityhenykre aõbo, jiarỹ hãbutyhyhykỹ wahe? Waòbuò-di aõbo biwatyhenykre?

49 Jesuisi erydỹỹna mahãdu tuu robireu, tamy rarybere: –Iny mayrehe-di araaõbinanyrenykre, Wanyrỹ.

50 Kia ijoiõ mayrehe ritare tahe Deuxu aõmysỹdỹỹdu wedu deòdu nohõti riorore.

51 Tahe Jesuisi rarybere: –Ixãwike. Tahe hãbu nohõti riteytenyre.

52 Tahe Jesuisi dirawyònyde tamyreny, Xiwe wahidỹỹdu mahãdu-ò, dohodỹỹna heto itxedu wedu-ò, matuari mahãdu-ò: –Kaiboho mayrehe-di, òhòte-di tiwaòrytenyteri jiarỹ wasiduòrysy wese.

53 Jiarỹ tahe dohodỹỹna heto-ki watximyhỹ

txuõ txuõlemy adeeremy anaerynanymahãdenyde. Kowa-ki heka tiwamyõlemyhÿtenyde. Kia heka bededÿÿnana rexihure. Bede luru ruru roirerimy. Tahe aõbo iritina-ki rÿireri, kia heka kÿnyikremy.

⁵⁴ Xiwena wahidÿÿdu mahãdu dinodutyhy-ò wedu-ò tiiboho Jesuisi ridyrenyde. Pedro rihe-ludunyde ireheriõremy.

⁵⁵ Rehemynyreu tai Pedro ixitõteenymy heòtywera-ò ronyde heto itxeredu mahãdu-wana.

⁵⁶ Pedro ratximyhÿ-ò tahe deòduõ rehemynyde, ijadõma wahe. Pedro-di ijadõma retehemy ta rarybere: –Tii tule Jesuisi Nazareludu-wana ratximyhÿde.

⁵⁷ Tahe tii rexitxiõnyde: –Jiarÿ reeryõre aõmyboho kai tarybeteri.

⁵⁸ Ixybyle kowa ijoioõ Pedro-ò rarybera: –Inatyhymy kai ijõ mahãduõ tate. Tii inatyhytyhyrybemy rarybera: –Jiarÿ reerykõre hãbumy tarybetenyteri.

⁵⁹ Ijõ òrau tahe ijõ rarybere: –Inatyhy rare kai Jesuisi-wana ahãte, Kalileia mahãduõreki.

⁶⁰ Tahe Pedro rarybere: –Hãbu, reeryõre aõmybo tarybeteri! Tahe hãnie hãbu robura.

⁶¹ Jesuisi heka Pedro-ò retehere. Tahe Jesuisi rybe-txi Pedro tõhõti reare. Iwese Jesuisi rarybere: –Hãnie inataõmy robukre myna, kai wahe-ludumy bedexitxiõnykre.

⁶² Pedro tahe iribi rexitareu, ixidee icy reamy rahinyde.

⁶³ Tahe hãbu mahãdu Jesuisi rihetenymy, rihirenyde.

⁶⁴⁻⁶⁵ Tiiboho riruehetynymy rihetenymy idi

ritỹraxyinyhyre: –Mowe arahãtenyra. Idi tahe sõwemy idi risinyhyreny.

⁶⁶ Rudile tahe judeu wedu mahãdu ributunyre xiwena wahidyỹna mahãdu-wana. Jesuisi ridyrenykemy raryberenyre dohodỹna mahãdu-ò.

⁶⁷ Tamy ritỹraxyinyre: –Kai aõbo Kristu tate, Deuxu Riõretyhy. Jesuisi rarybera: –Jiarỹ heka kohemy ararybekeki, kaiboho biwatyhynyõtyhy.

⁶⁸ Adeereny arỹraxyikeki, kaiboho biwawyõnybenyõtyhy.

⁶⁹ Kaiboho bierybenykre

Deuxu Riõre heka jiarỹ rare. Idi Waha rurunaweribi-ò aronykremy.

⁷⁰ Ibutumy tahe tamy rarybere: –Kai aõbo Deuxu Riõre tate? Tii rirawyõnyre: –Iwese kaiboho tarybetenyteri wese jiarỹ inatyhy rare.

⁷¹ Tahe tiiboho raryberenyre: –Inyõ irybe-ò ijohoke heka aõkõre, inybohoke dori tuu roholarenyre.

23

¹ Kia iny ka ibutumy Jesuisi ridyrenyre Pilato-ò, bedede dinodu-ò wahe.

² Idi tahe aõbina binahakỹmy tuu raryberenyre: –Kahãbu heka bedede rijeijeinyreri iõlõmy ijoi radõnykemy. Iribi iõlõ-ò õwydỹ rỹiõmyhỹkemy rarybere. Ihãreta Deuxu Deõdỹnamy raremy idi iõlõmy rexininimyhỹre.

³ Tahe Pilato rỹraxyire Jesuisi-ò: –Inatyhywe kai Deuxu mahãdu iõlõtyhy tate? Tai tahe Jesuisi riwyõnyre: –Kai tuu tarybeteri, Wanyrỹ.

4 Tai tahe Pilato rarybere xiwe wahidỹỹdu mahãdu dinodu-ò, tule inysõwe mahãdu-ò: — Timyki kahãbu aõhõkỹmy wasỹdỹỹõna, aõõ bina dori riwinyõlere.

5 Tai ixyby idi risỹnyrenyrene: —Kahãbu heka Kalileia bedede-ribi bedede rijeijeinyrenyrene rareri, idi Judeia bedede-di tule katahe kakile tuu rotỹỹnyrene.

6 Taita Pilato rỹỹraxire: —Tii aõbohe Kalileia mahãduõ ratxireri?

7 —Tii Kalileia mahãdu rare. Kia Pilato rieryreu, Herodi-ò riteònykemy rexinohõtinyrene. Tii kia dinodureki. Ihãreta Herodi Jerusalẽ hãwã-ki iu ratximyhỹ.

8 Herodi Jesuisi robireu heka reysare. Jesuisimy robikemy riwisỹnymyhỹre sõwemy. Idi tahe tuu robireke, reõsare. Tai tahe reysare. Ini-ò roholahyymyhỹre. Tule aõwihikỹ wixira riwinykemy idi riwisỹnymyhỹre.

9 Idi tahe Herodi sõwemy rỹỹraximyhỹre. Jesuisi tahe rirawyònyõhyrene.

10 Aõbo xiwena wahidỹỹdu mahãdu wedu, tule bedede ywina erỹdỹỹdu mahãdu sõwemy aõna aõna binamy tuu raryberenyrene.

11 Herodi tasoldado-wana tuu raòhõtemy idi risinyymyhỹrenyrene. Tyywihikỹ-di rirahananyrenyrene. Iribi riòkesedỹỹnyrene Pilato-ò.

12 Juhuu heka Herodi Pilato òludumy widi raremyhỹ. Kia txule tahe widee rowoixirenyrene.

13 Idi tahe Pilato tahe ibutumy xiwena wahidỹỹdu wedu, tule matuari mahãdu tule ijõ iny mahãdu ributunenyrenyrene.

14 Tamyreny rarybere: —Kaiboho heka wadee tedytenyteri bedede jei jeiwidỹỹdumy tuu

tarybetenyte tebutenyteri heka. Jiarỹ akoreny-ò retỹraxyre idi aõhe tai ibinamy rahaõhyre.

15 Tule iòlò Herodi tai ibinamy rahaõhyre. Tai diòkesedỹnyde. Tai iurenana ta aõhereki timyki irubuõna.

16 Urile raòhòtedỹkemy bede reywinyre idi ta ixinamy rakre.

17 Kiemy dori worana bedehesiu, ròtena-ribi inyõ heka ròhònymyhỹke.

18-19 Sõwemy iny heka rirajuare: –Aõkõre uritere ta Baraba biteònyke. Kia hãbu urile ruruke. (Baraba inyrubudỹdure. Bede jei jeidỹ-ki heka ròtena-ò ralore.)

20 Tai Pilato Jesuisi òlòdỹmy riwisyñnyhỹ tai ixyby rarybere: –Aõkõre Jesuisile ariteònykre.

21 Sõwemy iny ixyby ryryre: –Aõkõre, itxeò-ki bitamadỹnyke!

22 Tahe Pilato tainatãõnamy narybede: –Aõherewe, aõwe tii ibinamy riwinyre. Aõheka tai ibinaõhyreri rubu-ò rawahikemy. Òhòteòle ta arawahinykre idi ariteònykre.

23 Ihãre ta iny sõwe mahãdu ire rirajuamyhỹreny itxeò nihikỹ-ò rurukemy. Ixieryta iryreny-ò roholare idi tukremy.

24 Iu Pilato heka Jesuisi riwahinyre rubu-ò tumyna rexitòenymyhỹreny.

25 Ijõ hãbuõ ta ròtenawo-ribi riòlòdỹnyre, iixitòedỹreny myna wahe. Tii hãbu aleerydu rare, tahe bede jei jeidỹdu tule. Iwana ta Jesuisi rawahire irybemynarenymy aõhebo rotỹnykremy.

26 Tahe Jesuisi ridyreny. Ryki tahe hãbuõ

iutedereny-ò nade, Simaõ inire, Sireni hãwã ludu wahe. Nohõtiõlemy ta ityre itxeò nihikỹ ritidirenyre, iherenymy idi kanakremy.

²⁷ Sõwemy ihemy nodu sõwe. Iy-ki hãwyy mahãdu Jesuisi-di robumyhỹreny.

²⁸ Tii tahe tamyreny rexiòkesemy narybede: —Jerusalẽ hãwã ludu hãwyy mahãdu! Ixirahi bobubenyke ariòre rahi tule warahi ta aõkõre.

²⁹ Tiutxumybo bexirybenybenykre: —Hãwyyky bedekòby heka raritxòrenykhõre mahãdu rare, tohokuã ritònykhõre mahãdu tiku kuladu-di tarukikhõre mahãdu.

³⁰ Tiutxumybo bexirybenybenykre hãwãlò-ò: —Watyreny bedeseke tule hãwãlò riòre-ò bexirybenybenykre: — Biwawòbenykre.

³¹ Wiji kawesemyhỹre hee itukure hãre. Timykrebo tahe hee irubukreu.

³² Ihãre tasỹse iny inatxi hãbu òbitimy nodu aõkõ ridyrenyre Jesuisi-wana rururenykremy.

³³ Tahe hãwãlò riòre-ò ratitybymy ninadu-ò ritehemynyrenyre. Tahe tii-wana inatxi wasidu itxeò nihikỹ-ò rilamadỹỹnyrenyre. Ijõ ruruweribi-ò ijõ hyweweribi-ò.

³⁴ —Waha, idireny bexiruxetòenyke rieryõhyrenyleri dori aõmybo rotodỹỹnyleri. Tai tahe ityy wimy ritxuatxuakremy dado-di rehummyhỹreny tibo iwydydukremy.

³⁵ Iny retehemy rỹimyhỹ taile wahe. Judeu wedu mahãdu tule Jesuisimy rarybere: —Tii iny sõwemy rihedỹỹnyre, kia aõherekibo tii rexitaõreri rubu-ribi, tii Deuxu deòdỹỹna rarehãre.

³⁶ Tule soldado mahãdu rarybere aõbina bina-hakỹlemy. Diwyde tii aõna ta iny kremy rirahòreny tamy idi reare rijeny:

³⁷ –Kai inatyhymy judeu mahãdu iòlòmý atxiteri wana heka kaa bexitakre iribi.

³⁸ Itxeò ratya-ki tahe aõma timy roire tyyritidỹña. –Kaa Heka judeu Mahãdu Iòlò Rare.

³⁹ Ijõ heka rarybereri Jesusibire-ki roireriõle tamy rarybereri: –Deuxu deòdỹña tateki, bexi-take tule biwatabenyke.

⁴⁰ –Wy, Deuxu lau taberuõlemahãte aõbo tule dori iny aõhõkỹmy rokotỹnykrelemy iny roireri.

⁴¹ Lòwudu tamy rarybereri: –Iny heka rurureri, aõbina binahakỹ iny riwinyre òraru-ki. Iny rurureri. Kaa hãbu rỹire tiu aõbina riwinyõhykyre.

⁴² Jesuisi-ò rarybere: –Jesuisi, watxi õhõti beakre Iòlòmý bonykreu.

⁴³ Jesuisi tamy rarybere: –Wijile heka biu-ò heka rakakre.

⁴⁴⁻⁴⁵ Txutyemy bedè roronyre idi txioro txu re-hehekỹ-ò bedè tuu rỹire. Inataõ òramy bedè ry-bynyre, rỹire. Heto-ki rahanaheridu urile raykare templowo-ki wahe.

⁴⁶ Tahe Jesuisi rirajuare: –Waha, watyytyby adee rawahinyreri. Iu irybe rexihureu rurure.

⁴⁷ Soldado mahãdu wedu tuu robire kia aõhebo rotỹñnara tuu rarybere: –Kia inatyhymy hãbu òbitityhy rare.

⁴⁸ Ibutumy iny kia robire Jesuisi rubu-ò rahinymy ròsere rexihetenynymy tabreti-ò.

⁴⁹ Ibutumy tii mahãdumy ratximyhỹre iribi ire-heriòremy rexiijemyhỹ.

⁵⁰⁻⁵¹ Tii judeu bede mahãduõ rare. Jyjemy inire. Tahe Kristu rubuna-ki awimy rahaõhỹyre tajoi mahãdu-ribi. Tii dori Deuxu Iòlòna riraòmyhỹre. Ihãwã Arimatea inire.

⁵² Tai ta rare ixitòedỹỹmy Pilato-ò, Jesuisi umy kidiwahinykremy.

⁵³⁻⁵⁴ Tai tahe ritare itxeò-ribi tyy ura nihikỹ-di tyy-di ritỹtetỹtenyrene. Manawabedewo-ò ritidire. Tai tiu iny rahãloonaõmyhỹre. Aõma judeu mahãdu elehyna txu wahe ixiywidỹỹnatxumy txu rỹireu heka aõma worana bedehesi txu.

⁵⁵ Hãwyy mahãdu Kalileia-ribi Jesuisi-wana. Tii-boho doide Jyje-wana Jesuisi hãloo-ò itxeremy.

⁵⁶ Tahe timybo roimyhỹ riòtudunyrenyrene. Dòòsedenyde iribi aderòna lỹnyre ywidỹỹmy iumy tỹnyrenamy.

Kia rexielehynyrenyrene sabado txu bede ywidỹỹna myna-di.

24

¹ Juhu txu semana bededỹỹnanau txuu deadeu hãwyy roire wabede-ò. Tiibohe riwyyre lỹnyrena.

²⁻³ Rehemynyrenyreu, mana nihikỹ tahe ijò-ribi ratamy rỹire. Tahe ralòrenyreu, Jesuisiumy ihoõhyyre.

⁴ Wabede-ò rirònyrenyreu, robirenyrene inatxi hãbu. Ityy urahakỹmy ronymyhỹre tai.

⁵ Tahe tiibohe bede riòtiinyrenyrene idi tabrebu-di suò reserenyrene. Ýjyõ tamyreny rarybere:

⁶ –Iny irumy kaibohe tejjeteri kaki wabede-ki aõbo? Tii kaki ratxireri. Tii rexixara rubu-ribi adeereny rarybere wese Kalileia bedeki:

⁷ –Inyõ riwawahinykre inybina-ò Deuxu Riðre Hãbutyhyhykỹ. Itxeòtyre-ki arỹikre tai arurukre. Inataõ txu-di tahe rubu-ribi arexixakre.

⁸ Tahe hãwyy irybe-di rõhõtynyrenyre.

⁹ Wabede-ribi raijaranyrenyre Jesuisi erydỹỹna mahãdu-ò ijyymy.

¹⁰ Kia tiibohore: –Marie Madalena, Joana, Marie Txiause. Ijõ hãwyy tule tii-wana roirenyre.

¹¹ Iu tamy relyyre, rityhynyõlerenyre.

¹² Pedro tahe rỹimy reare idi raijaranyre wabede-ò. Urile tykylemy robire tahe dòðsede, rexiòtiinyre.

¹³ Itxuleu ta iny inatxi hãbu Jesuisi tyhydỹỹdu mahãdu tahe roirenyre Emau hãwã-ò. Jerusalẽ hãwã-ribi txibo 10 km wese irehere.

¹⁴ Ibutumy aõhebo rotỹỹnyramy wiko relyymy ròimyhỹre.

¹⁵ Iuleta Jesuisi tamyreny dehemynyde idi tiiboho-wana roire.

¹⁶ Tiiboho tuu robirehãre timykibo rierykõhykyrenyre.

¹⁷ Tahe Jesuisi ròtỹỹraxire: –Aõmywe widee tary-betenyteri.

¹⁸ Iijõreny Klopamy nidu narybede: –Kai soho-jilewe Jerusalẽ-ki aõhebo bedede rỹira teerykõte.

¹⁹ Tii dotỹỹraxide: –Aõherabo ta. Tiiboho tuu relyyre: –Jesuisi Nazare ludu kie. Tii Deuxumy rybedu nihikỹ heka rare, Deuxu-ò dori ibutu iny-ò heka rybe-ki aõni heka aõmywidỹỹ-ki heka ihỹỹna rare.

²⁰ Waxiwenareny wahidỹỹdu wedu tahe wadinodureny itxeò nihikỹ-ò rurukremy riwahinyrenyre.

21 Tule judeu mahãdu tarasadukresÿna rahol-arenyre. Ihãreta tukõlemyta inataõ txumy rubu-ki bede idi rÿira.

22 Bederarasò-di waijoireny hãwyyõ ihãloo-ò roire.

23 Tai itxi rekoaõhyyre. Dòòsedenydeki tahe ÿjummy riki robirenyremy delyydenyde. Tii Jesuisi rubu-ribi rexixamy tamyreny rarybere riki.

24 Waijoirenyõ tule ihãloo-ò roirenyre. Inatyhy rikihe rare. Urileta riki Jesuisimy robiõrenyre.

25 Tahe Jesuisi tyhy Klopaboho-ò narybede: — Aõherewexe Deuxu Rybedu mahãdu rybe awo-ki teximytentyteri tetyhynykõtenyteriki wahe.

26 Kialemy dori Kristu dori aõna aõnamy rotÿÿnykremy tai Deuxu riwowydynykremy.

27 Tahe Jesuisi rexidelenyre aõbo rybe ritina roiremy. Moisesi ryberiti juhuumy ritÿnynynyre. Timybo Deuxu rybe ritidÿÿdu raremy. Tiiemy heka iximyhÿyle rarybere.

28 Ibutumy tamy relyyhyyre ramyhÿrehyy tahe ritehemyny Emau hãwã-ò, tai inatxi hãbu rarikreò wahe. Tahe Jesuisi rarybere: —Aõkõ arexino-ranykre.

29 Tai ta tamy ihãrele rarybemyhÿre: — Txioinihe bodonyke kakile. Aõma bede ratxinyra ratxioronytyhya. Taile tiiboho-wana rare ihetoreny-ò.

30 Rorukurenyre riroxirenykremy. Tahe Jesuisi orotxu rimyre rexitõenyre Deuxu-ò. Tahe orotxu riororiorore imynareny.

31 Iu tahe aõwesele rierymy reare Jesuisi. Tai iruereny raraymy rieryrenyre. Tahe aõwesele

iõmy iribi reny reare.

³² Tai widee raryberenyre kiamy. Iu tii Ryberitimy inydeereny rydi relyyreu, urile wawo ratooteemy. Kai tahe. Ijõ diwyõnyde: —Kohe jiarỹ tulere.

³³ Iribi tahe ritamanyrenyrene. Diòòsedenyde ixyby Jerusalẽ hãwã-ò. Tiu waòsohoji reurò erydỹna itxi rekoarenyre. Tai tiiboho narybedenyde:

³⁴ Inynyrỹrenyhe rexixara. Pedro heka tuu robira:

³⁵ —Jiarỹboho tulerenyra wawanale ròirenyra rydi. Tule wadeereny orotxu riyreyrenyrene. Taile reeryrenyre.

³⁶ Iu kiamy relyymyhỹrele, Jesuisi dehemynomy deade ityarenxti. Riryberenyre ibutumy: —Ywina heka akirenyke!

³⁷ Ibutumy ruberurenyre ilau. Urile raresỹny tamy raholarenyre.

³⁸ Jesuisi rarybere: —Aõhebo taberutenyteri. Breburenỹomyke hewa biwatyhynybenyke.

³⁹ Jiarỹle ratxireri. Wadebò-di bedetehebedenyke, wawa-ò tule. Jiarỹ karare wadee inihe bideribedeny. Jiarỹ uni aõkõ watxireri. Uni dori idedire aõkõ wawese aõkõre bedetehebedeny inihe.

⁴⁰ Tai tahe tebò wotõ mona, tawa wotõmona, riteòsinyre tamyreny.

⁴¹ Ihãrele tahe rityhynyrenyõre, ibedesamy bedede riòtiinymyhỹreny. Jesuisi tahe rexitòdenyre tamyreny aõ rirỹsỹkemy.

⁴² Tamy riwahinyrenyre utura wòsi deyreõ.

⁴³ Rirasỹre ikorenyòle.

44 Idi tamyreny rarybere: —Aõma wawanale ratximahãre, õhõtireny itxi reara. Aõma wawana atximahãtenyete juhuu. Ibutumy heka adeereny retỹnynomy rarybere aõmybo wamy rybe roimyhỹremy. Ibutumy heka Moisesi rybedu ritidỹỹnaki iritina-ki roimyhỹre. Wiuna tule wamy riritinyre.

45 Tai tahe ritỹnynyre õbitimy irakyreny riraynyre.

46 Ihetxiu rybe wãhã aõma Deuxu Deòdỹỹna ruru-ribe heka aõhõkỹmy rotỹỹnykremy. Ruru-ribe inataõ txu-di rexixakremy bede roire.

47 Kaa rybe wihikỹ ritidỹỹna heka kaa Jerusalẽ bede-ki robỹtỹkre ihãreta ibutumy iny iny kõkõmy bede bedemy robỹtỹkre. Kiamy heka ibutumy iny ydee marybebennykre. Iny riwatyhynomy rỹirakre heka ibutumy iõraru-ribe ariixãwididỹỹnyke.

48 Tule terytenyteri ibutumy aõhebo rotỹỹnykremy.

49 Tahe adee ariwahinykre iwese Deuxu rarybere wesemy heka adee ariwahinykre. Kaki hewa matxibennykre hãwã-ki. Tahe kanakre heka adee ruruõ biu-ribe. Iribe tahe bõhõnykre karibi.

50 Iribe tahe Jesuisi ridyreny Betỹniary-ò. Tai tahe rilãhãnanyreny tuu tamy rexitõnyreny ibutumy tamyreny. Tamy rexitõnyreu heka ilãhãnamy tamy rexitõnyre biutxile ire rexidomy ramyhỹre ryanamy ramyhỹre.

51 Iu rilãhãnanymyhỹreny, biu-ò rare.

52 Tamy rexitõnyra aõma lãhãnamy, wowydy-namy rexitõnymyhỹre Deuxu-ò. Tai riwowy-dynomyhỹreny. Teysa-di diõkesedenyde Jerusalẽ-ò

ixyby.

⁵³Tai tahe Deuxu dohodỹỹna heto-ki ixyby ixyby rowowydynanymyhỹrenyre.

Deuxu Rybe Tyyriti **New Testament in Karajá (BR:kpj:Karajá)**

copyright © 2011 Wycliffe Bible Translators, Inc.

Language: Karajá

Translation by: Wycliffe Bible Translators, Inc.

Karajá [kpj], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Karajá

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

PDF generated using Haiola and XeLaTeX on 18 Apr 2025 from source files
dated 29 Jan 2022

55ce0bcd-101e-52a3-984e-847027efe150